















# কোলাহল

শ্রীবিমল কর

কলিকাতা পুস্তকালয় প্রাইভেট লিমিটেড  
৩নং শ্যামাচরণ দে স্ট্রীট, কলিকাতা-১২

চৈত্র ১৩৪৭



প্রকাশক

শ্রীযশোমোহন চক্রবর্তী

৩নং ভায়াচরণ বে ষ্ট্রীট

কলিকাতা-১২

মুদ্রক

শ্রীভোলানাথ হাজরা

ব্রহ্মবাণী প্রেস

৩১নং বাছড় বাগান ষ্ট্রীট

কলিকাতা-২

মূল্য—দুই টাকা মাত্র

কল বন্ধ করুন ! কলটা একটু বন্ধ করুন না ! একটি পাঁচ বছরের বালিকা উপর হইতে বলিল ।

বার কয়েক চীৎকার করিতেই নীচে হইতে একজন গিয়া নীচেকার কলটা বন্ধ করিয়া দিল ।

নীচেকার কল বন্ধ না করিলে উপরের কলে ভাল ভাবে জল উঠে না ।

প্রত্যহ বহুবার করিয়া এমনি ধারা চীৎকার না করিলে ও পাশের ঘরের লোকেরা জল পায় না ।

শশধরের বোয়ের বিরক্তি ধরিয়া গিয়াছে । রোজ রোজ এ ভাবে চীৎকার করিয়া বলিতে তাহার ভাল লাগে না । টাকা দিয়া ঘর ভাড়া করিয়া জলের জন্ত এ চীৎকার করিতে করিতে তাহার যেন বিরক্তি ধরিয়াছে ।

শশধর দুইখানা ঘর ভাড়া করিয়া এ বাড়ীর ও পাশের অংশটি লইয়াছে । ভাড়া দিতে হয় আঠারো টাকা মাসে । সে ম্যাকমিলানে চাকরী করে । চারি-পাঁচটি ছেলে মেয়ে লইয়া এ বাড়ীতে সম্প্রতি আসিয়াছে । ঘর দুইখানি তাহার পছন্দ হইয়াছে কিন্তু জলকষ্টের জন্ত বোধ হয় তাহাদের ভাগ্যে আর বেশি দিন টিকিবে না । দক্ষিণ দিক খোলা, হু হু করিয়া বাতাস বহে সব সময় । রোজ থাকে অনেকক্ষণ । আলো বাতাসের অভাব নাই । এ কয়দিনে তাহার বাড়ীখানির উপর কেমন একটা যেন মায়ী বসিয়া গিয়াছে । তাহার এক বন্ধু এ বাড়ীর ও দিকের একখানি ঘর লইয়া বাস করে ।

শশধরের স্ত্রী বিরক্ত হইয়া শশধরকে অগত্যা বাসা দেখিতে জরুরী

তাগাদা দিতেছে। এ ভাবে তাহাদের থাকা সম্ভব নয়। জল না থাকিলে কলিকাতায় বা যেখানেই হউক বাসা করা চল না। সারা-ক্ষণ জল না হইলে কাহার চলে? সুতরাং এ জলকষ্ট আর সহ করা যায় না। বাড়ী ত্যাগ করিতেই হইবে।

বিজয়রত্ন শশধরের বন্ধু। তাহারই আগ্রহে শশধরকে এখানে আসিয়া বাসা করিতে হইয়াছে। অন্য সব কিছুই ভালো, অভাব যা কিছু তা এই জল।

শশীপদ বিজয়রত্নকে সমীহ করিয়া চলে এবং সেই সূত্রে শশধরের অভাব অভিযোগের প্রতি খর দৃষ্টি রাখে। কিন্তু হইলে কি হইবে, ও পাশের ভাড়াটিয়ারা অতশত বোঝে না। বিনোদবিহারী শশধরের নীচের অংশে দুইখানি ঘর লইয়া কিছুদিন হইতে বাস করিতেছে। বিনোদবিহারীর পিসিমার ছুঁচিবাই আছে। সব সময় সে কলতলায় বসিয়া থাকে একখানি গামছা পরিয়া প্রায় অর্দ্ধ উলঙ্গ অবস্থায়। সেদিকে কাহারও সহজে ঘেঁসিবার উপায় নাই। ফলে নীচের কল হইতে সব সময় জল পড়ে। কলের জল ছাড়া তাহার এক দণ্ডও চলে না। চৌবাচ্চার জল সে আদৌ ছোঁয় না। জিজ্ঞাসা করিলে বলে, ও জল শুদ্ধ নয়। সুতরাং তাহাকে সব সময় শুদ্ধ করিয়া রাখিতে গেলে কলের পড়ন্ত জল ছাড়া আর কিছুতেই হয় না। পিসিমা নীরদাসুন্দরী কদাকার। মোটা এবং থপথপে। জল ঝাঁটিয়া ঝাঁটিয়া তাহার হাতে পায়ে হাজা ধরিয়া গিয়াছে। কলের ঐ অংশ দিয়া কাহারও হাঁটিবার সহজে উপায় নাই। সীমানা সরহদ্দ করিয়া রাখিয়াছে এক ধারের কোণ হইতে আর এক ধারের চৌবাচ্চার শেষ প্রান্ত পর্য্যন্ত। বিনোদবিহারীর ছেলেমেয়েরা ও ধার দিয়া ঘেঁসে না। নিরীহ মায়ের অনুরোধে তাহাদের কতক সাস্থনা মেলে। কিন্তু দুর্জয়া পিসিমার দাপটে তাহাদের সে সাস্থনা শূণ্যে মিলাইয়া যায় ক্ষণে ক্ষণে। ননীবালা ক্ষীণকায়া। আচার-বিচারের ধার ধারে না। কেবল পিসিমার শাসনে তাহার মন বোঝার মত সায় দিয়া

যায়। পিসিমার নির্দেশ মত চলিলেও তাহার জানিতে বাকী নাই যে চতুরা ননীবালা আধুনিক পর্যায়ে মেরে। কেবল তাহাকে সমীহ করিয়া চলে, কিন্তু মনে মনে অতশত ছোঁয়াছুয়ির ধার ধারে না। নীরদাসুন্দরী মাঝে মাঝে প্রাণপণে চেষ্টায়, যাহা মুখে আসে গড় গড় করিয়া বলিয়া যায়।

ননীবালা সে কথায় কান দেয় না। হাসিয়া উড়াইয়া দেয়। ইহাতেও রক্ষা নাই তাহার। পিসিমার দাপট ও চীৎকারের শেষ নাই। ক্রমাগত তাহার তুর্ঘ্যানিনাদ চলিতেই থাকে।

বিজয়রত্নের বিরক্ত ধরিলে পিসিমাকে ধমক দেয়। কিন্তু সে কতক্ষণের জন্য। সকালের ঘণ্টা-দুয়েক এবং সন্ধ্যার পর সময় টুকুর মধ্যে তাহাকে সংসারের সব কিছু আনা-নেওয়া করিতে হয়। ভিতর-বাহির করিতেই তাহার সময় যায় বেশী। পিসিমা বিজয়রত্নকেই কেবল মধ্যে মধ্যে ভয় করিয়া চলে।

এই জলকষ্টের জন্য এবং বিশেষ করিয়া নীরদাসুন্দরীর অত্যাচারে শশধরের স্ত্রীর বিরক্তি ধরিয়া গিয়াছে। সে শশধরকে চব্বিশ ঘণ্টার নোটিশ দিয়া ঘর সংসারের যাবতীয় বাঁধাছাদায় মন দিয়াছে। আর না।

সন্ধ্যার পর শশধর অফিস হইতে আসিয়া স্ত্রীর কাণ্ড দেখিয়া অবাক হইয়া গিয়াছে। স্ত্রীকে জিজ্ঞাসা করিয়া জানিল, ইতিমধ্যে নীরদাসুন্দরীর সঙ্গে তাহার যে কলহ হইয়া গিয়াছে তাহার পর এ বাড়ীতে শত্রুর সঙ্গে বাস করা অসম্ভব।

নীরদাসুন্দরী তাহাকে অকথ্য কথা বলিয়াছে। তাহাদের নিজেদের বাড়ী না হইলেও ভাড়া দিয়া বাস করিতেছে। তাহাদের জলের প্রয়োজন না মিটাইয়া অন্তকে দেয় না এবং দিবেও না। এই বলিবার পর সে নীচে দাঁড়াইয়া তাহাকে গুনাইয়া গুনাইয়া যা-তা বলিয়া চলিয়াছে। কাহারও নিষেধ শুনে নাই এবং শুনিবে না তাহারও নির্দেশ প্রকাশ্যে দিয়াছে। এ হেন লোকের সংশ্রবে তাহারাই

বা থাকিবে কিরূপে। আত্মসম্ভ্রম বজায় রাখিতে কেঁ না চায়। ভাড়া বাড়াতে থাকিতে গেলে কি এই সবও সহিতে হইবে।

পরদিন রবিবার। শশধর মোট পৌটলা বাঁধিয়া রওনা হইল বিকালের দিকে। সকালে বিবেকানন্দ রোডের এক ফ্লাটে অল্প ভাড়ায় ঘরের ব্যবস্থা করিয়া লইতে তাহাকে বিশেষ বেগ পাইতে হইল না। সেদিন ইংরাজী মাসের পনেরোই তারিখ। পনেরো দিনের নোটিশ দেওয়ার প্রথা শশীপদ করিয়াছে। শশীপদ এই বাড়ীখানি লিজ লইয়া বহু ক্ষুদ্র অংশে ভাগ করিয়া ইহার বিলি ব্যবস্থা করিয়া দিয়াছে। এ জন্ম তাহার বেশ লাভ হয়। এই রকম ব্যবসা করিয়া কলিকাতায় বহু লোক আরামে বাস করিয়া, কর্তৃত্ব করিয়া, বাড়ীওয়ালার সাজিয়া, কিছু কিছু অর্থাগমেরও ব্যবস্থা করিয়া আসিতেছে।

শশধর দুপুরের দিকে তাহার কাছে গিয়া জানাইয়া আসিয়াছে, আজ তাহারা অশ্রুত যাইতেছে, যেহেতু তাহার দ্বারা কোন প্রতিকারের ব্যবস্থা হইল না। এতবার বলিয়াও শশীপদ বিজয়রত্নের পিসিমাকে শাসন করিতে পারে নাই। ভাড়াটেরা সবই এক শ্রেণীর। সকলের সুখ সুবিধা না দেখিলে সে বাড়ীওয়ালার অখ্যাতি বাড়িবে বই কমিবে না। এই অব্যবস্থার জন্ম তাহারা আজই অশ্রু বাসায় যাইবে এ বাসা ছাড়িয়া। পনেরো দিনের নোটিশ দেওয়ার প্রথা আছে সেজন্ম তাহারা পনেরো দিনের ভাড়া দিতে প্রস্তুত। কিন্তু এই হতচ্ছাড়া বাড়ীতে ও রকম শত্রুর সঙ্গে থাকিতে নারাজ।

শশীপদ চুপ করিয়া রইল। তাহার শ্যালক বিজয়রত্নের বন্ধু বলিয়া শশধরের কথায় তাহার লজ্জা হইল। শশীপদ বিশেষ কিছুই করিতে পারিল না যাহাতে শশধরের এ বাড়ীতে থাকার সুবিধা হয়। সুতরাং তাহার উপর চাপ দিয়া পনেরো দিনের ভাড়া আদায় করিতে সঙ্কোচ বোধ হইল। মাথা নীচু করিয়া শশীপদ কেবল গোঁ গোঁ করিতে লাগিল। বিশেষ কিছু আর বলিতে পারিল না।

একখানা ঠেলাগাড়ীতে মোট-পৌটলা উঠিয়াছে। কতকগুলি বাস্ত্র পর পর পাশাপাশি করিয়া বসান হইয়াছে। তাহার উপর বিছানার দুইটি বড় বাস্ত্র ও একটি ছোট বাস্ত্র দড়ি দিয়া বাঁধিয়া তাহার উপর পড়িয়াছে। উপরে বাসনের একটি বস্তা, কাঠের ছোট ছোট সরঞ্জাম টুল, চেয়ার, আলনা, র্যাক, মোড়া ইত্যাদি। দুইখানি চৌকী মুটের মাথায় চাপাইয়া দিয়া একখানি ঘোড়ার গাড়ীতে চড়িয়া সপরিবারে শশধর রওনা হইল।

যাইবার সময় কোণের দিককার ঘরের সরোজের স্ত্রীর সহিত দেখা করিয়া তাহাকে বিদায় সম্ভাষণ জানাইয়া আসিয়াছে মলিনা। অপরাজিতাকেও শশধরের স্ত্রী মলিনা খুবই ভালবাসে। অপরাজিতা বার বার বলিয়া যাইতেছিল, অন্ততঃ তাহার জন্মও যেন মাঝে মাঝে সে এ বাড়ীতে আসিয়া দেখা করে। শুধু মধ্যে মধ্যে মনের কথা বলিবার সঙ্গী সে পাইবে। সেও মধ্যে মধ্যে তাহার কাছে যাইবে। ছপুরের দিকে তাহার সময় বেশী, কাজেই যত বেশী সম্ভব সে যাইবার চেষ্টা করিবে। আর বিবেকানন্দ রোডের বাসা বেশী দূর নয় যখন, তখন যাইবার অনুবিধা কিসের ?

মলিনারা চলিয়া গেল। অপরাজিতা ছল ছল চোখে এক দৃষ্টে তাহাদের বিদায় যাত্রা দেখিতেছিল। মলিনার ছোট ছেলেটি বার বার অপরাজিতাকে তাহাদের সঙ্গে যাইবার জন্ম তাহার কনক চাঁপা আঙ্গুল লইয়া ইশারায় ডাকিতেছিল। দুই একবার চেষ্টা করিতেছিল গাড়ী হইতে নামিয়া গিয়া অপু খুড়িমাকে ধরিয়া আনে। সে যখন তাহাদের জন্ম কঁাদিতেছে তখন নিশ্চয়ই অঘোর খুড়ো খুড়িমাকে যাইতে দিবেন। অঘোর খুড়োর এই অন্যায় শাসন সে সহ্য করিবে না। তাহার সকলে চলিয়া যাইতেছে যখন, তখন একা অপু খুড়িমা এই বাড়ীতে কেমন করিয়া কাটাইবে। অপু খুড়িমা তাহাকে খুবই ভালোবাসে। সেও অপু খুড়িমাকে ভালোবাসে। তাহার জন্ম অপু খুড়িমা কঁাদিতেছে। এই সব ভাবিতে ভাবিতে প্রণব দিশাহারা হইয়া গেল।

একবার মাকে বলে, একবার বাবাকে বলে, একবার তাহার বড় দাদাকে বলে, কিন্তু অবুঝ এবং মায়াশেষহীন কেহই তাহার কথার ভাষা, ভাবের ইঙ্গিত এবং অশ্রুপূর্ণ কাতর চোখের চাহনি লক্ষ্য করিল না।

প্রণবের বড়ই দুঃখ হইল, সে একবার প্রাণপণ শক্তিতে মাকে জড়াইয়া ধরিয়া বুঝাইতে চেষ্টা করিল। মায়ের মনে করুণা জাগিয়া উঠিল। বলিল, অপু, তোমার জন্মে প্রণব বড় কাঁদছে, তুমি মধ্যে মধ্যে যেও, তোমাকে ও বড় ভালবাসে। দেখ না তোমার কাছে যাবার জন্মে ও কেমন আকুলি ব্যাকুলি করছে।

দিদি আমি কাল যাব। বাসার নম্বরটা কত? ১৩ নং—না? আচ্ছা নিশ্চয়ই যাব দেখবেন।

বেশ। যেও।

শশধরের ইঙ্গিতে কোচম্যান গাড়ী হাঁকাইয়া দিল। গাড়ী চলিতে শুরু করিয়াছে। প্রণব চলন্ত গাড়ীর ভিতরে মায়ের কোলে দাপাদাপি শুরু করিয়া দিয়াছে। তাহার বড় ভাই দীপক প্রণবকে ছুই ধমক দিতেই তাহার কান্না সপ্তমে উঠিল। মায়ের কোলের ভিতর দাপাদাপি করিয়া চীৎকার করিতে লাগিল। অপরাজিতার কাছে যাইবার জন্ম সে ব্যাকুল হইয়া উঠিল।

অপরাজিতার চোখ ছিল ছিল করিয়া উঠিল। নির্বাক বিন্ময়ে বালকের ব্যাকুলতা দেখিতে লাগিল। মাত্র চারি বছরের শিশু, মাস ছয়েকের মধ্যে তাহার হৃদয় এমন ভাবে জয় করিতে পারিবে তাহা সে ভাবে নাই। বাসাবাড়ীর আকর্ষণও কম নয়। এই হট্ট-মন্দিরে একদল আসে। একদল যায়। বাসা-বদলের সঙ্গে সঙ্গে আর একদল আসিয়া তাহার স্থান পূরণ করিয়া ফেলে। ঘর আর খালি থাকে না। অন্ততঃ বাড়ীওয়ালার চেষ্টায় তাহার ঘর খালি থাকিবার উপায় নাই।

এ যেন মায়ামুকুরের স্থান। এখানেও যাহারা আসে পৃথক পৃথক স্থান হইতে, তাহাদের মধ্যেও অল্প কয়েকদিনের জন্ম মায়ার

বন্ধন বাঁধিয়া উঠে। সকলেই জানে ইহা তাহাদের বাসাবাড়ী। সুযোগ ও সুবিধা পাইলেই তাহারা অশ্রু বাসা ছাড়িয়া যাইতে কালবিলম্ব করে না। তবু যে কয়দিন তাহারা একত্রে পাশাপাশি ঘরে থাকে তাহারই মধ্যে মনের মিল কোথা হইতে যেন আসিয়া দেখা দেয়, তাহা কেবল স্বার্থের অজুহাতে। এবং ইহাদের মাত্রা ছাড়াইলে একদল সরিয়া পড়ে।

বাসাবদলের ঘটনা অপরাজিতার পক্ষে নুতন নয়। শশধরেরও ইহা প্রথম বাসাবদল নয়। এবং তাহাদেরও ইহা প্রথম বিচ্ছেদ ব্যথা নয়। তবু তাহার মনের ভিতরটা কেমন যেন ছ্যাং ছ্যাং করিতে লাগিল। দীপক এবং বিশেষ করিয়া প্রণব তাহার অন্তর জয় করিয়া লইয়াছে। এই অল্প কয়েকদিনের মেলামেশায় একরত্তি বালক তাহাকে যেন আপন করিয়া তুলিয়াছে।

উপরের দিকে একবার দৃষ্টি পড়িতেই অপরাজিতা দেখিল কয়েকজন উপর হইতে শশধরের সপরিবারে বাসাবদলের দৃশ্য দেখিতেছে। কিন্তু তাহারা এমন জায়গায় দাঁড়াইয়া দেখিতেছিল যাহাতে মলিনার বা তাহাদের কাহারও দৃষ্টি সহজে সেদিকে না পড়ে। ঘোড়ার গাড়ীর আবরণের ভিতর হইতে বিশেষ ভাবে লক্ষ্য না করিলে উপরের দিকে নজর পড়ার উপায় নাই।

অপরাজিতা একদৃষ্টে তাকাইয়াছিল সেই চলন্ত এবং অন্তর্হিতপ্রায় ঘোড়ার গাড়ীর দিকে।

রবিবারের দুপুরের দিকে সকলেই নিজ নিজ ঘরে বসিয়া নিশ্চিন্তে বিশ্রাম করিতেছিল। একটু মদির নেশায় যেন বাড়ীখানা বিমাইতেছিল। শশধরের চলিয়া যাওয়ার সংবাদ প্রচার হওয়ার সঙ্গে সঙ্গে বাড়ীখানিতে একটা অবসাদ ও বিষ্ময়ের পটভূমিকার সৃষ্টি হইল। অপরাজিতা উপরে যাইতেই তাহার পাশের ঘরের এক বধু বাহির হইয়া আসিয়া



দরজার সামনে দাঁড়াইল। অপরাজিতা আশে আস্তে বলিল, মলিনাদিরা চলে গেল।

ষোড়শী একটা দীর্ঘনিঃশ্বাস ত্যাগ করিয়া বলিল, চলে গেলেন। তারপর আর কোন কথা বলিতে পারিল না।

অপরাজিতার মন ভাল নাই। তাহারাও যখন একদিন এমনি ভাবে সিমলা ষ্ট্রীটের বাসা-বদল করিয়া চলিয়া আসে তখনও তাহার পাশের ঘরের নববধূটি তাহার জ্ঞাত অব্যক্ত বেদনায় কাঁদিতেছিল। অপরাজিতা তাহাকে অনেক করিয়া বুঝাইয়াছিল। তাহাদের এই বাসা-বদলের ঘটনা নূতন নয়। কোথাও বা আঘাত দিয়া আসিতে হয়। কোথাও বা আঘাত খাইয়া আসিতে হয়। এই যে আঘাত দেওয়া নেওয়ার সমস্তা ইহা কেবল বাসাবাড়ীতেই ঘটে বেশী তাহা নয়। প্রতিনিয়ত নিত্যনৈমিত্তিক ঘটনার মধ্যে সাধারণত চোখে পড়ে।

অপরাজিতা আর একবার লক্ষ্য করিয়া দেখিল, মলিনাদিরা কি সত্যি চলিয়া গেল। ঘোড়া দুইটি এবং কোচম্যান কি কোনমতে আরও কিছুক্ষণ অপেক্ষা করিতে পারিত না। কোচম্যানের আর কি! তাহারা যত শীঘ্র খেপ দিতে পারে ততই তাহাদের ভাড়া বেশী জোটে। তাহারা পর-মানুষ, ব্যবসাদার। অশ্রুর দরদ বুঝিবে কেন? আর দরকারই বা কি তাহাদের। দাঁড়াইয়া রেলিঙয়ে ভর দিয়া ভাবিতে লাগিল এই কথা।

অপরাজিতা একবার মলিনাদির ঘরে গেল। ঘর দুইখানা খোলা রহিয়াছে। ঘরের জিনিসপত্র কিছুই আর নাই। কেবল কতকগুলি জিনিসের আবরণ এ ধারে ও ধারে পড়িয়া রহিয়াছে। ঘর দুইখানি যেন খাঁ খাঁ করিতেছে। একটা বিরাট শূণ্যতা কেবল বিরাজ করিতেছে। ভিতরে ঢুকিতেই তাহার প্রাণটা যেন ছ ছ করিয়া উঠিল। কালকের ঘর এবং আজকের ঘরের মধ্যে যেন আকাশ পাতাল তফাৎ। কাল যাহা শ্রীসম্পন্ন এবং একটি নারীর চারুহস্তের পরিপাটি সাজান ছিল

আজ তাহার কিছুই নাই। একটা বিরাট ধ্বংসের অগোছাল ভাব নানা দিক দিয়া চোখে পড়ে। যতই অপরাজিতা দেখিতে থাকে ততই যেন তাহার মনের ভিতরটা বেদনার আঘাতে মোচড় দিয়া উঠিতে থাকে। ঘরের ভিতর ঢুকিয়া পা দিয়া ইতস্ততঃ বিক্ষিপ্ত অব্যবহার্য্য জিনিসগুলি ছড়াইয়া দেখিতে দেখিতে তাহার চোখে পড়িল একটি ছোট মোমের পুতুল। তাহার বাঁ হাতটি ভাঙ্গা। মাথার একাংশে দাগ বসান। তাহার মনে পড়িল এই পুতুলটি লইয়া প্রণব খেলা করিত। এই পুতুলটি আদর করিয়া সেই একদিন কিনিয়া দিয়াছিল এক ফেরিওয়ালীর কাছ হইতে। একদিন মাথার কাঁটা, সেক্টিপিন এবং টেপা বোতাম কিনিতে একজন ফেরিওয়ালীকে সে ডাকে। এবং যখন এইগুলি কিনিতেছিল প্রণব কোথা হইতে আসিয়া ফেরিওয়ালীর ডালা হইতে এই মোমের পুতুলটি সে হস্তগত করিয়া বসে। এবং একরূপ জোর করিয়াই সে তাহার দখল বজায় রাখিয়াছিল। তখন অগত্যা অপরাজিতাকে সেটি কিনিয়া দিতে হয়। পুতুলটি ভাঙ্গা বলিয়া হয়ত তাহারা লইয়া যায় নাই। কিংবা প্রণবের আর এখন আগ্রহ নাই সে জিনিসটির উপর। তাই পৌঁটলার মধ্যে ইহার স্থান হয় নাই। এমনই হয়।

অপরাজিতা পুতুলটিকে তুলিয়া নাড়িয়া চাড়িয়া দেখিতে লাগিল। এ দিকে ও দিকে আর বিশেষ কিছুই তাহার চোখে পড়িল না। একটা অব্যবহার্য্য স্তূপের মধ্যে এবং ছন্নছাড়া আবহাওয়ার মধ্যে তাহার দাঁড়াইয়া থাকিতে ভাল লাগিল না। তড়িৎবেগে সে সেখান হইতে সরিয়া গেল।

শীপদ কি একটা কাজে বাহির হইয়া গিয়াছিল। ভিতরে ঢুকিবামাত্র তাহার স্ত্রী প্রশ্ন করিল, প্রণবের মা'রা যে চলে গেল, ওরা তো নোটিশ না দিয়েই চলে গেল। পনেরো দিনের ভাড়া নিয়েছে তো ?

না না, সেটা আর পারা গেল না।

সে কি রকম ধারা কথা হল? আইন মাফিক ত চলতে হবে। আজ ওরা চলে গেল না বলে। কাল অগ্নি লোকেরাও ত ছুট করে চলে যেতে পারে। ওঠ, বললেই চলে, এ কি রকম ধারা! এমনি একটা বেআইনের মত যা তা করে চলতে গেলে তবেই তোমার বাড়ীভাড়া চলবে। এতে বুড়োর বাড়ী ভাড়া হবে কি করে মাসে মাসে? অ্যা? বল না গো?

আচ্ছা আচ্ছা, বলিয়া শশীপদ পাশ কাটাইয়া যাইবার চেষ্টা করিতেই তাহার স্ত্রী কটাক্ষপাত করিয়া বলিল, আচ্ছা, আচ্ছা নয়। এখন তুমি তার কাছে গিয়ে পনেরো দিনের ভাড়া আদায় কর। না পারলে চলবে না। এ রকম ধারা যদি কর তাহলে আমি আর এর ভেতর নাই। যা খুশী তাই কর।

তোমাকে এর জন্তে ভাবতে হবে না। বলিয়া শশীপদ মাথা চুলকাইতে লাগিলেন। কিন্তু তাঁহার স্ত্রী সহজে ছাড়িবার পাত্রী নয়। বলিল, ওতো তোমার মুখে লেগেই আছে। কোণের ঘরের পদ্মর মায়ের ঘরভাড়া চারমাস বাকী পড়েছিল। কি করে যে তার টাকা আদায় করলাম সে তো আর জান না; বুঝবেই বা কি করে? তাছাড়া বাইরের দোকান দুটোও বেশ বিনাভাড়ায় দু'দুটো মাস কাটাল। তাও লোক পাঠিয়ে গালাগালি দিয়ে আদায় করেছে। সে সব খবর তো তুমি রাখবে না। কিসে ভাড়া আদায় হয়, কিসে দুপয়সা বেশী আসে তার ব্যবস্থা করতে গেলে ওসব নোটিশ ফোটিশ দেওয়ার দরকার। চল বললেই উঠব সে সব করতে দিলে চলবে কেন? বুঝলে? যাও এখন গিয়ে ওটার একটা ব্যবস্থা করে এস।

আচ্ছা, বিজয়কে বলে ওটার ব্যবস্থা করছি।

বেশ তাই কর। তুমি না পার ত আমি নিজেই একটা ব্যবস্থা করছি এর।

না না, তোমাকে আর এ নিয়ে কিছু করতে হবে না।

তবে তুমি ব্যবস্থা কর। তুমি পারলে আর আমার ওতে নজর দেওয়ার দরকার কি ?

কিন্তু দেখো নীরো পিসিমার ছুঁচিবাই আর জল কমানোর ব্যবস্থা না করলে ও দিকের ঘরে আর কোন ভাড়াটে থাকবে না।

আচ্ছা সে হবে। নীরো পিসিমার রকম সকম ঐভাবেই সে কথা ত আজকের অজানা নাই। বিধবা হবার পর হতেই ওঁর ঐ রকম ধারা ঢুকেছে। সে তুমি যতই বল না কেন ওর আর পরিবর্তন নাই। যারা আসবে তাদিকে রয়ে সয়েই নিতে হবে। বলিয়া উষাঙ্গিনী গজ গজ করিতে করিতে নিজের কাজে চলিয়া গেল।

শশীপদ একদৃষ্টে তাহার গতিভঙ্গি দেখিতে লাগিল। রুম্ম এবং উর্বর টাকে হাত বুলাইতে বুলাইতে তাহার মনে কেবলই তাহার পিসশাশুড়ি নীরদাসুন্দরীর থপথপে চেহারা, গামছার আবরণে নগ্ন অবয়বের রূপ-বৈচিত্র্য এবং ছুঁৎমার্গের কর্কশ ও উচ্চাঙ্গের ধ্বনি ভাসিয়া উঠিল।

খানিকক্ষণ দাঁড়াইয়া থাকিয়া সে নিজের কাজে ভিতরে চলিয়া গেল। যে রকম উৎসাহ লইয়া শশীপদ ভিতরে ঢুকিতেছিল, আর সে উৎসাহ তাহার রহিল না।

পরদিনই শশীপদ ঘর ভাড়ার নোটিশ বুলাইয়া দিল সদর দরজার সামনে।

ফল অচিরেই ফলিয়া গেল। দুই একখানা ঘরের ভাড়াটে প্রায়ই জুটিয়া যায়। কলিকাতার মত সহরে বেশীর ভাগ লোক দুই-একখানা ঘর ভাড়া করিয়া বাস করে। ইহার জন্য বাড়ীওয়ালাকে বেশীদিন ধরিয়া ঘর খালি রাখিতে হয় না। এবং ভাড়াটেদেরও দুই একখানি ঘর খুঁজিয়া বাহির করিতে বিশেষ বেগ পাইতে হয় না।

চলমান জীবন। বিচিত্র গতিভঙ্গি এই শ্রেণীর মানুষের।

দিন তিনেক পরে নূতন একঘর ভাড়াটে আসিয়া জুটিল ও দিকের ঘরে। শশধরের পরিত্যক্ত অংশে।

মস্ত বড় বাড়ী। খোপের মত নানা ঘরে নানা ভাড়াটে সব বাস করিতেছে। খোপ খোপ পায়রা পরিবার যেন।

এমনি একঘর ভাড়াটে আসিয়া জুটিয়াছে। কথা উঠিয়াছে তাহাদের লইয়া। ভালমাসি অপরাজিতাকে ফিস ফিস করিয়া লাগাইয়া চলিয়াছে। গুঞ্জনও তুলিয়াছে সারা বাড়ীময়।

দরজার আড়াআড়ি জানালা। ভালমাসি আসিয়া দাঁড়াইল জানালার ধারে।

কথা উঠিয়াছে নিজেদের মধ্যে।

সীতা বলিতেছে, আর না। দুদিনেই প্রাণ হাঁকিয়ে উঠেছে। এ ভাবে থাকার চেয়ে মরাই ভাল। কেন মরতে নিয়ে এলে আমাকে। কেনই বা এলাম পালিয়ে তোমার সঙ্গে।

ফিস ফিস করিয়া বলিতেছে ললিত, চুপ, আস্তে কথা বল। লোক কানাকানি হয়ে যাবে। জানাজানি হলেই সর্বনাশ। 'ধরা' পড়ে যাব নির্ঘাত।

কেন? আমরা কি এই নতুন পালিয়ে এসেছি। কত ছেলেমেয়ে বাপ-মাকে লুকিয়ে পালিয়ে আসে। কেউ উধাও হয়। কেউ ধরা পড়ে যায়। আমি ও সব গেরাছই করি না। বাপ-মাকে ভয় করি না তো এদের।

ললিত বলিল, কেন, অসুবিধা কি হচ্ছে তোমার! বেশ তো আছি দুজনে নিভতে; বেশ তো চলছে আমাদের।

যা আমাদের কপাল! তোমাদের ভাল লাগে এ সব। আমার মত ঘরে বন্দী থাকলে বুঝতে। এই ঘর, এই সব। কোথায় বা যাব।

বের হওয়ার পথ তো রাখনি ।। রাস্তায় যদি দেখা হয় কারও সঙ্গে তো ধরে নিয়ে যাবে । এভাবে গোপন বাস আর কদিন করলে মরে যাব জানবে । নাঃ, এ আর ভাল লাগে না আমার । সীতা আর্ন্তনাদ করিয়া উঠিল ।

কেন, এতসব লোক বাস করছে । এই এত বড় বাড়ীর এত সব ভাড়াটে আছে । এমনি ঘর সব তাদের । কই তারা তো তোমার মত হাঁফিয়ে ওঠে না । বেশ তো আরামে আছে । তবে—বলিয়া ললিত কটাক্ষপাত করিল সীতার প্রতি ।

নাঃ. এভাবে তোমার সঙ্গে পালিয়ে আসা আমার উচিত হয়নি । তোমরা বেটা ছেলে, তোমাদের সব সাজে । আমরা মেয়ে মানুষ । নেহাৎ বেহায়ার মত পালিয়ে আসা অন্ধ্যায় । খুব শিক্ষা পেয়ে গেলাম তোমার পাল্লায় পড়ে । এমন লোভ দেখাতে পার তুমি । এমন মন ভোলাতে পার তোমরা । পুরুষ মানুষ মেয়েদের নিয়ে কি যে ছিনিমিনি খেলে তা বলা যায় না । মরে এতে মেয়েরাই । পুরুষরা সাধু সেজে বসে আর মেয়েরা তখন লোকলজ্জার মাথা খেয়ে মরে । মরণ আর কি ! সীতা রেগে আগুন হয় ।

ভালমাসি সরিয়া দাঁড়াইল ও ধারে । তাহার চোখ তখন কৌতূহলের অঞ্জন পরিয়া নাচিতেছে । সোজা চলিয়া গেল অপরাজিতার ঘরে । ফিস ফিস করিয়া বলিল, যা ভেবেছি ।ক তাই । শুনবে এস । ভালবাসার যবনিকা পতন হচ্ছে ।

অপরাজিতা হাসিয়া বলিল, ও আর একটা নাটক দেখে কৌতূহল বাড়িয়ে লাভ কি ! ঘরে ঘরে এই সবই চলছে । চলে আসছে । ভালবাসার খেলা নিয়েই তো মরেছে সবাই । ও আর নতুন কি দেখছি মাসি ।

ভালমাসি বলিল, মজা ভাল হয়েছে । ছোঁড়াটা ছুঁড়িকে নিয়ে বাড়ী থেকে, গাঁ থেকে সরে পড়েছে । উঠনি তো ওঠ এই বাড়ীর এই ঘরে । ছুঁড়িটা এখন পস্তাচ্ছে । কত কথা বলছে শুনবে তো এস ।

অপরাজিতার ইচ্ছা নাই এ সব কথায় কান দেয়। কিন্তু ভালমাসির আগ্রহের মাত্রা ছাড়াইয়া উঠিয়াছে। তাহাকে জানালার কাছে টানিয়া লইয়া আসিল জোর করিয়া।

হুইজনে গায়ে গা দিয়া দাঁড়াইয়াছে। যেন চোর ধরিবার জন্ত তৈরী। নিঃশ্বাস বন্ধ করিয়া একমনে কান খাড়া করিয়া শুনিতেছে।

দুপুর বেলা। ছেলেরা অফিসে স্কুলে। মেয়েরা ঘরে ঘরে শুইয়া বসিয়া গল্প করিয়া বিশ্রাম করিতেছে। আরাম ভোগ করিতেছে। কিন্তু ইহাদের এইভাবে জানালার কাছে দাঁড়াইয়া আড়ি পাতা অন্তে দাঁখলে কি ভাবিবে।

কথা হইতেছে সীতা আর বলিতের মধ্যে।

তবে খবর দাও আমরা এখানে আছি। ফিস ফিস করিয়া বলিল বলিল।

সর্বনাশ, খেয়ে ফেলবে আমাদের। ধরে বেঁধে নিয়ে গিয়ে ঘরে বন্দী করে রাখবে। পাঁচ কান ভরিয়ে দেবে সৎমা তোমার। লোক-লজ্জার সীমা পরিসীমা থাকবে না আর। বলিয়া উঠিল সীতা। তারপর ফিসফিস করিয়া বলিল, পালিয়ে যেমন এসেছি তেমনি পালিয়েই বেড়াতে হবে যতদিন পারি। কি আর করব। তোমার পাল্লায় যখন পড়েছি তখন আমার আর বাকী কিছু থাকবে না।

আর আমার। ফল ভোগ দুজনকেই সমান ভাবে পেতে হবে। বাদ কেউ যাবে না। ছাড়া কেউ পাবে কি? হতাশ হইয়া বলিল বলিল।

অপরাজিতা কাঠ হইয়া শুনিতেছে। ভালমাসি তাহার গা টিপিয়া বলিল, শুনলে কথা সব এদের। যা ভেবেছি ঠিক নয় কি? অনুমান মিথ্যা হয় নি। হবেও না।

সীতা বলিল, যা হয় হোক। এখানেই থাকব। তবু শান্তিতে আছি। গঞ্জনা, কানাকানি, ফিসফিসানির ধার ধারিনে। তুমি আর আমি। আমরা এমনভাবেই একান্তে থাকতে চাই। যে যা বলে

বলুক। আমরা সুখে থাকলেই ছুনিয়া। লোকের তাতে কি! কার ধার ধারি! বল?

ভালমাসি রাগিয়া উঠিল, বলিল, দাঁড়া মজা দেখাচ্ছি। কাল পুলিশে খবর দিয়ে সুখের সীমা রাখব না। পালিয়ে আসা বের করাচ্ছি।

অপরাজিতা হাসিয়া বলিল, নতুন প্রেমে পড়ার ফাঁদ সৃষ্টি কেন কর মাসি? ঘরে বনেনি। বন আশ্রয় করেছে। সেখানে বাধা দাও কেন? থাকুক না ওরা। এস এস আমরা চলি। সব বুঝে ফেলেছি আমরা। কিন্তু বাধা আর দিও না মাসি। থাকুক ওরা অমনি।

ভালমাসি রাগ করিয়া ছুম ছুম করিয়া ছুই পা আগাইয়া গিয়া। বলিয়া উঠিল, মজা দেখাচ্ছি। বনে বাস করা বের করাচ্ছি। পড়েছ আমার পাল্লায়, সহজে ছাড়ছি না।

অপরাজিতা বলিল, এক কাজ কর মাসি। বিকালের দিকে যেও ওদের ঘরে। উসকিয়ে উসকিয়ে সব কথা জেনে নিও তো!

ও আমার কপাল! তাও কি করিনি! সন্দেহ কদিন থেকেই হয়েছে। প্রথম দেখায় সন্দেহ জন্মে। তখন থেকেই ঘুর ঘুর করেছি ওদের মধ্যে কঁতবার। মেয়েটি এমন খড়িবাজ যে কথাই বলে না। কেবল চাল মারে। জানে না যে কার পাল্লায় এরা পড়েছে। দেখাচ্ছি মজাখানা কালকেই।

অপরাজিতা হাত দুইটি ধরিয়া বলিল, মাপ কর মাসি। ওদের আর কিছু করো না। যা করে করুক। কেন পরের ভাতে কাঠি দিচ্ছ। ওরা যেমন পালিয়ে এসে এখানে উঠেছে। গোপন ঘর-সংসার করেছে। করুক না আমাদের কি তাতে?

অপরাজিতা ভালমাসিকে টানিতে টানিতে আনিয়া নিজের ঘরে আসিল। ইজিচেয়ারে বসাইয়া ভালমাসির পায়ের নীচে বসিয়া পায়ে হাত দিয়া বলিতে লাগিল, দোহাই মাসি, এ নিয়ে আর ঘোঁট পাকিও না। ঘর ভেঙে না। বহু কষ্টে ওরা যদি বা বাসা পেল, তার কুটো



সরিয়ে কাঁক করে দিও না আর। তাহলে আবার উড়বে এখান থেকে।  
বাসা-ছাড়া করা মহা পাপ, তা জানো না মাসি।

পাপ! এ কাজে পাপ হয় না। পাপী ওরা। পাপ কাজ ওরা  
করে বেড়াচ্ছে। সংসার সমাজ সব ওদের জগ্গে নষ্ট হয়। ওরা শাস্তি  
না পেলে ওদের দেখে আরও অশ্রু ছেলেমেয়েরা ও কাজ করে বেড়াবে।  
বাধা দিতেই হবে! দোব। দোব।

তবে দাও গে! আমি আর এর মধ্যে নেই। যা পার কর।  
তবে বলছি এ কাজ করে ফল ভাল পাবে না। বৃথা পরিশ্রম।  
পাঁক ঘাঁটলে নিজের গায়েই পাঁক ছিটকে পড়বে। ওরা যত পারুক  
অত্যাচার করুক আমাদের তাতে কি! অপরাধিতা ভালমাসিকে শাস্ত  
করিবার চেষ্টা করিতে লাগিল।

অনেকক্ষণ পরে ভালমাসি অপরাধিতার ঘর হইতে উঠিয়া পড়িল,  
কাজ আছে, সারিগে কাজ। যাই, উঠি মা! বলিয়া ভালমাসি সেখান  
হইতে উঠিয়া পড়িল।

নিজের ঘরে গেল না। আবার আসিয়া সেই জানালার কাছে  
আড়ি পাতিয়া দাঁড়াইয়াছে। কথা শুনিতেছে সীতা আর ললিতের।  
মনে হইল, দরজা জানালা বন্ধ করিয়া বিছানায় শুইয়া তাহারা দুইজনে  
একান্তে বলিয়া চলিয়াছে—

কাটুক যদিদি পারি এমনভাবে। তারপর যা ঘটে ঘটুক। সীতা  
ললিতের গায়ে হাত দিয়া বলিতেছে, বেশ লাগছে কিন্তু। কেমন  
নিরিবিলি। বাধা দেবার কেউ নাই। আড়ি পাতারও লোক নাই।  
আমরা দুজনে বেশ আছি।

ললিত উত্তর দিল, তা আর বলতে, তুমি আর আমি। এখানে কেউ  
নাই। বাধা কিসের। দুজনের মধ্যে কোন আগল নাই। একেবারে  
আমরা যেন এক সঙ্গে মিলে আছি। একান্ত হয়ে। যে যা পারে  
করুক না। লজ্জা ঘেন্নায় কান দিলে তো। ও সব গেরাছই করি না।

সীতা খিল খিল করিয়া হাসিয়া উঠিল।

ভালোমাসি সরিয়া পড়িল সেখান হইতে। রাগে তাহার সর্ব শরীর রি রি করিতেছিল। বলিতে বলিতে গেল, দেখাচ্ছি মজাখানা। প্রেম করার জায়গা পাওনি। হাতে দড়ি দিচ্ছি। কোমরে দড়ি বেঁধে কাল সকালে থানায় না পাঠিয়ে আর ছাড়ছি না। তখন বুঝবে পালিয়ে আসার ফল। এখন খুব পিরিত করছ। কর।

ভালমাসি সোজা গেল নীরদামুন্দরীর কাছে। তাহাকে সব কথা বলিয়া বসিল।

নীরদামুন্দরী তো অবাক ! এমন কাণ্ড তাহার বাড়ীতে ঘটতেছে। এমন ভাড়াটেকে আশ্রয় দিয়াছে তাহারা। এমন পাপ ঢুকিয়াছে এই বাড়ীতে। আচ্ছা, আশুক শশীপদ।

যা হয় একটা বিহিত কর তোমরা। আমি চলি। তোমাদের বাড়ী, তোমাদের আশ্রয়ে আমরা আছি। কোন অঘটন ঘটলে তার বিহিত তোমরা করবে না তো কে করবে। এ সব অনাচার অসহনীয়। প্রতিবিধান কর। তাড়াও ওদের। ওসব কলঙ্কী চাঁদের মুখ দেখতে নাই।

আচ্ছা, কথা দিলাম এদের বিহিত করবই আমি। শশীপদ আশুক না সন্ধ্যায়। থানায় খবর পাঠাচ্ছি। ধরে তো নিয়ে যাক ওদের।

সারা বাড়ীময় গুঞ্জন উঠিয়াছে এই ভাড়াটেকে লইয়া। সকলের মুখেই সীতা-ললিতের কথা। ঘরছাড়া ঘরভাঙ্গা এই দুইটি যুবক যুবতীর কথা।

ক্রমে ক্রমে যতই সীতা আর ললিতের কানে কথাটা ঘোরালো হইয়া বেসুরা হইয়া উঠিতেছে ততই তাহারা যেন মরিয়া হইয়া চোখ রাঙ্গাইয়া শাসাইয়া বেড়াইতেছে, কিসের ভয়, কার ভয়ে চলব। ভাড়া দোব, বাস করব। চোর না বদমাইস। পালিয়ে এসেছি, বেশ করেছি। বল না যাকে খুসী, কি করতে পারবে তারা।

ঘরে সীতা আর ললিতের মধ্যে হাসির ছটা উঠিয়াছে।

বেশ কাণ্ড ! লোকে কি ভাবিতে শুরু করিয়াছে। তাহারাইহাদের কাছে কি রূপে ধরা পড়িয়াছে।

সীতা শাসাইয়া উঠিল, আমাকে নিয়ে পালিয়ে এসেছে এই তো কথা ! না হয় লোকে বলুক, তোমাকে নিয়ে আমি পালিয়ে এসেছি। তা বেশ করেছি। এমন কত ছেলে-মেয়ে ঘর ছেড়ে পালিয়ে এসেছে, আসছেও। তার কি হচ্ছে। আমাদের ভাল লেগেছে যা তাই করেছি। কি হবে তাতে ? এর মধ্যেই আমাকে দেখে মেয়েরা মুখ টিপে টিপে হাসতে আরম্ভ করেছে। ছেলেকে ফ্যাল ফ্যাল করে তাকিয়ে দেখে। আর কত কি ভাবতে থাকে। প্রথম প্রথম, সত্যি কথা বলতে কি বড় লজ্জা পেতাম। এখন মজা লাগে দেখতে এদের। তবে আর বেশীদিন ভাল লাগবে না, অণু কোথাও উঠে যাই। এরা ভাবে কি।

হাসিয়া ললিত বলিল, প্রেমে পড়ার ফল ফলল তাহলে ! কেমন, বললাম তো তখনই, পালিয়ে এস না। কত কান কানাকানি হবে। প্রাণ টানাটানির ব্যবস্থা। কি হবে এসব করে ! ঘরের ছেলে ঘরে ফিরে যাই।

তা তুমি যেতে পার। আমি পারব না। ঘর ছেড়েছি যখন, তখন ঘরে ফেরার মুখ কোথায় ! হাসিয়া বলিল সীতা।

বেশ কথা বলতে শিখেছ। এই এক বাড়ী লোকের মধ্যে বেশ চলে বেড়াচ্ছ, না মজা করে বেড়াচ্ছ। বাহাদুর মেয়ে ! বলিয়া ললিত সীতার গাল টিপিয়া দিল।

বাপের একমাত্র আত্মরে মেয়ে হলে এমনিই হয়। যা খুসী তাই সে করে বেড়ায়। বলিয়া সীতা ললিতের গায়ে চিমটি কাটিয়া দিল।

নীরদাসুন্দরী এই সব কথা আড়ালে দাঁড়াইয়া শুনিতেছিল আর সমস্ত শরীর রাগে ফুলিয়া উঠিতেছিল। এমন বেহায়া মেয়ে ছেলে তো বাপের জন্মেও দেখিনি। দাঁড়াও মজা দেখাচ্ছি। পালিয়ে আসা বের করছি তোমাদের।

শশী পদকে সে বলিয়াছে কয়েকবার। কিন্তু ফল হয় নাই। শশীপদ বলিয়াছে, কে কি করে, ক'রে বেড়াচ্ছে তাতে আমাদের কি ! মাসে মাসে ভাড়া দেবে, থাকবে। যে যা করে করুক। তাদের পরের কথায় থাকা ঠিক নয়।

কিন্তু শশীপদের স্ত্রী এবার বাঁকিয়াছে। সে নিজের কানে শুনিয়াছে সীতা-ললিতের ফিসফিসানি কথা। নীরদানন্দরী তাহাকে লইয়া গিয়া সব শুনাইয়াছে। সে এবারে সহজে ছাড়িবে না। রাগ তাহার এত হইত না। কলতলায় কি কথা বলিতে গিয়া সীতা কি উত্তর দিয়াছে তাহাকে কেন্দ্র করিয়া শশীপদের স্ত্রীর রাগ বাড়িয়াছে। সীতা নাকি একটা বিস্ত্রী ইঙ্গিতও করিয়াছে।

ভোর না হইতেই পুলিশ আসিয়া বাড়ী ঘেরাও করিয়াছে। সীতা আর ললিতকে ক্রমাগত প্রশ্ন করিয়া কোন উত্তর না পাওয়ায় তাদের মনে সন্দেহ জন্মিয়াছে একটা।

বাড়ীর সবাই আসিয়া জুটিয়াছে সেই ঘরে, ঘরের আসে-পাশে। ভীড় বাড়িয়াই চলিয়াছে।

সীতা মুখরা হইয়া উঠিয়াছে। ললিত বেপরোয়া হইয়া উঠিয়াছে। ভয় লজ্জা বলিয়া যে কিছু থাকিতে পারে তাহা যেন তাহারা ভুলিয়া বসিয়াছে।

দারোগা জেরা করিয়া চলিয়াছে। উত্তরের মাত্রা শুনিয়া তাহারও রাগ বাড়িয়া উঠিয়াছে।

কোলাহলের অন্ত নাই।

এমন সময়ে সদর দরজায় জনৈক বৃদ্ধ ভদ্রলোক আসিয়া উপস্থিত হইলেন। হাতে ছাতা আর ছোট একটি ব্যাগ লইয়া বাড়ীর নম্বর দেখিয়া জিজ্ঞাসা করিলেন, এই বাড়ীর মালিক কে ? দেখা করতে চান।

শশীপদ ভীড় ঠেলিয়া সদর দরজায় গিয়া দাঁড়াইল।

বৃদ্ধ ভদ্রলোক বলিলেন, আপনার বাড়ীতে নতুন একঘর ভাড়াটে এসেছে—এই দিন কয়েক হ'ল ? একটি ছেলে আর একটি মেয়ে।

শশীপদ ঘাড় নাড়িয়া মুখ টিপিয়া বলিল, হ্যাঁ, কেন ?

দরকার আছে। প্রয়োজন তাদের। কোথায় তারা ?

শশীপদ কটাক্ষপাত করিয়া বলিল, আপনার তারা কে ?

বৃদ্ধ রাগিয়া উঠিয়া বলিল, সে খবরে আপনার দরকার কি ?

তারা কোথায় বলুন, আমি যাব সেখানে। কোন ঘরে থাকে তারা ?

ও দিকের ভীড় আসিয়া জমিতে আরম্ভ করিল এ দিকে। সবাই সতৃষ্ণ নয়নে, কোতূহল বশবর্তী হইয়া বৃদ্ধকে দেখিতে লাগিল। মজা মন্দ নয়। ও ঘরে দারোগা। এ দিকে মূল ফরিয়াদী। আসামীরা তো ঘরেই আছে। সকলের মধ্যে কোতূহল জাগিয়াছে পুরামাত্রায়।

ইতিমধ্যে সীতা-ললিতের কানে খবর গিয়াছে, জনৈক বৃদ্ধ ভদ্রলোক সদর বাড়ীতে দাঁড়াইয়া ইহাদের খোঁজ লইতেছে। ব্যাপার চরমে উঠিয়াছে।

সীতার চোখ নাচিয়া উঠিল। ললিত হাসিয়া বলিল, একেবারে হাতে নাতে ধরা পড়ে গেলাম দেখছি। এ দিকে পুলিশ। ও দিকে স্বয়ং ফরিয়াদি। পালাবারও পথ নাই।

সকলের চোখোচোখি হইয়া গেল। বেশ মজা !

এমন সময় হস্তদস্ত হইয়া বৃদ্ধ ভদ্রলোক আসিয়া পড়িলেন ঘরের সামনে। ঘরের অবস্থা তখন চরমে উঠিয়াছে। দারোগা, পুলিশ, বাড়ীর লোকজনে ঘর বারান্দা সব ভর্তি হইয়া গিয়াছে। কানাকানি ও ফিসফিসানির শব্দে বৃদ্ধ বিব্রত ও বিস্মিত হইয়া গেলেন।

ভীড় ঠেলিয়া ঘরে ঢুকিয়া বৃদ্ধ দেখিল সীতা আর ললিতকে লইয়া পুলিশের জেরা চলিয়াছে।

অবাক হইয়া বৃদ্ধ বলিয়া উঠিলেন, কি ব্যাপার ! এ সব কি !  
অ্যা ! মা অলকা ? বাবা বৃন্দাবন ?

দারোগা হাসিয়া বলিলেন, অলকা, বৃন্দাবন ? কি ব্যাপার ! এরা আপনার কে হয় ?

ব্যাকুল হইয়া বৃদ্ধ বলিয়া উঠিলেন, আমার মেয়ে আর জামাই :

এঁয়া ! বলেন কি ? বলেন কি ? তবে—

সীতা ছুটিয়া আসিয়া বাবা, বলিয়া তাঁহাকে চাপিয়া ধরিয়া কাঁদিতে লাগিল। ললিত মাথা নীচু করিয়া বসিয়াই রহিল।

ব্যাপারটা আরও রহস্যময় হইয়া উঠিল। সকলের চোখ ঘুরিতেছে, কান সতর্ক হইয়া উঠিয়াছে। আশ্চর্য্য ব্যাপার ! একদম নাম গোপন। আচ্ছা ছেলে মেয়ে তো এরা !

দারোগা বুদ্ধকে বসিতে বলিয়া জিজ্ঞাসা করিল, আচ্ছা এরা তো আপনার মেয়ে-জামাই। কিন্তু এদের নাম কি বললেন ? অলকা আর বৃন্দাবন। তবে এরা এখানে সীতা আর ললিত নামে পরিচিত যে। নাম বদলও করে ফেলেছে ! কী ব্যাপার বলুন তো ?

বুদ্ধ বসিয়া পড়িয়া চঞ্চল হইয়া উঠিয়াছেন। চারিদিকে তাকাইয়া কেবলই বলিতে থাকেন, এদের সব বাইরে যেতে বলুন না ! এত ভীড় কেন ? কী হল ? এঁয়া, মা অলকা, বাবা বৃন্দাবন, তোমাদের কি হয়েছে ? শরীর কেমন আছে ? উঃ ! বলিয়া আর্তনাদ করিয়া উঠিলেন তিনি।

অবশেষে খবর যাহা পাওয়া গেল বৃদ্ধের মুখ হইতে তাহা লইয়া এত বড় বাড়ীর সকলের বিশ্বয়ের পরিসীমা রহিল না। অপরাজিতা হাসিয়া বলিল, তা বেশ ! ভাল নাটক অভিনয় হয়ে গেল। ভাল-মাসি রাগিয়া উঠিয়াছে। সে বলিল, এমনও জানে এইটুকু এরা ! সীতা তো পেটে কম শয়তানি বুদ্ধি ধরে না। শশীপদ হাসিয়া বলিল, আমি আগেই বলেছি, ওসব নিয়ে ঝাঁটাঝাঁটি করো না। কি দরকার বাপু অতশতে। ভাড়া দেবে, থাকবে। কে কি করছে, করেছে তার খবরে আমার দরকার কি ? নীরদাসুন্দরী বলিল, আচ্ছা ছেলেমেয়ে দুটি হয়েছে। কদিন ধরে এমন সন্দেহে ফেলেছিল যে খেয়ে সুখ নাই, শুয়ে সুখ নাই। কেবল ওদেরই কথা ভেবে মরেছি। জন্ম ওদের করব, না শেষ পর্য্যন্ত আমরাই হলাম জন্ম। বাড়ীর সকলের

নানা জনের মুখে নানা ধরণের কথা উঠিয়াছে। অবশেষে একজন বলিয়া উঠিল, সিনেমা কোম্পানীকে খবর দাও, এমন পালা এদের মত আর কেউ করতে পারবে না। শো হলে তো হাউস ফুল হয়ে যাবে। টিকিট পাওয়া দায়।

অবশেষে ঘটনা যাহা ঘটিল তাহা যেমন কৌতূহলোদ্দীপক তেমনি হাস্যকর। দারোগা শেষ পর্য্যন্ত বুদ্ধের কথায় না হাসিয়া থাকিতে পারিলেন না।

ঘটনাটি এইরূপ :

বুদ্ধ ভদ্রলোকের নাম অপরেশচন্দ্র সরখেল। ধনী কিন্তু কৃপণ বলিয়া যথেষ্ট খ্যাতি আছে। তাঁহারই একমাত্র কন্যা অলকা। কিছুদিন আগে বৃন্দাবন নামে এক যুবকের সহিত বিবাহ দেন। ঘর-জামাই থাকিতে হইবে বলিয়া বৃন্দাবন প্রথমে সম্মতি জানাইয়াছিল, কিন্তু ঘরে আসিয়া জামাই সাজিয়া যখন বসিল, তখন অলকার সঙ্গে অপরেশচন্দ্রের অবনিবনা হইতে লাগিল বৃন্দাবন প্রসঙ্গে। কথায় কথায় অপরেশচন্দ্র একদিন অপমান করিয়া বসিল। ইহাতে অলকার রাগ চরমে উঠিল এবং একদিন বৃন্দাবনকে সঙ্গে লইয়া সে কলিকাতায় পলাইয়া আসিল বাবাকে না জানাইয়া। কলিকাতায় এই বাড়ীতে একটি ঘর ভাড়া করিয়া তাহারা দুইজনে ছদ্মনামে কাটাইতে লাগিল।

ইতিমধ্যে অপরেশচন্দ্র কন্যা-জামাতার জ্ঞাত পাগল হইয়া সর্বত্র অনুসন্ধান করিয়া বেড়াইতে লাগিলেন। তারপর বহু চেষ্টায় ইহাদের সন্ধান পাইলেন এখানে।

শেষ পর্য্যন্ত অলকা এই চুক্তি করিয়া বাড়ী যাইতে রাজী হইল যে সংসারের সম্পূর্ণ কর্তৃত্ব সে ও তাহার স্বামী লইবে। বুদ্ধ পিতা আর কিছুতেই হাত দিবেন না। কোন বিষয়ে কর্তৃত্ব পর্য্যন্ত করিতে পারিবেন না তিনি। ধনী কন্যার এই প্রস্তাবে অবশেষে বুদ্ধ অপরেশচন্দ্র সম্মতি জানাইতে বাধ্য হইলেন।

## ভিন্ন

সীতা-মলিতের কাহিনী সারা বাড়ীতে হাসির রোল তুলিয়াছে।

সীতা যখন তাহার বাবার সঙ্গে চলিয়া যায় তখন বাড়ীশুদ্ধ মেয়ে-মহলের সে কি বিদায় সম্ভাষণ।

অপরাজিতা সীতার গাল টিপিয়া দিয়া বলিয়াছে, আচ্ছা মেয়ে হয়েছিস তুই। কদিন ধরে তোদের নিয়ে কি কাণ্ডই না হচ্ছিল বাড়ীতে। আমি কিন্তু তখন থেকেই এই রকম একটা আন্দাজ করেছিলাম।

সীতার খোঁজ পাইয়া সেদিন তাহার এক কাকা আসিল। সে সমস্ত বাড়ীখানা ঘুরিয়া দেখিয়া বেড়াইল। কোণের দিকে একটা ঘরে এক দম্পতি থাকে। সেখানে গিয়াই হঠাৎ সে থমকিয়া গেল। এ যে তাহাদের মামার বাড়ীর ব্রাহ্মণদের হরি ঠাকুরের বড় মেয়ে সরলা। বৎসর পাঁচেক আগে কায়স্থদের একটি ছেলের সঙ্গে বাড়ী হইতে পলাইয়া যায়। ছেলেটি ভাল চাকরি করে। কিন্তু সে যে এখানে আসিয়া বাস করিতেছে কে জানে।

স্বদ্ধ হইয়া সে থাকিল কিছুক্ষণ। তারপর গম্ভীর মুখে ফিরিয়া আসিয়া শুধু সীতাকেই বলিল তাহাদের সরলার কথা।

সীতা সে কথা তখনি অপরাজিতাকে বলিল। অপরাজিতা আর কাহাকেও না বলিয়া সোজা সরলার ঘরে গিয়া এক চক্কর ঘুরিয়া আসিল। আর পাঁচকান না করিয়া অপরাজিতা গুম হইয়া বসিয়া রহিল।

আশ্চর্য্য! পরদিন সরলা বাসা তুলিয়া কোথায় যে চলিয়া গেল কেহই জানিবার অবকাশ পাইল না।

সপ্তাহখানেক পরে সে কথাটা অবশ্য রাষ্ট্র হইয়া গেল বাড়ীময়।



ভালমাসি অবাক হইয়া বলিল, আমার তো বিশ্বাস হয় না। এ বদনাম ছাড়া আর কিছু নয়। সরলাকে আমি তো অনেকদিন থেকে দেখে আসছি। বাড়ীর অনেকে ভালমাসির কথায় সায় দিল। তবে একটা কথা—তাহারা এভাবে হঠাৎ সরিয়া পড়িল কেন?

সেই ঘরে আর একদল ভাড়াটে আসিয়া আশ্রয় লইল। সীতা চলিয়া যাওয়ার কয়দিন পরে তাহার ঘরও ভরিয়া গেল।

অপরাজিতা আশ্চর্য্য পুরীর কথা ভাবিয়া দিশা পায় না। সরলার কথা ভাবিতে বসে। ভাবে সীতা-ললিতের কথা। বেশ অভিনয় হইয়া গেল যা হোক। এমন জেদি মেয়ে সে জীবনে কখনও দেখেনি। কুপণ বৃদ্ধের অবস্থার কথা ভাবিয়া তাহার হাসি পাইল।

হরসুন্দরী ও ভালমাসিতে কথা হইতেছিল।

পর পর দুটো ঘটনা ঘটে গেল এ বাড়ীতে। একদল অভিনয় করে গেল পালানোর ছল করে এসে। আর একদল সত্যি পালিয়ে এসে ভাল মানুষের মত কাটিয়ে গেল। বলিয়া হাসিতে লাগিল হরসুন্দরী।

ভালমাসি রাগ করিয়া বলিল, ও সব হাফগেরস্থর আখড়া ভেঙ্গে দাও শশীপদকে বলে। যত সব বাজে লোক এসে এই বাড়ীতে থাকবে আর বদনাম উঠবে আমাদের। ভাল বাসা না ভালবাসার বাড়ী।

শশীপদ আশ্রুক, তাকে দিয়ে ব্যবস্থা করছি। তারপর ফিস ফিস করিয়া বলিল হরসুন্দরী, আর সব ভাড়াটেরা ঠিক আছে তো? না হাফগেরস্থর দলে নাম লেখানো।

চিন্তিত মুখে ভারিকি চালে ভালোমাসি বলিল, আর কাকেও তো আমার সন্দেহ হয় না। দেখা যাক, একটু লক্ষ্য করে চলি।

এমন সময় অপরাজিতা আসিল। হাসিয়া বলিল, কি সব এমন দু জনের মধ্যে শলা পরামর্শ হচ্ছে?

এই তোমাদের ঘর খোঁজার কথা হচ্ছে। কে বাবা তোমরা। জানা চাই। সন্ধান নিতে হবে। ও সব বাজে লোকের ঢুকতে দেওয়া

বারণ করতে হবে। পুলিশের ঝঞ্ঝাট আর ভাল লাগে না। বাড়ী খানাকে গেরস্থ বাড়ী করে আর রাখা যাচ্ছে না দেখছি। ভালমাসি কথাটা সমালাইয়া লইয়া অপরাজিতাকে টানিয়া লইয়া গেল পাশের একটা ঘরে।

মেয়ে মহলে আলোড়ন উঠিয়াছে। কোলাহল ছড়াইতেছে চারিদিকে। পুরুষ মহল এতদিন উপেক্ষার ভরে ছিল এই বাড়ীতে। এখন তাহারাও দলের খবর রাখিতে আরম্ভ করিয়াছে। ঘরে ঘরে সেই সব কানাকানি চলিতেছে।

শশীপদ হস্তদন্ত হইয়া বাড়ী ঢুকিল।

নীচে কলতলায় হরমুন্দরী কাপড় কাচিতেছিল। তাহাকে সামনে পাইয়া শশীপদ বলিল, যুদ্ধ! যুদ্ধ!

অবাক হইয়া হরমুন্দরী তাহার পানে চাহিয়াই রহিল।

যুদ্ধ গো, যুদ্ধ! যুদ্ধ যে বেধে গেল ব'লে। ইয়া বড় বড় বোমা টপাটপ পড়ছে এ বাড়ী ও বাড়ীতে। লোক ছুটছে চারদিকে। আর বাঁচোয়া নেই। এক দেশের ছোটো সহর পুড়ে ছাই হয়ে গেছে। এবার আমাদের পালা। এই মাত্র খবর পেলাম। কোলকাতায় বোমা পড়বে। দেখবে তখন মজাখানা।

বিরক্ত হইয়া হরমুন্দরী বলিল, যাও যাও। আর বাজে কথা বলতে হবে না। বোমার ভয় রাখে না এ হরমুন্দরী। বলিয়া নিশ্চিন্ত নির্ভাবনায় আবার কাপড় কাচিতে লাগিল।

কথাটা উপহাস যোগ্য নয়। সব বাড়ীর পুরুষেরাও কোথা হইতে এই কথাটাই শুনিয়া আসিয়াছে। তাহারা যেন মজা পাইতেছে বলিয়া মনে হয়। মেয়েরাও কথাগুলি শুনিয়া উপভোগ করিতে লাগিল। কোথায় ভয়! এ যেন একটা চিত্তাকর্ষক সংবাদ।

আবার সংবাদ আসিল পুরুষ মহলে, দাঙ্গা। হিন্দু মুসলমানের দাঙ্গা হইবে। চরম সে দাঙ্গা।

কথাটা শুনিয়া এবার মেয়েরা ভয় খাইয়া গেল।

কিছুদিন হইতে রাজনীতির আলোচনা বাড়ীতে দ্রুত পড়িয়াছে। সেইসঙ্গে যুদ্ধ আর দাঙ্গা আসিয়া যোগ দিয়াছে। ফলে খবরের কাগজের আনাগোনা বাড়িয়া উঠিয়াছে।

ছপুবেলায় খবরের কাগজ কেহ পড়িত না। এখন মেয়েরা ছপুবেলায় খবরের কাগজ পড়িতে লাগিল। কেহ সকালে বাজার করিতে গিয়া একখানা কাগজ কিনিয়া আনে। কেহ অফিস হইতে ফিরিবার পথে একখানা কাগজ লইয়া আসে।

অপরাজিতা বরাবরই কাগজ পড়ে ছপুবেলায়। কিন্তু পরদিনের কাগজ। কাগজখানি গোটা দিন তাহার স্বামী দোকানে রাখে। রাত্রে ফিরিবার সময় সঙ্গে করিয়া আনে। আনিয়া তাকে তুলিয়া রাখে। ছপুবেলায় সেই কাগজ একবার দেখিয়া লইয়া ঘুমাইয়া পড়ে। অথবা ঘুম ধরাইবার জন্য কাগজ পড়িতে বসে। তবে এখন কাগজ পড়িয়া ঘুম আসে না। আনে উৎকণ্ঠা, ভীতির ভাব। যুদ্ধের ছবি দেখিয়া আঁতকাইয়া উঠে সে। সাম্প্রদায়িক কলহ যে দাঙ্গায় রূপান্তরিত হইতে পারে তাহা ভাবিয়া শিহরিয়া উঠে। কি সর্বনাশ! অপরাজিতা ভাবিয়া আকুল হয়।

আর এক বিস্ময়কর ঘটনা ঘটয়া গেল এই বাড়ীতে। কে জানে এই বাড়ীর মধ্যে রাজনৈতিক দল বিশেষের আড্ডা জমিয়াছে কি না।

ভোর হইতে পুলিশের সার্চ আরম্ভ হইয়া গিয়াছে। সারা বাড়ী ঘেরাও করিয়া তাহারা শেষ রাত্রি হইতে টহল দিয়া বেড়াইতেছে। দল বিশেষের গোয়েন্দা আগেই খবর দিয়া গিয়াছে। কিন্তু সন্ধ্যা রাত্রেই তাহারা সরিয়া পড়িয়াছে। ঘরে কিছু মাত্র রাখে নাই তাহারা।

বেলা হইলে ঘর সার্চ হইল। কিন্তু কিছুই পাওয়া গেল না। সন্দেহজনক জিনিস বা ব্যক্তির ইতিমধ্যেই নিখোঁজ।

হতাশ হইয়া পুলিশেরা ফিরিয়া গেল। এবং তখন হইতে বাড়ীর উপর তাহাদের নজর পড়িল।

আবার জুটলা বসিয়াছে মহিলা মহলে।

ঘটনাটা এই রকম :

একঘর ভাড়াটে আসে। দুইখানা ঘর লইয়া তাহারা থাকিত। স্বামী স্ত্রী একটি ঘরে। অন্য ঘরে তার ভাইয়েরা। অবশ্য এখন জানা গেল স্বামী স্ত্রী তাহারা নয়। বিপ্লবী দলের নেতা আর তার সহকারিণী স্ত্রী সাজিয়া একদল সহকারী লইয়া রাজনৈতিক আন্দোলন চালাইয়া যাইতেছে।

ঘরে বোমা তৈয়ারী হয়। হ্যাণ্ডবিল জমা থাকে। আরও কত কি সব হয়। তবে তাহারা অল্পদিন মাত্র ছিল।

সে দল পুলিশ আসিবার আগেই উধাও হইয়াছে। ধরা কেহ পড়িল না বটে, কিন্তু বাড়ীখানা ধরা পড়িয়া রহিল সকলের কাছে।

একজন আসিয়া বলিল, চাঁদের হাট। আছি বেশ। নানা ঘরে নানা দল, নানা মত, নানা কাজের ধারা। ঘর ভাঙ্গা, ঘর গড়ার কারবার চলছে ক্রমাগত এখানে। বাড়ী বটে একখানা। এ বাড়ীর কথা নাম ইতিহাসে থেকে যাবে।

শশীপদ ব্যস্ত হইয়া উঠে। হরমোহিনী রাগিন্না আগুন। এই ধরণের লোকের কথা তাহারা ভাবে নাই। এখন ভাবিয়া আকুল। কালে কালে আর কত কি দেখব।

অবশেষে আর এক আশ্চর্য্য খেলা দেখাইয়া গেল নীলকান্ত রায়। অন্য পাড়ার ছেলে এই পাড়ায় আসিয়া জুটিল। জুটিল এই বাড়ীর নীচেকার একখানা ঘরে। অগ্রিম একমাসের ভাড়া দিয়া কাল রাত্রে আসিয়াছে। ভাড়া লইবার সময় বলিয়াছে, তাহার স্ত্রী দেশে আছে। খবর পাঠাইয়াছে কাল আসিবে ডাক্তার দেখাইতে। তাহার নয়, একটি ছেলের জন্ম।

শশীপদ সেই কথায় সম্মতি জানাইয়া নীলকান্তকে বেশী ভাড়ায় ঘরখানি ছাড়িয়া দিল একমাসের ভাড়া অগ্রিম আদায় করিয়া।

নীলকান্ত সন্ধ্যাবেলায় আসিয়া ঘর ঠিক করিয়া গেল। যাইবার সময় তালা লাগাইয়া বলিয়া রাখিল, রাত্রেই সে আসিবে। অথবা না আসিতেও পারে।

অকস্মাৎ সকাল বেলায় দেখা গেল ঘর ভিতর হইতে বন্ধ। ঘরে কে আছে বা কি হইয়াছে কেহ জানে না।

বেলা আট্টা বাজিয়াছে তখনও ঘর বন্ধ। কী ব্যাপার! ক্রমে কানাকানি হইতে লাগিল। ফিস ফিসানি চলিতে থাকে। অবশেষে গুঞ্জন উঠে। কিন্তু শেষে যে কোলাহলে রূপান্তরিত হইয়া উঠিবে তাহা কে ভাবিয়াছিল।

সকলের সন্দেহ হইল। অতবেলা অবধি ঘর খোলে না কেন? কে আছে ভিতরে! আছেই বা কেন? আর খোলে নাই বা কি জন্ম! সন্দেহ আরও বাড়িতে, বাহির হইতে ডাকাডাকি আরম্ভ হইয়া গেল। দরজায় ধাক্কা দিতে থাকে কেহ। কিন্তু কিছুতেই কিছু হইল না।

অবশেষে সন্দেহের মাত্রা চরমে উঠিতেই ডাক হইল পুলিশের। পুলিশ আসিল। দরজা ভাঙ্গিয়া ঘরে ঢুকিয়া দেখে সেই নীলকান্ত গলায় দড়ি দিয়া ঝুলিতেছে। অন্ধকার ঘরে এই সব কাণ্ড নীলকান্ত যে কখন করিয়াছে কে জানে।

পুলিস নীলকান্তকে নামাইল।

খবর পাইতে দেরী হইল না, কে এই নীলকান্ত।

নীরদাসুন্দরী হাউ মাউ করিয়া উঠিল, মুখপোড়া ছেলে, ও পাড়া থেকে এসেছে এ পাড়ায় মরতে। মরবার আর জায়গা পেল না। হতভাগা কোথাকার। মরল বটে, সেই সঙ্গে আমাদেরও জড়িয়ে গেল।

আবার কোলাহল উঠিল। সারা বাড়ীময় সে কোলাহলে মুখরিত হইয়া উঠিল। অবশেষে তাহা ছড়াইয়া পড়িল পাড়ায়। দলে দলে

লোক আসিয়া নীলকান্তকে দেখিয়া যাইতে লাগিল। নানা মন্তব্য উঠিল সকলের মধ্যে।

কিন্তু মুন্সিল হইয়াছে শশীপদর। তাহার স্ত্রী মুখরা হইয়া উঠিয়াছে। শশীপদর বাড়ীওয়ালা সাজিবার সখ চরমে উঠিয়াছে। স্ত্রীর হাতে সব কর্তৃত্ব ছাড়িয়া দিতে পারিলে সে যেন বাঁচে।

নীলকান্ত বাড়ী হইতে থানায় গেল, তারপর হাসপাতালে গিয়া শ্মশানে যাইবার পথ পাইল। ইতিমধ্যে আত্মীয়রা আসিয়া তাহার জিন্মা লইল।

কথাটা এইখানে শেষ হয় নাই। ভয় জাগিয়াছে সকলের মনে। যে ঘরে সে মরিয়াছে, সে দিক দিয়া কেহ যাইতে চায় না। গা ছম ছম করে। ভয় হয়। কে জানে, যদি নীলকান্ত সকলের অলক্ষ্যে হাত বাড়াইয়া ডাক দেয়। ডাক অবশ্য দেয় নাই। অত বড় বাড়ীর অত লোকের ভীড়ে ও শব্দে সে সুবিধা করিতে পারিবে না।

ভয় দেখাইবার জন্য নীলকান্ত তো এ বাড়ী আশ্রয় লয় নাই। আসিয়াছে রাগ করিয়া। তাও স্ত্রীর উপরে। সামান্য মাহিনার কেরাণী সে। সেদিন মাত্র মাহিনা পাইয়াছে। সেই টাকার কিছু স্ত্রীকে দিয়া, বাকী ঘর ভাড়াই খসাইয়া, অবশেষ নিজের কাছে রাখিয়া নীলকান্ত এই বাড়ীতে আসিয়াছে। আসিয়াই নিজেকে শেষ করিল।

ঘটনার কি শেষ আছে। একটার জের শেষ হইতে না হইতে আর একটা আসিয়া জুটিয়া যায়। যেন রীলে বাঁধা ছবি। এই বাড়ীখানা তাহারই নিদর্শন।

## চার

পর পর দুর্ঘটনা ঘটিল কতকগুলি। ইহাতে বাড়ীখানি বেশ সজীব হইয়া উঠিয়াছিল। কিন্তু মাসখানেকের মধ্যে তেমন কোন ঘটনা না ঘটায় সকলেরই মুখে চোখে তেমন কোন উৎসাহ নাই।

তবে যুদ্ধ যে আসিতেছে, দাঙ্গা যে নিশ্চয়ই বাধিবে, এ সম্বন্ধে সকলেই নিঃসন্দেহ হইয়া বসিল।

মেয়ে মহলে এই দুই আলোচনার মধ্যে পর পর কয়েকটি উল্লেখ-যোগ্য ঘটনা ঘটয়া ধামাচাপা ছিল। আবার তাহা জাগিয়া উঠিয়াছে।

ঘরে ঘরে যুদ্ধের প্রস্তুতি। দাঙ্গার জ্ঞাত উদ্বেগ লইয়া বসিয়া আছে সকলে। কি হয় কে জানে? এই লইয়া গবেষণারও অন্ত নাই।

কাগজে প্রতিনিয়ত দুই পক্ষের উত্তেজনা মূলক খবর বাহির হইতেছে। তর্জন গর্জন উঠিতেছে।

ভালমাসি কাপড় কাচিয়া উপরে উঠিতেছে। তাহার কানে গেল, পাশের ঘর হইতে একজন বলিয়া বসিল, নারদ, নারদ, অর্থাৎ লেগে যা বিবাদ!

বিবাদ লাগুক ক্ষতি নাই। কিন্তু তাহার মধ্যে নিজেরা না থাকে যেন। তাহা হইলেই হইল।

একজন বলিল, আচ্ছা, ওরা বিশ কোটি, আর এরা পাঁচ কোটি। কাটাকাটি হয়ে যাক! তাহলে থাকে ওদের পনেরো কোটি লোক। বাস, নিশ্চিন্ত আরামে থেকে যাবে। বাধা দেবে কে কাকে। নিঃকলিত্রিয় হয়ে যাবে সব। কি বলিস, মন্দ কথা নয়?

অন্যজন বলিল, ঠিক বলেছ, ওদিকে বিশ আর এদিকে পাঁচ। কাটাকাটি হয়ে যাক। কিন্তু ভাই, এর মধ্যে কারা যাবে আর কারা

থাকবে সেটির হিসেব তো দিলে না ? তুমি, তোমার ভাই, এই দুজন কোনখানে দাঁড়াবে । কাটাকাটির মধ্যে না কাটাকাটির বাইরে থেকে যাবে ।

বিরক্ত হইয়া আর একজন বলিল, দাদার কথা ছেড়ে দাও । ওর কথা অমনি । এ কি কথার কথা । এ কি অঙ্কের হিসেব । আর তাই যদি হ'ল তাহলে যে অঙ্ক কষে তাকে হিসেবের মধ্যেই যেতে হয় ।

তাই নাকি ? তবে দাদা হিসেবের মধ্যে যাচ্ছ তো । ঐ পাঁচ কোটির মধ্যে ? অ্যা, কি বলছ ? বল ?

বলাবলির আর কিছু নেই । কথা, কথা ।

সেই কথার শেষ রাখিয়াছে ভালমাসির ছেলে । সেদিন চাকরি করিয়া বাড়ী ফিরিতেছিল । রাস্তায় গোলমাল । লোক যখন ছুটাছুটি করিতেছিল তখন ভালমাসির ভাল ছেলে উৎসাহের বশবর্তী হইয়া ব্যাপার কি জানিতে গিয়া পুলিশের হাতে পড়ে । ভীড় সরাইতে গিয়া পুলিশ তাহাকেই সামনে পায় । অবশেষে তাহার ভাগ্যে থানা মিলিল ।

ঘটনা ঘটিলেই পুলিশকে তাহার কিনারা করিতে হইবে । যে কোন দুই চারিজন লোক ধরিয়া না আনিলে চলিবে না । আসল নকল যে হোক ।

পাঁচজন লোককে ধরিয়া লইয়া পুলিশ থানায় চলিল । আসল লোকের পাক্তা নাই । যে পাঁচজন নকল লোক ধরিয়া লইয়া চলিয়াছে তাহারা পড়িয়াছে বিপদে ।

ভালমাসির কাছে খবর আসিল । কাঁদিয়া পড়িল সে শশীপদর কাছে । তাহার সুপারিশে আর একজনের মারফৎ অশ্রুজনকে ধরিয়া অবশেষে ভালমাসির ছেলে ছাড়া পাইল ।

বাড়ী ফিরিল সে অনেক রাত্রে ।

আবার বাড়ীতে কোলাহল উঠিল । যাহারা ঘুমাইয়া ছিল



তাহারা উঠিয়া পড়িল। দেখিতে চায় তাহাদের অরূপ রতনকে।  
যাহারা বিছানা পাতিয়া ঘুমাইবার আয়োজন করিতেছিল তাহারা  
কাতার দিয়া দাঁড়াইল ঘরের সামনে।

ফিসফাস গুজগাজ চলিতে থাকে। মন্তব্য উঠে নানা ধরণের।  
ভালমাসির কান্না এখন গালাগালিতে উঠিয়াছে। পুলিশ নিপাত  
করিয়া ছাড়িতেছে।

সেই পাঁচের পাল্লায় পড়িয়া ইহার এই দুর্দশা। তবু যে কাটা-  
কাটির মধ্যে না পড়িয়া ভালয় ভালয় ফিরিয়া আসিয়াছে এই কথা  
ভাবিয়া সকলে নিশ্চিন্ত হইল।

অনেক রাত্রি পর্য্যন্ত ভালমাসির আশ্বালন চলিতে লাগিল।  
নীরদামুন্দরীও কম যায় না।

অপরাজিতা ঘরে বসিয়া স্বামীকে খাওয়াইতে ছিল। দোকানের  
কাজ শেষ করিয়া বাড়ী ফিরিয়া একটু স্বস্তির নিশ্বাস ফেলিবে  
তাহাতেও বাদ সাধিল ভালমাসি। অপরাজিতা বলিল, ও দিকে  
কান দিও না। খেয়ে দেয়ে ঘুমিয়ে পড়। যে বাড়ীতে আছি, এখানে  
রোজই এমনি ধরণের কাণ্ড না ঘটাই তো আশ্চর্য্য। বাড়ী করতে পার  
তো তার চেষ্টা দেখ। খেয়ে সুখ, শুয়ে সুখ। গগুগোলের বালাই  
থাকবে না। আচ্ছা চিড়িয়াখানায় এসে উঠেছি। বলিয়া হাসিল সে।

আমি তো আছি আরামে। এই নিয়ে কাটে মন্দ নয়। নিত্য  
নতুন খবর পাচ্ছি। সময় বেশ কাটছে। বাড়ী তো নয়, সারা  
শহরটাই যেন এর মধ্যে আছে। ছুনিয়ার সব ধরণের এক একটু  
নমুনা এসে আড্ডা গেড়েছে। বলিয়া অপরাজিতা হাসিতে লাগিল।

ঘর ভরতি বাসিন্দায় ! খোপ ভর্তি পাখী যেন। সেই বাসায়  
বিবাহ আছে। আছে অন্নপ্রাশন, শুভকাজ। ঘর-বসতে বৌ আসে।  
মেয়ে যায় পরের ঘরে। লোক-লৌকিকতা, নিমজ্ঞ রক্ষা করার সব  
নিদর্শনই মেলে এখানে। কিন্তু আশ্চর্য্য এই বাড়ীর এত পরিবারের

মধ্যে আত্মীয় সম্বন্ধ কাহারও সহিত কাহারও নাই। সব ছাড়া ছাড়া ভাব যেন। তবে ভাব করিয়াও লাভ নাই। নিত্য নূতন আসিতেছে যাইতেছে। কত ভাব করিবে আর পরম্পরের মধ্যে। কথায় কথায় ঝগড়া হয়। ফলে বাড়ী ছাড়ে। যাহারা থাকে তাহারা আরও ভাল বাসা পাইলে ঋণকাল অপেক্ষা করে না। কাজেই মায়া বলিয়া কিছু ইহাদের মধ্যে দানা বাঁধেনি। না ঘরের প্রতি, না প্রতিবেশীর প্রতি। তবু এমনি করিয়া এই বাড়ীর একদল লোক বাসা করিয়া চলিয়াছে। দিন কাটাইতেছে একরকম করিয়া।

নীরদাসুন্দরী ঘরে আপন মনে পান সাজিতে বসিয়াছে। এমন সময় ভালমাসি আসিয়া ভাল মানুষের মত তাহার পাশে বসিয়া বলিল, দিদি, তোমার হাতের সাজা পান বড় মিষ্টি। দাও দেখি একটা। খেয়ে মুখটা বদলিয়ে নিই।

নীরদাসুন্দরী হাতের ইশারায় তাহাকে বসিতে বলিল।

পান সাজা হইল। নিজে একটা মোটা খিলি মুখে পুরিয়া, দোক্তার কোটা খুলিয়া দোক্তা খাইয়া বলিল, এই নাও। পান খাও। দোক্তা খাও।

মুখে পান দোক্তা পুরিয়া খুশি হইয়া ভালমাসি ফিস ফিস করিয়া বলিল, নীচের ঘর দিয়ে সন্ধ্যাবেলায় যাওয়া যায় না। গা'টা ছম ছম করে ওঠে। অনেকে বলতে আরম্ভ করেছে, নীলকান্ত ভূত হয়ে ঐ ঘরে আছে।

নীরদাসুন্দরী গম্ভীর হইয়া গেল। বলিল, চুপ চুপ। ও কথা আর প্রকাশ করে বেড়িও না। তাহলে ভাড়াটে কেউ আসবে না। থাকবে না ও ঘরে কেউ।

আমি কি একা বলছি। বাড়ী শুদ্ধ সকলেরই যে ও দিকে গেলে গা'টা ছম ছম করতে থাকে। সত্যি ভাই, ও ভূত হয়েই আছে। বলিয়া ভালমাসি চুপ করিয়া রহিল।

আমরা কি মানুষ! এই একবাড়ী লোক—এরা সবাই তো

ভূত। মানুষ হলে কি এ পচা পড়ো বাড়ীতে কেঁপে থাকে। যেমন বাড়ী তার তেমনি লোক। ছুইয়ে মিলেছে ভাল।

অপরাজিতা এ দিকে আসিতেছিল। তাকে ডাক দিল ভালমাসি। ও অপু, শোন না। এস না এ দিকে।

অপরাজিতা আসিয়া নতমুখে দাঁড়াইল। হাতে একখানা কাগজ। বলিল, অবস্থা ভাল দেখছি না। মারামারি আর কাটাকাটি তো লেগে গেল দেখছি। সাবধান মাসি, গতিক সুবিধা নয়। বলিয়া সে হাতের কাগজখানি মেলিয়া ধরিল।

নীরদাসুন্দরী থেঁকাইয়া বলিল, ও সব বাজে কথা। বাজে খবর। ঠিক হয়, না হবে।

সত্যি বলছি। খবরের কাগজে কি মিথ্যে সংবাদ বের হয়। দাঙ্গা আর যুদ্ধ একসঙ্গে বেধে যাবে। উনিও তাই বলছিলেন। জিনিসের দর হু হু করে বেড়ে চলেছে। বলিয়া স্তব্ধ হইয়া বসিল অপরাজিতা।

গম্ভীর হইয়া নীরদাসুন্দরী বলিল, চালের দর তো চার টাকা ছিল মণ। কাল শশীপদ ছ'আনা বেশি দিয়ে এনেছে। সে নাকি বলছিল, দোকানী বলেছে, দর আরও বাড়াবে। তাই হু মণ চাল তাড়াহুড়ো করে কিনে এনেছি।

ভালমাসি হতাশ হইয়া বলিল, তোমাদের পয়সা আছে দর উঠবার আগেই কিছু বেশী করে কিনে মজুত করে রাখবে। কিন্তু আমরা পয়সা পাব কোথায়। দিন আনা দিন খাওয়ার দলে যে আমরা। বাড়ে বাড়ুক। যা ভাগ্যে আছে হবে।

পরিবেশ অচিরে মোড় ফিরিল। রাজনৈতিক আলোচনা বন্ধ হইয়া বাজারনৈতিক গবেষণায় সকলে মন দিল।

অবস্থা সেই রকম দেখছি। দোকানের সব জিনিস আটকে রাখছি। এখন বিক্রী রয়ে সয়ে করব। বলিয়া অপরাজিতার স্বামী খাটে বসিয়া পা দোলাইতে লাগিল।

অপরাজিতা বলিল, তাহলে ব্যবসা চলবে কি করে ?

ঐ তো ব্যবসার মজা। বাজার উঠবার মুখে জিনিস মজুত করে কম দামের কেনা মাল চড়া দামে বিক্রী করব। তাতে লাভ হবে বেশী। অঘোর গম্ভীর চালে কথাগুলি বলিয়া অপরাজিতার পানে তাকাইল।

সব জিনিসের দর কি বেড়ে যাবে ?

যাবে না ? হু হু করে বেড়ে যাবে। যুদ্ধ বাধলেই বাজারের অবস্থা আগুন হয়ে উঠবে। আমার দোকানের মজুত মালের দাম আন্দাজ দশ হাজার টাকার মত। একমাস বন্ধ রেখে হঠাৎ চড়ার মুখে খুললে বিশ হাজার টাকা হয়ে যাবে। আমার মত সব ব্যবসায়ীর এই চাল। বলিয়া অঘোর গম্ভীর হইল।

অপরাজিতা বলিল, তাহলে ব্যবসায়ীর হাতেই দর। হঠাৎ তাহার ভালমাসির কথা মনে পড়িয়া গেল। গরীব মানুষ। মজুত কি রাখবে। দিন আনা দিন খাওয়া যাদের চলে তারা এমনি করে চড়া দরে জিনিস খেয়ে পেটে চড়া পড়িয়ে দেবে। যুদ্ধ তো ধনীর জন্তে। তারা বসে বসে মজা লুটবে। আর টাকার গদীতে বসবে। গরীবরা যাবে যুদ্ধে, মারবে, মরবে। এই তো দুনিয়া। বলিয়া গম্ভীর নিঃশ্বাস ফেলিয়া অপরাজিতা চুপ করিয়া রইল। তাকাইয়া দেখিল তাহার স্বামী ভবিষ্যৎ লাভের আশায় বসিয়া পা নাচাইতেছে।

অঘোর বলিল, নীচেকার ঘরটা তো কেউ ভাড়া নেবে না। ওতো ভূতের আড্ডা। ঐ ঘরটি ভাড়া নিতে হবে।

অপরাজিতা আঁতকাইয়া উঠিল, সর্বনাশ, ও ঘরে কে যাবে। ও ঘর নিয়ে লাভ কি।

বোকা মেয়ে, ঐ ঘরে থাকবে মজুত মাল। কাল অনেক টাকার জিনিস কিনবার অর্ডার দিয়েছি। ঐ ঘরে এনে মজুত রাখব। মাসকয়েক গুদোমজাত করে রাখলেই দেখবে ডবল দাম হয়ে যাবে।

লাভ বেশী হইবে জানিয়াও অপরাজিতা খুসী হইল না। বলিল, যা ভাল বোঝ কর।

তুমি একবার শশীপদর বোয়ের কাছে যাও। বললে এস ঐ ঘরটা আমি ভাড়া নোব। বাইরের ঘর। লোকজন এলো বসবার জায়গা নাই। তবে ভাড়া যেন কম হয়। কদাচ বলবে না যে আমি গুদোম করব। তাহলে চড়া ভাড়া আদায় না করে ছাড়বে না। বললে অঘোর।

বেশ সন্ধ্যায় নিরিবিলি পেয়ে কায়দা করে কথাটা বলব। কিন্তু সুবিধা করে দিচ্ছি এতে আমাকে কি বকশিস দেবে? বলিয়া বড় বড় চোখ তুলিয়া অপরাজিতা স্বামীর পানে তাকাইল।

অঘোর বলিল, কি চাও। সবই তো তোমাকে দিয়েছি। ভাল ভাল শাড়ী আর গয়না পেলে খুসী হবে তো?

না। আমাকে নগদ টাকা দেবে। নিজের কাছে রাখব। কিন্তু কিসে খরচ করব তার কৈফিয়ৎ চাইতে পাবে না।

দান খয়রাৎ করবে?

নিশ্চয়ই। অপরাজিতা মনে মনে ভাবিল, তোমার পাপের পয়সা খরচ করে পুণ্য করবার সাধ নাই। তবে এমন কিছু করব যাতে তোমার পাপ ক্ষয় হয়ে আসবে।

বেশ তাই করবে। কিসের আপত্তি। গণ্ডার মারতে পারি তো ইঁহুর বিলি করতে কষ্ট হবে না। ঐ টাকায় বাড়ী কিনব একটা। সেই ভেবেই দম ধরে আছি। অঘোর কথাটা বলিয়া দেখিল অপরাজিতা অশ্রু দিকে চাহিয়া কি যেন ভাবিতেছে।

আচ্ছা আমি এখন উঠি। এলাম শুধু ঐ ঘরটা নেবার জন্তে। ঐ কথা বলবার জন্তে তুমি এলুনি যাও। রাত্রে শুনে আগাম এক মাসের ভাড়াটাও দিয়ে দোব। ঠিক তো। চলি। বলিয়া অঘোর তাহার গলাবন্ধ কোট গায়ে চড়াইল।

অপরাজিতা আর কথা বলিল না। সে যেন তখনও কি ভাবিতেছে। অঘোর চলিয়া গেলে হতাশ হইয়া বিছানায় শুইয়া পড়িল।

একটু পরে বাহির হইতে ডাক আসিল, অপু মা! ও অপু মা!

শুয়ে পড়েছ ? পরক্ষণে দরজা খুলিয়া নীরদাসুন্দরী ঘরে ঢুকিল। বলিল, সেই যে বলে এলে কথাটা ! তাই ভাবছি। এক কাজ করলে হয় না। ঐ ঘরে একটা শাস্তি স্বস্ত্যয়ন করলে কেমন হয় ? ভাড়া খাটাতে হবে যখন, তখন ফেলে রাখি কি করে। যে সব মুখ-পোড়া ভাড়াটে আছে, বাইরের কেউ এলে জানিয়ে দেবে। নিজেরা নেবে না। দেবে না অন্য কাউকে। মজা দেখাতে চায় আমাদের। কি বলো ?

অপরাজিতা হাসিয়া বলিল, কেউ ভাড়া না নেয়, নিতে না দেয়, আমাকে দিও। কত ভাড়া নেবে বল ? কম হওয়া চাই কিন্তু। বাইরের ঘর করব। লোক এলে বসবার জায়গা নাই একটুকুও।

নীরদাসুন্দরী অবাক হইয়া বলিল, তুমি নেবে। তার আর কথা কি মা ! আপাততঃ যা খুসী তাই দিও। দশ টাকা ছিল, আট টাকা দিও। কি বরাবরের জন্মে নেবে তো ? না ভয়ে ছেড়ে দেবে এক মাস দেখে। বলিয়া তাহারপানে স্থির ভাবে তাকাইয়া রহিল।

অপরাজিতা গম্ভীর হইয়া বলিল, ঘর নিচ্ছি আমার জন্মে। ঠর তো ও সব খেয়াল নাই। যে সে আসে, ঘরে এসে ওঠে। একটা ঘর, তাতে অত জিনিস। বসি কোথায়, বসাই কোথায় তার ঠিক নাই। নিজের গরজ। জানো তো রূপণ মানুষ উনি। খরচ বাড়াতে গেলে চীৎকার করে ওঠেন। তা মাসি, আমি নিচ্ছি। আমিই ভাড়া দোব আমার হাত খরচ থেকে। তাই বলি পাঁচ টাকায় ঠিক করে নাও। ছ মাসের ভাড়া অগ্রিম দোব আমি। কিন্তু একটা কথা গোপন রাখবে বাপু ! ঠুকে বলবে, সবাইকে বলবে যে ঘরখানা এমনি ওদের ব্যবহারের জন্মে আপাততঃ ছেড়ে দিলাম। তবে আমাকে রসিদ আমারই নামে দিতে হবে।

খুসী হইয়া নীরদাসুন্দরী বলিল, বেশ তাই হবে মা। তোমার কথা কি ফেলতে পারি। শশীপদকে বলে তাই ব্যবস্থা করছি।

অপরাজিতা বলিল, তবে টাকাটা নিয়ে যাও। রসিদটা সন্ধ্যায় যেন আমাকে চুপি চুপি দিয়ে যেও। পাঁচকান না হয় যেন।

বান্ধ খুলিয়া টাকা বাহির করিয়া নীরদামুন্দরীর হাতে দিতেই সে আর এক মুহূর্ত্ত অপেক্ষা করিল না। খুসী মনে চলিয়া গেল। যাইতে যাইতে বলিল, পাঁচকান হবে না কথা দিচ্ছি। আমি যা বলব তাই হবে। তুমি আমি ছাড়া আর কেউ জানতে পারবে না।

নীরদামুন্দরী চলিয়া যাইতে অপরাজিতা এক চোট হাসিয়া লইল। সেও কম ব্যবসায়ী নয়। কি রকম মাল সওদা করা গেল। স্বামীকে একথা জানাইলে সে যে কি আদর করিবে তাহা ভাবিতে ভাবিতে অপরাজিতা পুলকিত হইয়া উঠিল।

অনেক রাত্রে অঘোর দোকান হইতে ফিরিল। আসিয়াই এই অপ্রত্যাশিত ও অভাবনীয় খবর পাইয়া খুসীতে অপরাজিতাকে বুকে জড়াইয়া ধরিয়া বার বার আদর করিতে লাগিল।

অপরাজিতা বলিল, ভাড়া কিন্তু পনেরোর কম হবে না। আর আগাম একশত টাকা দিতে হবে। না হলে সব ভেঙ্গে দোব। তারপর ফিস ফিস করিয়া বলিল, মাত্র পাঁচ টাকায় ব্যবস্থা করে ফেললাম।

রসিদ দেবে তো ?

রসিদ আগেই আদায় করে নিয়েছি। টাকাটা দাও। বলিয়া অপরাজিতা রসিদটা দেখাইল।

অঘোর বলিল, আচ্ছা মেয়ে তুমি !

তুমিও লোক কম নও। লোকে মরছে। মরতে বসেছে। আর তুমি সেই ফাঁকে চড়া দরে মাল ছাড়বার জন্তে এখন থেকে বেশী মাল কিনে মজুত করে রাখছ। এ কাজ কি ভাল হবে ?

ভাল না হলে তুমি ঘর ভাড়া করলে কেন ?

অশ্রায় করেছি। করা উচিত ছিল না।

বটে !

তা নয় তো কি ? বকশিসটা দাও দেখি ? কেমন হাত তোমার ! জল তো গড়ে না। কি কষ্টে সংসার চালাই তা আমিই জানি।

ওটা আমার কাছে মজুত থাক না। সুদে আসলে এক সঙ্গে দোব।

## পাঁচ

বিধায়কের এবার কলিকাতায় নূতন বাসার সবে পত্তন হইল। স্ত্রী এবং একভাই লইয়া তাহার সংসার। ভাইটি এবার দেশ হইতে ম্যাট্রিক পাশ করিয়া কলিকাতার কলেজে পড়িতে আসিয়াছে। ভাইয়ের জন্ম বাধ্য হইয়া বাসা করিতে হইল, বলে বিধায়ক তাহার মা বাপকে। আর স্ত্রীকে বলে, হ'ল তো এবার বাসা করা। তোমারই জন্তে। যে তাগিদ।

বহুদিন হইতে বিধায়কের স্ত্রী বাসা করিবার জন্ম স্বামীকে বলিয়া আসিতেছিল। প্রথমে অনুরোধ। তারপরে উপরোধ। শেষে তাহা জুলুমে পরিণত হইল। যখন তাহাতেও ফল ফলিতেছে না, তখন সপ্তাহান্তে বাড়ী আসিলে স্ত্রী পাশ ফিরিয়া গুইত। কথা বলিত না। সাধারণ কাপড় ছাড়িত না। বেশভূষার দিকে সেদিন নজর রাখিত না অশ্রু অছিল। বিধায়কের বাপ মায়ের বিশেষ অমত ছিল না। তবে বাসা করিলে পুত্রমুখ দেখা কচিং হইবে এই আশঙ্কাও অমূলক নয়। তাহা ছাড়া টাকা পয়সার কথা তো আছেই। সবই সেখানে খরচ হইয়া যাইবে, তাহাদের ভাগ্যে কি জুটিবে ভগবান জানেন। যে বো। বলা তো যায় না। তবু যতদিন তাহাদের অধীনে আছে থাক। রাখা যায় ভালই। বেশীদিন যে রাখা যাইবে না সে অন্তিম প্রবল হইয়া উঠিতেছে। তবু ভালো যে বিধায়ক এখনও তাহার বাপ মায়ের অন্তিম আশ্রয় আছে। এতদিন বিধায়ক হারিসন রোডের শান্তিনিকেতনে থাকিত। কলেজের পড়া হইতে চাকুরী আরম্ভ হওয়া পর্য্যন্ত সে আর কোথাও আশ্রয় লয় নাই। দেশ কাছেই এবং সেই সুবিধার জন্ম প্রতি শনিবারেই সে বাড়ী যাইত। সুতরাং বাসা করার সুবিধা ও আরাম হইতে সে একেবারে



বঞ্চিত হয় নাই। অফিসের ছুটির সংখ্যা কম নহে। তাহার উপর রবিবার তো আছেই। কাজেই বিনা ঝগড়াটে বাড়ীতে থাকা তাহার কম ঘটিয়া উঠিত না। বাসা করার মত আর হাজার নাই। তাহার বন্ধুদের মধ্যে যাহারা বাসা করিয়াছে, অথচ দোসর বলিতে যাহাদের নাই, তাহাদের অফিসের খাটুনি অপেক্ষা সংসারের দেখাশুনা, আনা-নেওয়া করিতে প্রাণান্ত পরিশ্রম করিতে হয়। এত সব পরিশ্রম করিতে বিধায়ক পারে না। এবার আর তাহাকে সে ভাবনা ভাবিতে হইবে না। সেই আশ্বাস দিয়া বিধায়কের স্ত্রী দেওর অবলম্বন করিয়া আসিয়াছে। সংসারের নিত্যনৈমিত্তিক কাজে ওস্তাদ বলিয়া মনোজের খ্যাতি আছে। বৌদির দোসর সেই হইল।

বিকালের গাড়ীতে মনোজ বৌদিকে সঙ্গে করিয়া কলিকাতায় আসিয়াছে। হাওড়া স্টেশনে বিধায়ক হাজির হইয়া তাহাদের লইয়া আসিল। স্টেশন হইতে একখানা ট্যাকসী ভাড়া করিয়া তাহারা সোজা মানিকতলার বাসায় আসিয়া হাজির।

মস্ত বড় বাড়ী। বহু অংশে তাহা বিভক্ত। একখানি ছইখানি করিয়া ঘর লইয়া বহু পরিবার এই বাড়ীতে বাস করে। কোলাহলের অন্ত নাই। আপন আপন সংসার লইয়া সকলেই নির্বিবাদে কর্ম-জীবন চালাইয়া যাইতেছে। কোথাও দ্বন্দ্ব, কোথাও মিলন—এই বিচিত্র কোলাহলের পরশ মাখিয়া বিচিত্র পুরীর নরনারীরা বেশ দিন কাটাইয়া যাইতেছে।

মাধবী নূতন বাসায় আসিয়া উঠিয়াছে। একে সহর। তাহার উপর কলিকাতার মত সহর। সুতরাং সব কিছুই তাহার কাছে নূতন এবং আশ্চর্য্য ঠেকিতে লাগিল। কলিকাতার প্রশস্ত রাস্তায় সারি সারি লোকের যাতায়াত, গাড়ী ঘোড়ার সঘন গতিবিধি, ছইখানের অজস্র সাজান দোকান, প্রকাণ্ড বড় বড় বাড়ী, এই সব দেখিতে তাহার বড়ই ভাল লাগিল। চলন্ত ট্যাক্সিতে বসিয়া বড়বাজার হইতে আরম্ভ করিয়া মানিকতলা পর্যন্ত সে অনিমেষ নয়নে দেখিয়া

চলিল। মাধবী যতই দেখিয়া যায় ততই যেন মুগ্ধ হইয়া পড়ে। সহরের যেন শেষ নাই। চলিয়াছে তো চলিয়াছেই। পল্লী ও সহরের ব্যবধান এইখানে চোখে পড়ে। শ্রাম আন্তরণের পরিবর্তে বাঁধান রাস্তার রুদ্ধতা তাহার চোখে যেন ধাঁধা লাগাইয়া দিতেছে।

বিধায়ক দশটায় অফিস চলিয়া গিয়াছে। তাহার ভাইও কলেজে পড়িতে গিয়াছে। একা মাধবী নূতন গৃহস্থালী গোছাইতে ব্যস্ত। কাল সবে এই নূতন বাসায় আসিয়াছে। বাসা ঠিক হওয়ার সঙ্গে সঙ্গেই বিধায়ক দেশে চিঠি দিয়া ভাইয়ের সঙ্গে স্ত্রীকে পাঠাইবার জন্ত বাড়ীতে চিঠি দিয়াছিল।

যথারীতি সব আসিয়া গিয়াছে। নূতন সংসার পাতাইতে অনেক কিছুই দরকার। কাল সমস্ত বিকাল ধরিয়া দেওর ভাজে খাটিয়াছে। তবু কিছুই হয় নাই। এখনও জিনিসপত্র কেনার অনেক বাকী।

এই ঘরে থাকিত মালতীরা। কে মালতী? কেন আসিল এবং গেল সে জানে না। আসিয়াছে ভালই। গেল সে তো আরও ভাল। না গেলে এই ঘর পাইত না। অগ্ন ঘর পাইত কিনা সন্দেহ। মালতী আসিয়াছিল বলিয়া সে ঘর পাইল। কারণ সে চলিয়া গিয়াছে। অগ্ন কেহ আসিলে যদি না যাইত।

মালতীর প্রতি প্রসন্ন হইল মাধবী। এখন ইচ্ছা হইল একবার তাহাকে দেখিতে পাইলে ভাল হয়।

মালতীরা চলিয়া যাওয়ার পর আবার একদফা চুণ ফিরাইয়া দিয়াছে বাড়ীওয়াল। দেওয়ালের গজাল একটিও নাই। মালতীরা যাইবার সময় সবগুলি তুলিয়া লইয়া গিয়াছে। এখনও যে কয়টি লাগিয়া আছে, বোধ হয় সেগুলি সাধ্যমত চেষ্টা করিয়াও তুলিতে পারে নাই বলিয়া তাহারা টিকিয়া আছে আশে পাশে অনেকটা স্থান ক্ষত করিয়া।

সংসারের নিত্যব্যবহার্য জিনিসের একটা ফর্দ করিয়া মনোজ প্রথমে মুদিখানার জিনিস, পরে কয়লা, কাঠকয়লা, লোহার উতুন, এনামেলের

হাঁড়ি, বাঁটি, শিল নোড়া, কাঁসার থালা বাসন, ঘটি বাঁটি ইত্যাদি সব কিছু একে একে আনিয়া শেষে বাজার করিয়া আসিল। কাল রাত্রে মাছের ঝোল ভাত খাইয়াছে। বেশী রান্না-বাড়ী করিবার সময় ছিল না। এই সমস্ত আনিয়া গোছগাছ করিতে রাত্রি একটা বাজিয়া গিয়াছিল।

পাশের ভাড়াটেগুলি ইহাদের বহুপূর্বেই শয্যা লইয়াছিল। এত রাত্রি পর্য্যন্ত তাহারা জাগে না এবং ইহাদের নূতন সংসারের খোঁজ খবর লইতে বড় একটা কেহ আসে নাই।

ছুইখানি ঘর জল দিয়া ধুইয়া মুছিয়া মাধবী একবেলার মধ্যে বাসের যোগ্য করিয়া লইল। চুণের জল মেঝের স্থানে স্থানে জমাট বাঁধিয়া গিয়াছিল। চুণের সোঁদা ও তীব্র গন্ধে মাধবীর খুবই অস্বস্তি বোধ হইতেছিল। যাহা হউক রান্নাবাড়া শেষ করিয়া বিছানা পাতিয়া সে শুইল। স্বামীকে শোয়াইল। এবং পাশের ছোট ঘরটিতে মনোজ নিজে বিছানা পাতিয়া ইতিপূর্বেই বারকয়েক গড়াগড়ি দিয়া কোমরের ব্যথা মারিয়া লইয়াছে।

বিধায়ক মনোজকে ভর্ত্তি করিয়া দিল স্কটিশচার্চ কলেজে। তাহা বাসা হইতে বেশী দূরে নয়। সময়ে সময়ে বাসায় আসিয়া খাইতে পারিবে লেজার পিরিয়াডে। সে সুবিধাও উপেক্ষণীয় নয়। নূতন বাসা। সবাই নূতন। অচেনা অজানা। কত সুবিধা অসুবিধা আছে।

মনোজ কলেজ চলিয়া গিয়াছে নূতন উত্তমে। বিধায়ক অফিস গিয়াছে জ্বরী হাতে সাজা পান চিবাইতে চিবাইতে। মাধবী এখন একা বিছানায় শুইয়া আরাম ভোগ করিতে লাগিল। কি ভাবে সাজাইলে ঘরখানি মানায়, এই সব চিন্তা করিতে করিতে তাহার ঘুম মাথায় গিয়া উঠিল। বার কয়েক এ পাশ ও পাশ করিয়া সে একবার উঠিয়া দাঁড়াইল। নিজের একখানি কুমারী বয়সের ফটো, বিবাহের পর বাপের বাড়ীতে ছুইজনের একসঙ্গে তোলা ভাল

একখানি ফটো সোজা করিয়া টাঙ্গাইয়া রাখিল। দরজার গোড়ায় একটু ময়লা জমিয়াছিল তাহা পরিষ্কার করিতেই রান্নাঘরের দিকে তাহার নজর পড়িল।

সামনের তাকে মশলাগুলি সাজাইয়া রাখিয়াছে। রান্নাঘরের উনান হইতে তখনও আগুনের রেখা মিলাইয়া যায় নাই। ধিকি ধিকি করিয়া আগুন জ্বলিতেছে। পাশে হাঁড়ি কলসী থালা বাটি ঘটি বাঁটি শিল নোড়া এবং আনাজের কিছু অংশ ইতস্ততঃ পড়িয়া রহিয়াছে। সেগুলি আর একবার গোছাইয়া পরিষ্কার করিয়া সাজাইয়া রাখিল।

মাধবী একবার মনে করিল, উঠিয়া গিয়া রান্নাঘরের ও কোণটা পরিষ্কার করিয়া তারপর নিশ্চিন্তে বসিয়া আরাম করিবে। কিন্তু সকাল হইতেই বেলা একটা পর্য্যন্ত খাটিয়া খাটিয়া তাহার কোমর ধরিয়া গিয়াছে। শরীরের ক্লান্তি যথেষ্ট দেখা দিলেও নূতন বাসার নূতন গৃহিণী হওয়ার আনন্দ তাহাকে যেন পাইয়া বসিল। আরাম করিয়া একটা নিঃশ্বাস ফেলিয়া মাধবী ভাবিল, এতদিন পরে এই সংসার তাহার কর্তৃত্বে চলিতে থাকিবে। ছোট হইলেই বা, সংসার তো বটে। বহু দিন হইতে তাহার এই ইচ্ছা মনে মনে বিন্দু বিন্দু করিয়া জমিতেছিল। এজন্ম তাহাকে কম বেগ পাইতে হয় নাই। অনেককে বেগ দিয়াছেও। আজ তাহার প্রতিষ্ঠা দেখিয়া মনে মনে সে সত্যি খুশী হইল।

কলিকাতা দেখিবার সাধ মাধবীর বহু দিন হইতে মনে জাগিয়াছিল। বহুদিন বহুবার স্বামীকে অনুরোধ করিয়াও কোন ফল হয় নাই। বহু দিনের সাধ এবার মিটিল।

মাধবী উঠিয়া গিয়া জানালার সামনে দাঁড়াইল। ছোট গলি দিয়া দুই একটি করিয়া লোক, রিকসা চলিতেছিল। ছোট ছোট ছেলে মেয়েরা ছুটাছুটি করিয়া বেড়াইতেছে। রাস্তার ও পাশের ঘরগুলির দিকে উঁকি ঝুঁকি মারিতে তাহার একবার ইচ্ছা হইল। রাস্তার সামনের ঘরখানির জানালায় কালো পর্দা দেওয়া আছে।

তাহারই কাঁক দিয়া স্পষ্ট ভাবে দেখা গেল একটি তরুণীকে। তাহারই মত। বিস্তৃত পালকে শুইয়া একখানি বই পড়িতেছে। বয়স তাহার চেয়ে বছর দুই তিন বেশী হয়ত হইতে পারে। গড়নও তাহারই মত, তবে রূপের আর অন্ত নাই। টানা টানা চোখে, প্রশান্ত মুখে এবং অপরূপ সৌন্দর্য্যে সে মহিমান্বিতা হইয়া উঠিয়াছে। এমন রূপ মাধবী জীবনে কখনও দেখে নাই। একদৃষ্টে তাহাকেই দেখিতে লাগিল। আলাপ করিবার প্রবল ইচ্ছা মনে জাগিল, কিন্তু হঠাৎ তাহার সঙ্গে কথা বলিবার সাহস জোগাইল না। যদি কিছু সে মনে করিয়া বসে। চারিটার পর কলেজ হইতে দেওর আসিবে। ছয়টার সময় অফিস হইতে স্বামী আসিবে। সুতরাং মাধবী তাহাদের জন্ম ময়দা মাখিয়া খানকয়েক পরটা করিয়া রাখিবে। গ্রামে বিকাল বেলায় পুকুরে গিয়া গা ধুইতে যাইত তাহারা সদলবলে। এখানে সে সুবিধা নাই। কলের জলে স্নান। উপরে যাহারা থাকে তাহারা কোণের দিকের ঘেরা একটা জায়গায় স্নান শেষ করিয়া লয়। সাড়ে তিনটায় কলে জল আসে। তখন হইতেই এ দিকের মেয়েরা কাজ কর্ম আরম্ভ করিয়া দেয়। একের পর এক গা ধুইয়া লইতে পাঁচটা বাজিয়া যায়।

মাধবী নূতন আসিয়াছে। কোথায় কি করিতে হয়, কে কি বলিয়া বসে, ভাবিয়া আগে হইতেই নিজের কাজ সারিয়া লয়। কাহারও কথার অপেক্ষা সে রাখিতে চায় না। চারিটার মধ্যে গা ধোয়া সারিয়া দেওরকে জল খাইতে দেয়। মনোজ জল খাইয়া প্রথম প্রথম বৌদির সঙ্গে গল্প করিয়া রান্নার ব্যবস্থায় সাহায্য করিয়া শেষ বেলাটুকু কাটাইয়া দিত। এখন কলেজের অনেকের সঙ্গে বন্ধুত্ব করিয়া লইয়াছে। কলেজ হইতে আসিয়া জলযোগ সারিয়া লইয়া সে খেলা করিতে বাহির হইয়া যায়। বৌদির সঙ্গে গল্প করার আর সময় হয় না। ইচ্ছাও থাকে না।

মাধবী একা বসিয়া সমস্ত বেলাটা কাটাইয়া দেয়। এখানকার নিঃসঙ্গ জীবনে ইহারই মধ্যে তাহার অবসাদ আসিয়াছে। এখানে

এ পাড়ার ও পাড়ার সঙ্গীসাথীরা তো আসেই না, বিশেষ করিয়া এ বাড়ীর মেয়েরা পর্য্যন্ত তাহার সঙ্গে সারা দুপুরের মধ্যে একবার দেখা করিতে আসে না, ভাবিতে তাহার প্রাণটা আনচান করিয়া উঠে।

স্বামী যখন বাড়ী আসে তখন আর বেলা বেশী থাকে না। তখন হইতে তাহার জীবনে নব বসন্তের আগমন হয়। সমস্ত সন্ধ্যাটা তাহার মন-বসন্তের ফুল ফলে লীলায়িত হইতে থাকে। সন্ধ্যার দিকটা এইজন্য সে ভাল করিয়া সাজিয়া বসিত। বিকালে গা ধুইয়া ভাল একখানা রঙীন কাপড় পরিয়া, পাউডার মাখিয়া, কপালে বড় একটি টিপ পরিয়া যতদূর সম্ভব পরিষ্কার পরিচ্ছন্ন হইয়া থাকিতে চেষ্টা করে। দিনের বেলায় এতটা করিবার সময় থাকে না। সকালে স্নান সারিয়া সেই যে রান্নাঘরে ঢোকে, তখন হইতে বেলা এগারোটা পর্য্যন্ত কথা বলিবার আর তাহার সময় থাকে না। রান্নাবাড়া করিয়া স্বামী দেওরকে খাওয়াইতে খাওয়াইতে সকালের দিকটা বড় তাড়াহুড়া করিয়া কাটিয়া যায়। ও ঘরে দেওর আপন মনে পড়াশুনা করে। বাজার করা ছাড়া এদিকে আসিয়া ছুই একটি রসিকতা করিয়া যায়। রসিকতা শুনিবার জন্য হাসিয়া হাসিয়া কথা বলার ধরণ ভাল লাগিলেও রান্নাঘরের আবহাওয়া যেন অণু রকমের। ঘরখানা কি রকমের যেন।

মাধবীর বিরক্ত ধরিয়া যায়। মধ্যে মধ্যে উঠিয়া গিয়া স্বামীর কাছে ছুই চারি দণ্ডের জন্য দাঁড়াইয়া থাকে। ছুই চারিটি কথা বলিয়া আমোদ পায়। দেয়ও। রসিকতা করার পর স্বামীর কাছ হইতে অধিক মাত্রা-ছাড়ান রসিকতায় মাধবী লজ্জায় রাঙা হইয়া উঠে। আর দাঁড়ায় না সেখানে।

নূতন বাসায় আসিয়া অবধি বিধায়ককে কোন কাজের ভার লইতে হয় নাই, সুতরাং সে বেশ আরামেই আছে। মাধবী নূতন বাসায় আসিয়া অবধি গৃহিণীপনার পূর্ণ সুযোগ পাইতেছে, সুতরাং সে কম আরামে নাই। মনোজ স্কুলের প্রান্তভাগ ছাড়াইয়া কলেজ জীবনে

পদার্পণ করিয়াছে, ছাত্রজীবনের নূতন আলোকের মুখ দেখিয়াছে ; তাহা ছাড়া কলিকাতার আবহাওয়ায় খাপ খাওয়াইয়া লইয়া অনেক বন্ধু লাভ করিয়াছে সে, সুতরাং তাহার মনে আনন্দের সীমা নাই । দিন ভালই কাটিয়া যাইতেছে সকলের ।

দেখিতে দেখিতে বিধায়কের কর্তৃত্বে মাধবীর গৃহীণপনায় এবং মনোজের কৰ্ম্মনিপুণতায় নূতন বাসার শ্রী ফিরিয়া গেল । একটি দুইটি করিয়া মাধবী ফেরিওয়ালার কাছ হইতে খেলনা টুকিটাকি জিনিস কিনিয়া ঘর সাজাইয়া ফেলিল । অফিস হইতে ফিরিবার পথে বিধায়ক দুই একটি করিয়া ডেক-চেয়ার, র্যাক, আয়না, ভাল ছবি বাঁধাইয়া আনিয়া ঘর সাজাইতে লাগিল । মনোজ রাস্তার ধারে নূতন কিছু দেখিলেই বৌদিকে সেকথা জানাইতে দেবী করে না । কলেজ যাইবার মুখে মাধবী তাহার পকেটে পয়সা দিয়া মনোজের দরকরা জিনিসের ফরমাস দিয়া রাখে ।

তিন জনের আপ্রাণ চেষ্টায় নূতন বাসার যে রূপ কুটিয়া উঠিয়াছে তাহা দেখিয়া তাহারা নিজেরাই মনে প্রাণে পুলকিত হইয়া উঠিল ।

একে একে এত বড় বাড়ীর সকলের সঙ্গে দেখিতে দেখিতে কেমন করিয়া তাহাদের পরিচয় জমিয়া উঠিয়াছে তাহা শুনিবার মত । এক বাড়ীতে কিছুদিন থাকিলে অমন মেলামেশা হওয়াই স্বাভাবিক । ও ঘরের অপরাজিতার সঙ্গে মাধবীর এখন গলায় গলায় ভাব । পাশের ঘোড়শীর সঙ্গে গঙ্গাজল পাতাইয়া ফেলিয়াছে । বাড়ীওয়ালী দজ্জাল বৌটি পর্য্যন্ত মাধবীকে স্নানজরে দেখে । তাহার পিসিমা নীরদা-সুন্দরী মাধবীকে এখন বৌমা বলিয়া ডাকে । আদর ও সোহাগ জানাইয়া কথা বলিতে তাহার ভালই লাগে । অথচ এই সূচিবায়ু-গ্রস্তা নীরদাসুন্দরীর অত্যাচারে মাধবীর ঘরে আগে যাহারা ছিল তাহারা পলাইয়া বাঁচিল ।

নীরদাসুন্দরীকে ভয় খায় না এবং ঘৃণা করে না এমন লোক এ বাড়ীতে একজনও নাই । অথচ নূতন ভাড়াটে মাধবী কেমন করিয়া

মন্ত্রমুখের মত এই সাপিনীকে বশ করিয়া লইয়াছে ভাবিতে গেলে  
এতবড় বাড়ীর সকলেই অবাক হইয়া যায়।

তিন মাস কাটিতে না কাটিতে মাধবী ঘর দুইখানিকে এবং বাড়ী-  
খানিকে নিজের মত করিয়া লইল। এতদিন সে সমস্ত ছপুর বেলাটা  
একলা কাটাইয়া দিত। ইহাতে তাহার অস্বস্তির সীমা থাকিত না।  
নির্জন কক্ষে এ ভাবে দিনের পর দিন কাটাইতে কেই বা পারে।  
সমস্ত ছপুরটা একবার শুইয়া একবার জানালায় দাঁড়াইয়া বসিয়া  
কাটাইয়া দিত। এখন সমস্ত ছপুরটা তাহার ঘর জম-জমাট থাকে।

বাড়ীর যত মেয়ে আছে সব একে একে সাধিয়া মাধবীর ঘরে  
আসর জমায়। তরুণীরা বসে একধারে, বয়স্কারা বসে অগ্ৰধারে। ছোট  
ছোট ছেলে মেয়েরা দুই দলকে দেখে ও নাচিয়া নাচিয়া ফেরে।

মাধবী এই সবই চায়। পাড়াগাঁ হইতে অশিক্ষিতা মার্জিত রুচি-  
হীনা মাধবী এই তিন মাসের মধ্যে যে এমন মিশুক ও প্রিয়दर्শিনী  
হইয়া উঠিবে তাহা কেহই ভাবিতে পারে নাই।



শশীপদ স্ত্রীর সঙ্গে কিছুতেই আঁটিয়া উঠিতে পারে না। নির্বিরোধী মানুষ সে। তাহার স্ত্রী সে দিক দিয়া একেবারে বিপরীত। সমস্ত বাড়ীখানাকে যেন সে নিজের কর্তৃত্বে রাখিতে চায়। প্রত্যেকটি পরিবার যেন তাহার মতামতের অপেক্ষা করিয়া চলে ইহাই সে চায়। রোগা ও ছোট হইলে কি হইবে, তেজ তাহার মুখ চোখ দিয়া সব সময় বাহির হয়। সামনের দিকের বড় ভাড়াটিয়ার বৌ শশীপদের স্ত্রীর অনুরক্তা। সে এ বাড়ীর মধ্যে বেশী ভাড়া দেয়। অথচ তাহাদের সাড়া শব্দ পাওয়া যায় কম। তাহার পাশের একখানি ঘর লইয়া এক বৃদ্ধা তাহার একটি ছেলে লইয়া বাস করে। তাহার দাপটটাই সব চেয়ে বেশী। সমস্ত বাড়ীখানা সে যেন চষিয়া বেড়ায়। সমস্ত দিকে তাহার খর নজর। কে কি করে, কি খায়, সব খোঁজ তাহার রাখা চাই। কোন কিছু বলিতে কেহ অনিচ্ছা প্রকাশ করিলে সে কৌশলে তাহা বাহির করিয়া তবে ছাড়ে। শশীপদের স্ত্রীর উপরে টেকা দিতে এই বৃদ্ধা সব সময় সচেষ্ট। বৃদ্ধা কথায় কথায় সব সময় বলে, বাড়ীওয়ালী বলিয়া সে কি তাহার মাথা কাটিতে পারে। মাসে মাসে সে ভাড়া দিবে। পাই পয়সা বাকী রাখিবে না। স্মৃতরাং কাহারও কোন কথার ধার সে ধারে না। অপরাজিতা তাহাকে ভালমাসি বলিয়া ডাকে। তাহার দেখাদেখি অনেকেই ঐ নামে ডাকিতে থাকে। ভালমাসি অপরাজিতাকে সুনজরে দেখে। ভালমাসির কাজকর্ম নাই বলিলেই হয়। নিজে বিধবা সিদ্ধপঙ্ক ফুটাইয়া লয়। ছেলের রান্না সকালে সকালে সারিয়া সে সমস্তক্ষণ এ দিক ও দিক করিয়া কাটায়। অপরাজিতার ঘরে ইজিচেয়ারে বসিয়া তাহার সঙ্গে গল্প করিতে সে ভালবাসে। ইজিচেয়ারে বসিবার লোভেই অপরাজিতার সঙ্গে তাহার ভাব। বেশ নরম ও আরামদায়ক,

হাত পা মেলিয়া স্বস্তির নিশ্বাস ফেলা যায়। ইহা ছাড়া, অপরাজিতাকে বেশী ভালবাসে না কে, সে প্রশ্নের উত্তর দিতে এ বাড়ীর সকলকে মাথা ঘামাইতে হয়।

নীরদাসুন্দরীর মত অত ছুঁচিবায়ের লোককেও অপরাজিতার প্রশংসা করিতে শোনা যায়। শশীপদর ছোট মেয়ে রেবা, বড় ভাড়াটিয়ার সেজ মেয়ে রেখা এবং কোণের দিকের ঘরের অর্ধেন্দুর কচি ছেলে পুর্ণেন্দু সব সময় অপরাজিতার কাছে কাছে ঘোরে। নিজের ছেলে পিলে হয় নাই বলিয়া সে পরের ছেলে পিলে লইয়া থাকিতে ভালবাসে। তাহার স্বামীর বড়বাজারে একটি বড় দোকান আছে। বেশ লাভ হয় এখন। সুতরাং অল্প খরচ বাদে সমস্ত টাকার অংশই ব্যাঙ্কে জমিতে থাকে। তাহাদের অবস্থা ভালই বলিতে হয়।

ভালমাসি আসিয়া অপরাজিতাকে খবর দিয়া গেল, পিসি-ভাইঝিতে ঝগড়া বাধিবার উপক্রম হইয়াছে। নীরদাসুন্দরী ভাইঝি মনোরমাকে খুব গাল পাড়িতেছে। মনোরমা এখনো সে কথা শুনিতে পায় নাই তাই রক্ষা, নইলে একটা কুরুক্ষেত্রকাণ্ড বাধিয়া যাইত এতক্ষণ।

ভালমাসির সঙ্গে মনোরমার বনিবনা নাই। নীরদাসুন্দরীর সঙ্গে তাহার বিশেষ অবনিবনাও নাই য়। সুতরাং নীরদাসুন্দরীর পক্ষ লইলে মনোরমা একটু হিমসিম খাইয়া যাইবে। ভালমাসি আর কোন কথা বলিল না। ভাবিতে ভাবিতে সেখান হইতে চলিয়া গেল।

শশীপদর স্ত্রী মনোরমা মাঝবয়সী। পাতলা ও টেঁকি। কথায় তাহার সঙ্গে কাহারও পারিয়া উঠা দায়। এতদিন সে-ই নীরদাসুন্দরীকে খাতির করিয়া আসিত নিজের পিসিমা বলিয়া। কিন্তু দিন দিন ভাড়াটিয়াদের সঙ্গে কল লইয়া যাহা করিয়া চলিতেছে তাহাতে ও দিককার ঘর ছুঁইখানাতে আর কেহ আসিবে বলিয়া মনে হয় না। আঠারো টাকার ভাড়া ছাড়া সহজ কথা নয়। আর এরকমভাবে চলিবেই বা কেন।

মাধবীরা ও দিককার ঘর ছাড়িয়া বড় ভাড়াটিয়াদের পাশের

একখানা ঘর ও নীচের দিকের একখানা ঘর লইয়াছে। নীচের ঘরে মনোজ থাকিত এবং তাহা কতকটা বাহিরের ঘরের মত ব্যবহার করা চলে। নীরদাসুন্দরীর যে তেজ, তাহার সহিত কথা বলা দায়। ভাল সে বাসে কিন্তু জলের বেলায় ও সব আবদার মাখবী কেন কাহারও রাখে না। সুতরাং জল পাওয়া ছুফর হইয়া উঠিল। ফলে, হয় তাহাদের এ বাড়ী ত্যাগ করিতে হয়, নইলে সদরদিকে উঠিয়া যাইতে হয়। এই লইয়া পিসি-ভাইঝিতে ঝগড়া। কলতলার ব্যাপারে নিত্যনৈমিত্তিক চীৎকার ভাল লাগে না। সব কোলাহলের কেন্দ্র এই কল যেন। বাড়ীখানাও কোলাহলমুখর। বিধায়ক গোলমাল ভালবাসে না। কলে গিয়া স্নান করিতে পায় না বলিয়া সে কিছু না বলিলেও মনোজ মধ্যে মধ্যে অল্পযোগ করে তাহার বৌদিকে। নীরদাসুন্দরীকে সে ভাল চক্ষে দেখিতে পারে না। পারতপক্ষে সে উহার ধার কাছ দিয়া ঘেঁসে না। এই সব অনাচার সহ্য করিতে পারে না বলিয়া সে প্রায়ই আড়াল হইতে ছুই একটি কথা কড়াভাবে শুনাইয়া সরিয়া পড়ে।

মনোজ একদিন কলঘরে গিয়া দেখিল কল দিয়া সুর সুর করিয়া জল পড়িতেছে। প্রায়ই এমনি হয়, তাহাতে স্নান করার অসুবিধা ঘটে। নীচে গলা বাড়াইয়া দেখিল নীরদাসুন্দরী একখানা গামছা পরিয়া একটা বালতিতে করিয়া ক্রমাগত জল দিয়া বারান্দা উঠান ধুইতেছে। দেখিতে দেখিতে তাহার অধৈর্য্য হইল। চীৎকার করিয়া বলিল, কল বন্ধ করুন! কলটা বন্ধ করুন না!

নীরদাসুন্দরী উপরে তাকাইয়া দেখিল মনোজ কথা বলিতেছে। সুতরাং তাহাকে গ্রাহ্যই করিল না। আপন মনে কল হইতে জল লইয়া বালতি করিয়া গা ধুইতে বসিল।

মনোজ আবার চীৎকার করিয়া বলিল, কলটা বন্ধ করুন না! কথা বললে গ্রাহ্য করেন না কেন? আমরা কি কারও অল্পগ্রহের ওপর এখানে আছি? ভাল চান তো এখুনি বন্ধ করুন কল, নইলে নীচে গিয়ে বন্ধ করে আসব তখন বুঝবেন। ভাল কথা বললে শোনা হয় না, না কি?

নীরদাম্বন্দরী আর একবার আড়চোখে চাহিয়া যেন মনোজের কথা গ্রাহ্যের মধ্যেই আনিলা না। করছি বন্ধ। বলিয়া যাহা সে করিতেছিল করিতে লাগিল।

মনোজের আর সহ্য হইল না। খানিকক্ষণ অপেক্ষা করিয়া নীচে নামিয়া আসিয়া কল বন্ধ করিয়া দিয়া আবার উপরে চলিয়া গেল।

নীরদাম্বন্দরীর মাথার টনক নড়িয়া গেল। সে স্থির দৃষ্টিতে মনোজের পানে তাকাইয়া তাহার কাণ্ড দেখিতে লাগিল। মনোজ কোন কথা বলিল না। কেবল কলটা বন্ধ করিয়া উপরে চলিয়া গেল, ইহাতে নীরদাম্বন্দরী অগ্নিশর্মা হইয়া উঠিল। চীৎকার করিয়া বলিতে লাগিল, একবেন্দা বাঁদর এল আমার সঙ্গে ঝগড়া করতে। আরে, তুই আমার সব ছুঁয়ে দিলি কেন? এত করে ঘর-দোর পরিষ্কার করছিলাম আর তুই অনাচারে এসে সব ছুঁয়ে দিয়ে গেলি। আশ্পর্শ তো কম নয় তোর? দাঁড়া তোর মুণ্ডপাত করছি। এতদিন ছিলি কোথায়, উড়ে এসে জুড়ে বসেছিস দেখছি। আমার ওপর টেকা দিতে কাউকে দেখিনি। এ ছোঁড়া দেখছি সকলকে ডিঙ্গিয়ে যায়।

মনোজ উপর হইতে গম্ভীরভাবে বলিল, দেখুন চেষ্টাবেন না বলছি। জলের অভাবে আমাদের কষ্ট হচ্ছে, আর আপনি এত বেশী করে জল খরচ করলে চলবে না। সব কাজের একটা সীমা আছে। আর যদি কোন দিন এমন করে নীচে কল বন্ধ করতে যেতে হয় তাহলে অনর্থ হবে বলে দিচ্ছি। আপনিও—

এমন সময় বৌদি আসিয়া তাহাকে টানিয়া লইয়া গেল। মাধবী গোলমাল ভালবাসে না। সামান্য জলের জন্ম ঝগড়া করিতে চায় না সে। দেওরকে বুড়ির সঙ্গে ঝগড়া-ঝাঁটি করিতে নিষেধ করিল।

মনোজ সেখান হইতে চলিয়া গেল বটে, তবে যাইবার সময় আর একবার নীরদাম্বন্দরীকে না শাসাইয়া থাকিতে পারিল না। রাগে তাহার সর্বশরীর যেন রি রি করিতেছিল।

এই হইল সূত্রপাত। সূচনা। কিন্তু ইহাতেই ছেদ টানিল

মাধবী। পরদিন তাহারা সামনের দিকে বড় ভাড়াটিয়াদের পাশে বাসা লইল। এই ঘরখানি মাত্র তিনদিন খালি হইয়াছে। এতবড় বাড়ীতে প্রায়ই একটা না একটা ঘর খালি হয়। কিন্তু বেশীদিন তাহা খালি থাকে না। দোমহলার বাড়ীর সামনের দিকে দুইটি কল, উপরে ও নীচে। কিন্তু উপরের কলে জল সব সময় পড়ে না। নীচের কল বন্ধ না করিলে উপরের দিকে জল উঠে না। এতবড় বাড়ীতে ভাড়াটিয়ার সংখ্যা কম নয়। যাহারা নীচে থাকে তাহাদের কলতলার কষ্ট হাল্কা মা পোয়াইতে হয় নয়। ইচ্ছামত কলের জলে স্নান করা চলে। যাহারা উপরের তলায় থাকে তাহাদিগকে নীচে নামিয়া আসিতে হয় স্নান করিতে। উপরে যে জল উঠে তাহাতে বিশেষ স্নানের সুবিধা হয় না। তবে নীচেকার কলটা বন্ধ করিলে স্নান রান্না এক রকম চলিয়া যায়। সুবিধা অসুবিধার মধ্যে নানাভাবে বাসিন্দাদের দিন কাটাইতে হয়। কাটাইবার অভ্যাস করিতেও হয়। অন্যর মহলের দিকে নীরদাসুন্দরীর প্রবল প্রতাপে অন্য সব ভাড়াটিয়ারা পাস্তা পায় না।

অপরাজিতারা স্বামী-স্ত্রী থাকে। তাহাদের জলের খরচ বিশেষ নাই বলিলেই চলে। ষোড়শীদেরও তাই। তাহারা অতটা গ্রাহ্য করে না। একটা বড় টবে করিয়া জল যাহা ধরিয়া রাখে তাহাতেই তাহাদের চলিয়া যায়। আগের দিকে দুইখানা ঘর লইয়া এক বুড়া ভজলোক থাকেন। তাহার এক বিধবা বোন নীচে হইতে ক্রমাগত জল লইয়া উপরে যায়। সিঁড়িটা তাহাদের কাছেই পড়ে। উপর-নীচে করিতে তাহার আদৌ কষ্ট হয় না। তাহা ছাড়া উপরের কল তো আছেই। সময় অসময়ে তাহাদের একরকম চলিয়া যায়। ছেলেগুলি নীচের দিকে দাপাদাপি করিয়া বেড়ায়। বাহিরের কল, ভিতরের কল, উপরের কল থাকায় যখন যেখানে খুসী তাহাতে হাত মুখ খুইয়া লয়।

সদর দিকে বড় ভাড়াটিয়ারা আছে। বিধায়ক গিয়া তাহার পাশে জুটিল। কাছেই ভালোমাসি থাকে। এবং সম্প্রতি এক আর্টিষ্ট সজ্জীক আসিয়া জুটিয়াছে। নীচের দিকে অনেকগুলি ভাড়াটিয়া থাকে। তাহাদের খোঁজ খবর উপরের লোকেরা রাখে না। রাখার প্রয়োজনও নাই। ক্রমাগত এক আসে এক যায়।

অন্দর মহলের অংশটা খালি পড়ায় শশীপদ আবার সেই ঘর ভাড়ার সাইনবোর্ডটা টাঙ্গাইয়া দিয়াছে। ইহার মধ্যে জনকয়েক ভদ্রলোক আসিয়া ঘর এবং ভাড়া সম্বন্ধে দরদস্তুর করিয়া গিয়াছে। ঘর খালি হইলে শশীপদর এক কাজ হইল টু-লেটের সাইনবোর্ডটা টাঙ্গাইয়া দেওয়া এবং কোন আগন্তুক আসিলে তাহার সঙ্গে দরদস্তুর করা ও ঘর দেখান। ভাড়া আদায় করা, রসিদ দেওয়া, ঘরের দেখাশুনা, ভাড়াটিয়াদের অভাব অভিযোগের প্রতিকার করা, এইসব কাজে সে হাত দেয় না। এইসব কাজের ভার তাহার স্ত্রী মনোরমার উপর পড়িয়াছে। সে সমস্তক্ষণ বাড়ীতে থাকে, সুতরাং খবরদারী করিতে তাহার আপত্তি থাকে না।

শশীপদ অগ্নিত্র চাকুরী করে। সকালের ঘণ্টাকয়েক এবং সন্ধ্যার দিক ছাড়া সে সব সময় বাহিরে কাটাইয়া দেয়। এতবড় বাড়ী লইয়া বাড়ীভাড়া বিষয়ে তাহার স্ত্রীর উৎসাহ না থাকিলে এ বাসা এবং এত বড় দায়িত্ব পালন করা তাহার সাধ্যাতীত। অন্দরের দিকে নীরদা-সুন্দরী এবং সদরের দিকে ভালমাসি দুইজনেই সমান। যাহাকে বলে সমগোত্রীয়। ভালমাসির ছুঁচিবাই না থাকিলেও জলঘাঁটা তাহার স্বভাব। অল্পজলে তাহার কিছুতেই কুলায় না। কলতলায় একটানা বেশীক্ষণ সময় না কাটাইলেও ঘণ্টায় ঘণ্টায় কলতলায় যাইতে দেখা যায়।

মনোজ তাহার বৌদির কাছে গিয়া আস্তে আস্তে বলিল, সকাল থেকে ভালমাসির আটবার কলতলায় যাওয়া দেখলাম। এ দিকের কলতলার অধিকার ও আধিপত্য বজায় রাখিতে তাহার মাত্রাজ্ঞান কম নাই।

ভাই নাকি তাহলে জল করবে দেখছি। যে ভয়ে পালাও তুমি  
সেই দেবী আমি—বলিয়া মাধবী একটা ছড়া কাটিয়া হাসিতে লাগিল।

তাহলে ছতরকে ছুজনে মিলে আমাদের বাড়ীছাড়া না করে নিষ্কৃতি  
দেবে না। বলিল মনোজ।

দরকার নাই ভাই। তুমি অন্য বাড়ীর ব্যবস্থা দেখ। আর ঝগড়া  
ভাল লাগে না। এ দিকের সব দেখা হ'ল এবার অন্য পাড়ায় চল।  
সেখানকার সব কিছু দেখতে পাওয়া যাবে। বলিল মাধবী।

ঘন ঘন বাড়ী বদলান ভাল নয়। তাতে অসুবিধা আছে অনেক।  
বলিতে বলিতে মনোজ এ দিক ও দিক তাকাইয়া কি যেন একদৃষ্টে  
দেখিতে লাগিল।

তাহলে জলকষ্টের কি হবে? হতাশশুরে বলিল মাধবী।

আচ্ছা এবার কলতলার ব্যবস্থার সমাধান না করে ছাড়ছি নে।  
নিয়ত কল বন্ধ করুন, কল বন্ধ করুন, বলতে আর ঝগড়া করতে ভাল  
লাগে না।—কিহে? মনে পড়ল এতদিনে!

না হে, না, মনে পড়ার কি আছে! বাসার নম্বরটা যে ভুলে  
গিয়েছিলাম। কাল জামাইবাবু গিয়েছিলেন আমাদের গুথানে, তাই  
তঁার কাছ থেকে ঠিকানাটা পেয়ে তবে এলাম।

মাধবীর ভাই কলিকাতায় থাকিয়া এবার মেডিক্যাল কলেজে  
পড়িতেছে। কাল বিধায়ক সেখানে গিয়া তাহাদের ঠিকানা দিয়া  
আসিয়াছে। সেই খোঁজে বিরজা আজ দিদিকে দেখিতে আসিয়াছে।

বৌদি, কে এসেছে দেখো। বলিয়া মনোজ হাত তুলিল।

কে, ও বিরজা এসেছ? এতদিন তোমাদের পাত্তাই মেলেনি।  
আমরা এসেছি প্রায় মাস দুয়েক। এর মধ্যে একবার দেখা করতে  
এলে না ভাই! মাকে চিঠি দিয়ে তোমাদের কথা কত লিখলাম।  
যাক, এসেছ ভালই করেছ। চল, ঘরের মধ্যে চল।

বিরজা ঘরের মধ্যে গিয়া চৌকির উপর পা ঝুলাইয়া বসিয়া ঘরের  
চারিদিকে নজর দিতে লাগিল। তাহার দিদি বেশ পরিপাটি করিয়া

যেখানে যে জিনিস রাখিলে মানায় সেইমত সাজাইয়া রাখিয়াছে।  
ঘরখানি বেশ সাজান হইয়াছে দেখিয়া বিরজা মনে মনে খুসী  
হইল।

কি দেখছ—ঘরখানা! বলিয়া মাধবী মুখে কাপড় দিল।

হ্যাঁ, বেশ সাজিয়েছ এই কদিনে। জামাইবাবু বাড়ীর খুব প্রশংসা  
করছিলেন। বললেন বাড়ীখানা খুব ভাল। অনেক চাকুরে বাবু  
থাকেন। আপদে বিপদে দেখা-শোনার অভাব হবে না। তাছাড়া  
এ ঘরখানারও প্রশংসা করলেন কত।

মাধবী আড়াল হইতে বিরজার পানে তাকাইয়া হাসিতে হাসিতে  
বলিল, অভাব আর কি ভাই—কেবল যা অল্পবস্ত্রের! অর্থাৎ  
জলের।

কেন, কেন ভাল লাগছে না এ ঘরখানি। জিজ্ঞাসু মুখে বিরজা  
তাকাইল মাধবীর পানে।

মাধবী হাসিমুখে বলিল, এই তো বললাম, অভাব যা তা তো  
বললাম। নইলে সব ভাল। তোমার জামাইবাবুর ভাল লাগলেই  
ভাল। এতে আর কথা কি?

তোমার সব তাতেই মন্দ, দিদি! কেন জামাইবাবু তো এ বাড়ির  
ঘরের কথা পঞ্চমুখে প্রশংসা করছিলেন ওখানে। বলিয়া বিরজা  
দিদির পানে কটাক্ষ হানিল।

বেশ বেশ, সেই ভাল, এখন বল তো বাড়ীর কথা, তোমাদের কথা,  
অনেকদিন ওখানকার কোন খোঁজ খবর পাই নি।

বিরজা বসিয়া নানা কথার অবতারণা করিল। মাধবী কত প্রশ্ন  
করিল। বিরজাও তাহার উত্তর একটির পর একটি করিয়া দিয়া  
যাইতে লাগিল।

শেষ পর্য্যন্ত বিরজাকে জল খাওয়াইয়া মাধবী খুসী হইয়া বলিল,  
মধ্যে মধ্যে না এলে চলবে না। মনে থাকে যেন দিদিকে।

বিরজা তাহাতে সন্মতি জানাইয়া উঠিল।



নীচের তলায় ভীষণ ঝগড়া বাধিয়াছে শশীপদর সঙ্গে নিশানাথের নিশানাথ কাল এখান হইতে চলিয়া যাইবে। এ বাঁসা তাহার পছন্দ হইতেছে না। একখানি ঘর এবং তাহা বিশেষ অঙ্ককার বলিয়া তাহাদের যত আপত্তি।

শশীপদ বলিতেছে, ভাড়াটা মিটাইয়া না দিলে তাহাদের সে যাইতে দিবে না। অন্ততঃ জিনিসপত্র সে ছাড়িবে না।

নিশানাথ চীৎকার করিয়া বলিতেছে, ভাড়া তো একমাসের শুধু বাকী, তাও ছ'টাকা। এ কটা টাকা না দিয়া তাহারা কলিকাতা হইতে পলাইয়া যাইবে না। শশীপদের মত এমন চামার লোক সে জীবনেও দেখেনি।

শশীপদ সে বিষয়ে আর বেশী কথা বলে নাই। বাকী ভাড়া সম্বন্ধে তাহার ঐ এক কথা। ভাড়া দাও, চলিয়া যাও। বাধা দিবে না, আপত্তি করিবে না। নইলে সে একেবারে নাচার।

বিষয়টা সামান্য কিন্তু কথায় কথায় বাড়িতে বাড়িতে তাহা ভীষণ আকার ধরিল। শশীপদও ছাড়িবার পাত্র নয়। সে ভয় খায় না, পিছনে তাহার স্ত্রী ক্রমাগত সাহস দিতেছে এবং ঝগড়ায় নেপথ্যে যোগান দিতেছে।

নিশানাথের সেই এক কথা, এখন টাকা নাই। টাকা পাইলেই সে সাধিয়া দিয়া যাইবে। সামান্য টাকার জন্ত সে কলিকাতা হইতে নিশ্চয়ই পলাইবে না।

নিশানাথকে আজ উঠিতেই হইবে। নইলে একদিনের জন্ত এখানে একমাসের ভাড়া দিতে হইবে অনর্থক। অন্যত্র সে সুবিধা ভাড়ায় এবং বেশী আলোবাতাসযুক্ত ঘর পাইয়াছে।

শেষ পর্য্যন্ত যাহা মীমাংসা হইল তাহাতে তাহারা সন্তোষিত চলিয়া যাইতে পারিবে। তবে ঘরে যাহা কিছু আছে তাহা তালাবদ্ধ অবস্থায় থাকিবে। ভাড়া মিটাইয়া দিলেই সে তাহার জিনিসপত্র দরজা খুলিয়া লইয়া যাইতে পারিবে। ইহার জন্ত তাহাকে সে কয়

দিনের ভাড়া মাপ করিয়া দিবে। তবে বেশী দেবী যেন না হয়। অল্প কোন ভাড়াটিয়ার এ ঘর দেখিয়া যাইবার কথা আছে।

নিশানাথ কোন মতে শশীপদকে আঁটিয়া উঠিতে পারিল না। বিশেষ করিয়া তাহার স্ত্রীকে। সে যেমন এক-রোখা তেমনি ঝগড়াটে ও জেদী। মহিলা হইয়াও স্বামীর আড়ালে সেই-ই এতক্ষণ ঝগড়া করিয়াছে নিশানাথের সঙ্গে। তাহার কথা বলার ধরণ, আইনমারফিক উক্তির যুক্তিতে সে হতভম্ব হইয়া গিয়াছে। এই সব যুক্তির বিরুদ্ধে প্রমাণ প্রয়োগ করিতে হইলে তাহাকে আইন শিখিয়া আসিতে হইবে। নইলে এই বাড়ীওয়ালীকে হারাইয়া দেওয়া তাহার পক্ষে সহজ কথা নয়।

নিশানাথ আর কোন কথা না বলিয়া রাগে গজ গজ করিতে করিতে চলিয়া গেল।

বাড়ীওয়ালী বনাম ভাড়াটিয়ার যুদ্ধে শশীপদর যে জয় লাভ হইল তাহা কেবল তাহার স্ত্রীর জগুই। শশীপদর সাধ্য নাই অমন ভাড়া-টিয়াকে চাল মারিয়া টাকা আদায় করে। অবশ্য শশীপদও একথা স্বীকার করিয়া লইল। তাই বার কয়েক শুনাইয়া দিয়া তাহার স্ত্রী হাসিতে হাসিতে ভিতরে চলিয়া গেল।

তাহারা সদর অন্তরের মধ্যকার ছুইখানা ঘর লইয়া প্রবল প্রতাপে সমস্ত বাড়ীখানার আধিপত্য করিয়া চলিয়াছে। এক বৃদ্ধ-দম্পতি শশীপদকে বাড়ীখানার বন্দোবস্ত করিয়া দিয়া কাশীধামে বাস করিতেছেন। শশীপদ মাসে মাসে সেখানে টাকা পাঠাইয়া, কুচিং কখন চিঠিপত্রাদি দিয়া বাড়ীর ও তাহাদের সংবাদ পাঠায়। শশীপদর স্ত্রী মাসে মাসে ভাড়া আদায় করে প্রত্যেক তরফের গৃহিনীর মারফৎ। সব ঘরে তাহার অবাধ গতি। সর্বদা নিজের পছন্দ মত ও অনুগত ভাড়াটিয়াদের খোঁজ খবর রাখে। দল বাঁধে, দল ভাঙ্গে। অবস্থান্তর ঘটিলে তাহাদের তাড়াইয়া দেয় চক্রান্ত করিয়া। ঝগড়া করিয়াও কয়েকজনকে তাড়াইয়াছে বলিয়া তাহার একটা বদনাম আছে। আর অপত্য স্নেহ নির্বিশেষে ছেলে মেয়েদের শাসন করে, প্রহার করে।

পয়লা তারিখে নিশানাথ সজ্জীক বাসা ছাড়িল। হাঙ্গামা কিছু রহিল না। একখানি রিক্সা ডাকিয়া তাহাতে উঠিয়া বসিল। আগে পিছু তাকাইবার ভাবনা নাই, ছেলপিলের হাঙ্গামা নাই, লগেজেরও ঝঞ্ঝাট নাই। একটা বিছানার বাগ্গিল ও ছোট একটা পোঁটলা লইয়া তাহারা বাসা বদল করিল।

রিকসায় উঠিয়া নিশানাথ স্ত্রীকে বলিল, যাক, এবারকার বাসা বদলের নূতন হচ্ছে।

সে আর বলতে। গিন্নীর কল্যাণে তা অনেক দিন মনে থাকবে। বলিয়া নিশানাথের স্ত্রী নিশ্বাস ছাড়িল।

নিশ্চয়ই।

কিন্তু একটা কথা, ঘরের জিনিসের হাত পা গজাবে না তো? বিশ্বাস নাই। চাবিটা আছে কাছে, দয়া করে আর সেটা চেয়ে রাখে নি। এই ভাল।

অমন গিন্নীর খুরে প্রশ্রাম জানিয়ে চললাম।

অমন বাড়ীওয়ালী যদি হতে পার তা হলে চল একটা বাড়ী লিঙ্গ নিয়ে চেষ্টা করে, দেখি কতদূর গড়ায়। আর কতদূর কি করতে পারা যায়। নইলে এভাবে চলে না আর।

থাক খুব হয়েছে। অমন বাড়ীওয়ালী সেজে আর দরকার নাই। এই ঢের। তবু যদি মাগীর নিজের বাড়ী হ'ত।

রিকসাওয়াল ডাঙা দুইটি ধরিয়া একটু উপরে বৃকের কাছে তুলিল। তারপর সজোরে একটা টান দিয়া, বার কয়েক হাতের ঘণ্টিটা বাজাইয়া চলিতে লাগিল।

পিছনের সমস্ত মায়া এক নিমিষে ত্যাগ করিয়া এই দম্পতি হর্ষ বিষাদে মগ্ন হইয়া রহিল।

দুদ্র গলি। লোক তাহাতে অল্লই চলে। রিকসায় চড়িয়া তাহারা ভবিষ্যৎ ঘরের কথাই ভাবিতে লাগিল।

## সাত

মাধবীর ভাই বিরজা দিন কয়েক হইতে ঘন ঘন যাতায়াত করিতে সুরু করিয়াছে। কথাটা বাড়ীময় রাষ্ট্র হইতে আর বাকী রহিল না। পিছনে ইতিহাস একটা না থাকিলে কথা উঠে না এবং তাহা লইয়া কানা ঘুসা চলে না।

বিধায়ক জানে ব্যাপারটা। তবে সেটা যে এমন গভীর হইয়া উঠিয়াছে তাহা ভাবিতে পারে নাই। চপলা প্রফুল্লবাবুর মেয়ে। অতি সাধারণ ঘরের লোক। তাহার সহিত বিরজার বিবাহ তাহার শ্বশুরমহাশয় দিবেন সে সম্ভাবনার ইঙ্গিতও কাহাকে দিতে পারে না।

তাহার কাছে বিরজার বিবাহের প্রস্তাব তুলিলে তিনি এমন দাবী করিয়া বসিবেন যে তাহা মিটান সাধ্য হইবে না প্রফুল্লবাবুর। সামান্য মাহিনার কেরাণী। কি সামর্থ্য আছে তাহার। তাহার পক্ষে এ কথা চিন্তার বিষয়। সুতরাং বাজে কাজে হাত দিতে তাহার ইচ্ছা নাই। না হয় আরও ভাল।

মাধবীর এ বিষয়ে দৃঢ় ধারণা, তাহার বাপ মায়ের সম্মতি আদায় নিশ্চয়ই সে করিবে। চপলা মেয়ে যেমন শাস্ত তেমনি বুদ্ধিমতি। তাহা ছাড়া সে পরমা সুন্দরী। এদিকে তাহার ভাইয়েরও সম্পূর্ণ মত আছে। উপযুক্ত ছেলের উপর কর্তৃত্ব করা বাবার অগ্রায়।

বিরজা সন্ধ্যার সময় আসিত। এখন সকাল সন্ধ্যায় দুইবার করিয়া আসে। দিদির খোঁজ খবর রাখা তো দরকার।

চপলার সহিত যখন প্রথম আলাপ হয় তখন দুইজনের মন জানা-জানির প্রশ্ন কাহারও মনে উঠে নাই। সুতরাং চপলা তাহাকে প্রথম হইতে মোটেই লজ্জা করিত না। বিরজা হাসিয়া ডাকিত, চপলায়তন।

তাস খেলায় সে ওস্তাদ। মাধবীরও তাস খেলার সখ আছে।

সে তাহার ভাই, চপলা ও দেওরকে লইয়া খেলিতে বসিত। দেওরকে না পাইলে অপরাজিতাকে ডাকিত।

অপরাহ্নের কাজ সারিয়া মাধবী যখন উপরে উঠিবার উপক্রম করিতেছে এমন সময় বিরজার সাক্ষাৎ মিলিল। মাধবী হাসিতে হাসিতে বলিয়া উঠিল, এখুনি তোর কথাই হচ্ছিল। চপলাকে ডাকি, কি বলিস ? আজ এক হাত খেলা যাক্।

তোমার রান্নাবান্না সব শেষ ?

নিশ্চয়ই। খেলবি ? ডাকবো সবাইকে। না কাজ আছে ?

ডাকো না তোমার চপলায়তনকে। আজ তাকে কাঁদাবো। আজ আর তোমরা বাজী পাবে না দেখো।

তোর চপলায়তনকেই ডেকে আনি। কে বাজী না পায় দেখি ? বলিয়া কটাক্ষ করিয়া মাধবী উপরে উঠিল। পিছনে বিরজা।

চপলা আসিল। মাধবীর দেওর মনোজ আসিল। না আসিলে বৌদির কাছে তাহার দুর্গতির একশেষ হইবে।

খেলা চলিতে লাগিল। কোলাহলের অস্ত্র নাই। ঘর ফাটিয়া হাসির রোল উঠিতেছে। এবং প্রতি মুহূর্তে দুইদিক হইতে তীব্র তীক্ষ্ণ বাণ ভাবী দম্পতির উপর চলিতে লাগিল।

এক বাজী হারিয়া বিরজা উঠিয়া পড়িল। তাহার পড়াশুনা আছে। আর না। বলিয়া কটাক্ষে চপলার পানে তাকাইল।

চপলা ও মাধবী একদিকে বসে। মধ্যে মধ্যে সয়তানি করিয়া মাধবী চপলাকে বিরজার সঙ্গে খেলিতে বসায়। ছুষ্ঠামী বুদ্ধিতে মাধবী কম নয়। বলে, সঙ্গী নাও। সঙ্গী নিয়ে খেল। জীবন-খেলায় খেলতে গেলে এখন থেকে মক্স করে নাও।

বিরজা আপত্তি করে না। বেশ খেলিতে থাকে। তবে উদ্বেজনা থাকে তখন কম। লজ্জানত অবস্থায় এই দুই শুকুমার তরলমতি বেশ খেলিয়া চলে। কিন্তু চপলা ও তাহার দিদির বিপক্ষে বসিলে বিরজার উৎসাহ ও উদ্বেজনা অতিরিক্ত বাড়িয়া যায়।

খেলা শেষ করিয়া মাধবী একটা কাজের অছিলায় দেওরকে বাহিরে পাঠাইয়া দিয়া নিজে নীচে নামে। যাইবার সময় চপলাকে বিরজার জিন্মায় রাখিয়া বলে, দেখিস যেন চপলা না পালায়। এই আসছি।

পালালে আমি আর কি করব। ধরে রাখব কি। ওকি আমার কথা শুনবে না শোনে।

খুব শুনবে। এসে যদি দেখি পালিয়েছে তো ছুজনের মাথা ঠুকে দোব। বুঝলে বিরজায়তন?

আমার অপরাধ!

বলব, আটকাতে পার নি কেন? আচ্ছা আসি। বস ছুজনে ততক্ষণ। গল্প করতে থাক না কেন বসে বসে।

মিনিট দশেক পরে যখন মাধবী ফিরিল, দেখিল চপলা লজ্জায় দেওয়ালে ঠেঁশ দিয়া দাঁড়াইয়া আছে। আর বিরজা দরজার কাছে পথ আগলাইয়া তাহার পানে তীব্র দৃষ্টিপাত করিয়া রহিয়াছে। যেন পাহারাওয়ালা। অবাধ্য পথযাত্রীকে কিছুতেই সে সংযত করিতে পারিতেছে না।

ছুইজনের ব্যবধান অনেকখানি।

এই অবস্থা দেখিয়া মাধবী হাসিয়া বাঁচে না। ছুইটি ছেলে মানুষকে লইয়া যে খেলা খেলিতে বসিয়াছে তাহা সত্যি নীলাচপল। ছুই জনে বিপরীত মুখী হইয়া তৃতীয় জনের অপেক্ষায় দাঁড়াইয়া আছে। নির্বাক। স্থির। কিন্তু ছুইজনের অন্তরে যে ঝড়ের মাতন তখন শুরু হইয়াছে তাহার সংবাদ কে রাখে!

সুচতুরা মাধবীর জানিতে কিছুই বাকী রহিল না। হাসিয়া উঠিয়া বলিল, আ মর! কি সৃষ্টি ছাড়া দাঁড়ানোর ভঙ্গিমা তোরা শিখেছিস? বলিয়া ছুইজনকে টানিবার চেষ্টা করিল।

শালমাসি কখন যে অপরাজিতার ঘরে ঢুকিয়া ইজি চেয়ারে আরাম

করিয়া বসিয়া আছে অপরাজিতা তাহা লক্ষ্য করে নাই। নজর পড়িতে সে কাছে গিয়া দাঁড়াইল।

ভালমাসি তাহার কানের কাছে মুখ রাখিয়া ফিস ফিস করিয়া কি বলিল, অপরাজিতা তাহা বুঝিতে পারিল না। জিজ্ঞাসা মুখে হাঁ করিয়া তাহার পানে তাকাইয়া রহিল।

ভালমাসি কথাটাকে আরও রহস্যময় করিয়া আরম্ভ করিল, বুঝলে না, অত মেলামেশা কি ভাল ? সোমন্ত বয়েস।

অপরাজিতার ভয় হইল। তাহার সম্বন্ধে ভালমাসি কটাক্ষপাত করিতেছে না তো ? ভয়বিহ্বল বক্ষে আরও কাছে গিয়া সে জিজ্ঞাসা করিল, কার কথা বলছ ভালমাসি ?

এই সব সোমন্ত ছেলে মেয়েদের কথা। এই সব তাদের গা মাখামাখি কথা ?

কাদের ?

বড় ভাড়াটেদের অচলার কথা।

কেন সে কি করল ? বলিয়া ফেলিয়া অপরাজিতা মনে মনে একটা অনুমান করিয়া লইল।

বাইরের ছেলের সঙ্গে অত মেলামেশা কি ভাল ? বিয়ে যদি হয়, তারপর মিশলে কেউ কথাটি পর্য্যন্ত বলবে না। আমরা সেকলে লোক। ও সব কি আমরা চোখে দেখে চুপ করে থাকতে পারি। না থাকা যায়।

তা হোক ভালমাসি, যদি অমন ছেলে ওর ভাগ্যে জোটে তো জুটে যাক। বাখা দিও না। আমার তো বাপু ভাল বই খারাপ কিছু লাগে না। না মেশালে ও এসে মিশবে কেন ? অমন ছেলের নাগাল পাওয়া শক্ত।

অপরাজিতার কথাগুলি ভালমাসির ভাল লাগিল না। এ বাড়ীতে কাহারও কাছে সে আমল পায় না। বাড়ীওয়ালী গিন্নী তাহার উপর খড়গ হস্ত। সেও তাহাকে গ্রাহ্য করে না। বলে, ভাড়া দিই, কথার

ধার রাখব কেন তার। কিন্তু এত বড় বাড়ীর কাহারও কাছে তাহার মনের কথা বলিবার ও শোনাইবার লোক না পাওয়াতেই বড় অস্বস্তি বোধ করে ভালমাসি। অপরাজিতা ও মাধবী কিছুটা শোনে তাহার কথা। কিন্তু চপলা-বিরজার ব্যাপারে দুইজনেই যেন একমত।

দ্বিগুস্তি না করিয়া আপন মনে গজ গজ করিতে করিতে ভালমাসি অগত্যা বাড়ীওয়ালী গিন্নীর কাছেই চলিল। যদি ইহাদের ব্যাপারে কেহ বাধা দিতে পারে তো সেই একজনই আছে।

অপরাজিতা বার কয়েক বসিবার অমুরোধ করিয়াও কোন ফল পাইল না! ভালমাসি চলিয়া গেল।

বাড়ীওয়ালী গিন্নী ঘরে বসিয়া ছোট ছেলের কাঁথা সেলাই করিতেছিল। ঘর নির্জন। ভালমাসি ঘরে ঢুকিবে কি না ভাবিতেছিল, হঠাৎ অপ্রত্যাশিত ভাবে গিন্নীর সাদর সম্ভাষণে বড়ই খুসী হইয়া সে ভিতরে পা দিল।

এই তাহাদের প্রথম সম্ভাষণ। ভালমাসি এতটা ভাবিতে পারে নাই। মধ্যে কিছুদিন উভয়ের মধ্যে বাক্যালাপ ছিল না। সুতরাং সাহস পাইয়া সে একেবারে তাহার কাছে গা দিয়া বসিল। এক গাল হাসিয়া বলিল, দিদি, সময় বড় পাই না, তাই এ দিকে বড় আসা হয় না আমার। আছ কেমন?

বোস বোস। আসন দিই। বলিল মনোরমা।

মেঝের উপর বসিয়া তাহার কানের কাছে মুখ লইয়া ফিস ফিস করিয়া আরম্ভ করিল, তোমাকে বলব না তো কাকে বলব? এর যদি প্রতিকার করতে কেউ পারে তো সে তুমিই।

কি, কথা কি দিদি?

ওই সোমন্ত ছেলে মেয়ের কথা।

কে, কি হলো কি?

ও সব তো ভাল নয়। আর বাপ-মাই বা চুপ করে এ সব দেখে



কেন? যেমন দিদি তার তেমনি ভাই। লজ্জা কি এদের কারও আছে এক বিন্দু।

বাড়ীওয়ালী গিন্নীর আর বুঝিতে বাকি রহিল না। ভালমাসিকে সমর্থন করিয়া সেও বলিতে আরম্ভ করিল, সত্যি, আমিও দিন কয়েক থেকে লক্ষ্য করছি, এদের বড় বাড়াবাড়ি আরম্ভ হয়েছে। অসহ্য। ঐ ঘরখানা হয়েছে যেন প্রজাপতির আফিস।

তাই দেখ না দিদি? ও সব আমাদের চোখে বড় লাগে। তাই আমার বলতে আসা তোমার কাছে। বিশেষ করে এক জায়গায় থেকে এসব বেগ্লিপনা আর কত চোখে দেখে চুপ করে থাকব।

আচ্ছা, আমি এর ব্যবস্থা করছি। ও সব আমার বাড়ীতে চলবে না। সব তাড়াব।

সেইজন্টেই তো শেষে তোমাকে বলা। যদি কেউ এর ব্যবস্থা করতে পারে সে এক তুমিই। আর কেউ নয়। এ বাড়ীতে কি কেউ মাহুষ আছে। সব যে খিঞ্জি। বেহায়া। বেহায়ার একশেষ।

সবশেষে অন্য কথা আসিয়া একে একে জুটিল। ভালমাসির অনেক কথাই এমন আশ্চর্যা লাগিল যাহা তাহার শুনিবার কোন সম্ভাবনা ছিল না। উভয়ের মধ্যে যে বিশেষ মনের মিল আছে তাহাও নয়। উভয়ে উভয়ের হিতাকাঙ্ক্ষী যে নয় একথা এ বাড়ীর কাহারও বুঝিতে বাকী নাই।

ভালমাসি চলিয়া গেল। গিন্নী তাহার ছেলের কাঁথা সেলাই করিতে লাগিল। এত বড় বাড়ী লিজ লইয়া তাহার উপর দিয়া নিয়তই যেন ঝড় বহিয়া যাইতেছে। কোথায় কোন ভাড়াটে কি করিতেছে, তাহার খোঁজ খবর রাখা চাই। খবরদারিতে হুঁসিয়ার থাকিতে হয় সব সময়। নইলে এত বড় বাড়ী শাসনে রাখা যায় না। সকল ভাড়াটিয়ার অভাব অভিযোগ লক্ষ্য রাখিতে হয়। অবিলম্বে সে সব প্রতিকার না করিলে, সুব্যবস্থার বিহিত না করিলে তাহারা চলিয়া যাইতে পারে। সুতরাং ব্যবসায়ে লোকসান না রাখিবার

জন্ম এই সব ব্যবস্থার দরকার অনিবার্য হইয়া পড়ে। এবং এই সব করিতে গিয়া কর্তৃত্ব আসিয়া যায়। এত বড় বাড়ী একা শাসনে রাখিতে যে সামর্থ্যের দরকার তাহা তাহার আছে। স্বামীর উপর ভরসা করিলে চলে না। এবং তাঁহারও যে সময় কম। কাজেই তাহার সব বিষয়ে লক্ষ্য না রাখিলে চলে না। ঝড়-ঝাপটা তাহার গায়ে লাগিলেও, একটা কর্তৃত্বের মোহ তাহাকে সব ভুলাইয়া দিয়াছে। এইসব ধরণের নানা কথা ভাবিতে ভাবিতে মনোরমার মন আনন্দে গর্বে ফুলিয়া উঠিতে লাগিল।

সন্ধ্যা কখন হইয়াছে। ভালমাসি হাতের রান্না শেষ করিয়া ছেলের অপেক্ষায় বসিয়া আছে। এত দেরী সে কখনও করে না। বরাবর অফিস হইতে বাসায় চলিয়া আসে। তাহার দেরী হওয়ায় ভালমাসির উৎকণ্ঠার সীমা নাই। সমস্ত দিন উপবাসের পর সন্ধ্যার দিকে শরীরটা ঝিমাইয়া আসে। চুপ করিয়া বসিয়া থাকা যায় না। ছেলের অনর্থক দেরী হওয়ায় সে মনে মনে চটিয়া উঠিয়াছে। শুইয়া পড়িতে চায়। কিন্তু ছেলেকে না খাওয়াইয়া, কাজ কর্ম না চুকাইয়া শোওয়াও যায় না। একবার শুইলে আর উঠিতে ইচ্ছা করে না। তাই আঁচল পাতিয়া মেঝের উপর শুইয়া গা গড়াইবার আয়োজন করিতেই পরেশ আসিয়া ঘরে ঢুকিল।

ভালমাসির মুখ ভাল নয়। কিছুই মুখে আটকায় না। বিধবা হওয়ার পর হইতে ছুঁচিবাই ও মেজাজের তীক্ষ্ণতা গিয়াছে বাড়িয়া। ছেলেকে অকথ্য ভাষায় গালি দিতে লাগিল। মা মলে শাস্তি পাস্! কোথায় এত রাত পর্য্যন্ত ঘুরে ঘুরে বেড়াচ্ছিস? আজ একাদশী না? সে সব খেয়াল কি আছে! কোথায় গিয়েছিলি?

আজ ব্র্যাক-আউটের মহড়া দিচ্ছিল কি না, তাই সন্ধ্যার দিকে কার্জন পার্কে বসেছিলাম। সাতটা বাজতেই হঠাৎ রাস্তার, বাড়ীর আলোগুলো সব একে একে নিভে গেল। রাস্তা বাড়ী সব অন্ধকার।

এই আলোকীর্ণ রাস্তা এক নিমেষে অন্ধকার ঘুট্টাঘুটে হয়ে গেল।  
সে এক চমৎকার দৃশ্য।

সব অন্ধকার তো এ দিকের গলিতে হয় নাই।

কিন্তু ও দিকে সব হয়েছিল। ব্ল্যাক-আউটের মহড়া খুব ভালই  
লাগল। সব অন্ধকার হতেই চৌরঙ্গি রাস্তা ধরে চিত্তরঞ্জন এভেনিউ  
দিয়ে যখন রাস্তার মধ্যে দিয়ে আসছিলাম, তখন মনে হচ্ছিল অন্ধকার  
পাতাল পুরীতে আমি যেন এগিয়ে চলেছি। যান-বাহন সব বন্ধ।  
ভয় নাই। রাস্তা শূন্য। বেশ লাগছিল মা।

তা কি হবে এতে? সব অন্ধকার করে কি করতে চায় ওরা?

রাত্রে যদি জাপানীরা বোমা ফেলতে আসে তাহলে এই সহর  
অন্ধকার করে তাদের জানতে দেবে না কোথায় সহর! সব অন্ধকার।  
কিছুই দেখতে পাবে না। এই রকম অন্ধকার করাকেই বলে ব্ল্যাক-  
আউট। এই তো সবে আরম্ভ। এর পর কথায় কথায়, যে কোন  
সময় রাত্রে দিনে কত কি সব করবে দেখো।

যাক দেখতে দেখতে কতই না হ'ল। যা হয় হোক গে। মুখ-  
পোড়ারা যা খুসী তাই করুক। আলো নিবিয়ে সব ভূত সাজাক গে!

এ তো আমাদের ভালর জন্মেই। দেখো না কি হয় শেষ পর্য্যন্ত।  
ও দিকে জাপানীরা যে রকম তোড় জোড় করে এগিয়ে আসছে তাতে  
তারা এলো বলে।

আসুক গে। চল, খাবি চল। যত সব অনাস্থষ্টি কাণ্ড। এ  
আর দেখতে ভাল লাগে না। কালে কালে কতই না হবে।

এখন কি দেখছ মা। যখন বোমা পড়বে তখন বুঝবে ব্যাপার  
কি! এই তো সবে সন্ধ্যা হ'ল।

এরোপ্লেনগুলি সার বাঁধিয়া চলিয়াছে আকাশের উপরে। মেঘের  
টুকরাগুলি যেন বিগলিত হইয়া ভাঙ্গিয়া পড়িতেছে। দেখিতে দেখিতে  
তাহারা দূরে—বহুদূরে চলিয়া গেল।

অপরাজিতা বলিল, আজ সকালে কি হ'ল শুনিস নি? গড়ের মাঠে এরোপ্লেনের মহড়া হয়ে গেল। ওপর থেকে একটার পর একটা এরোপ্লেন এসে নীচেকার সাজান কৃত্রিম ঘরগুলিতে আগুনে বোমা ফেলে চলে গেল। দেখতে দেখতে তাতে ধরে গেল আগুন। একদল লোক ছিল কাছেই প্রস্তুত হয়ে। তারা ছুটে গিয়ে জ্বলন্ত ঘরের ভেতর থেকে কজন লোককে ঝেঁচারে করে নিয়ে এসে গ্র্যান্ডুলেন্স গাড়ীতে করে হাসপাতালে পাঠিয়ে দিলে। আর একদল তারা জল দিয়ে আগুন নেভাতে লাগল। এই সব কত কি মহড়া।

আচ্ছা মাসি, কেন এসব হচ্ছে? বলিয়া উঠে চপলা।

ওলো জানিস নে। যদি এখানে বোমা পড়ে, তাহলে লোক-গুলোকে বাঁচাতে গেলে কি কি করতে হবে এ তারই মহড়া। এখন যদি এই সব প্র্যাকটিশ না করায়, তবে বিপদের সময় কি করে সাহায্য করবে। লোক মরে একসার হবে যে।

হাঁ মাসি, বোমা কি সত্যিই পড়বে?

সম্ভাবনা তো আছেই। নইলে অত তাড়া ছড়া কেন? এই সব ব্ল্যাক-আউট, সাইরেন, সঙ্ক্যা হতে দোকান অফিস বন্ধ করা, রাস্তার আলো নিভিয়ে দেওয়া কেন?

অপরাজিতা খবরের কাগজ পড়ে। তাহার স্বামী দোকানে একখানি করিয়া বসুমতী রাখেন। সঙ্ক্যার পর বাড়ী ফিরিবার সময় সেইখানি হাতে করিয়া ফেরেন। অপরাজিতা পর দিন ছপুর্নে সমস্ত কাজ কর্ম সারিয়া পড়িতে বসে এবং বাড়ীর মেয়েদের নূতন কিছু থাকিলে জানাইয়া দেয়।

ভালমাসি ইজিচেয়ারে বসিবার লোভে রোজই একবার করিয়া অপরাজিতার খোঁজ লইতে আসে। সেই সময় নূতন কিছু সংবাদ থাকিলে শুনিয়া লয়।

সম্প্রতি ইউরোপে যুদ্ধ বাধিয়াছে। এখানকার জিনিসপত্রের দর নিত্য চড়িয়া যাইতেছে। জাপানীদের যুদ্ধের, তোড়জোড় এবং ক্রমশঃ

ভারতের দিকে তাহাদের লোলুপ আগ্রহ থাকায় ভয় সেইখানে।  
সঙ্গে সঙ্গে নিত্য নূতন সংবাদের গুরুত্ব ও আগ্রহ বাড়িরাছে। পুরুষদের  
সঙ্গে সঙ্গে মহিলারাও এখন এ বিষয়ে উৎসুক।

চপলা আসিয়াছিল একখানি ভাল শাড়ীর জন্য। মাধবী মাসিমারা  
থিয়েটার দেখিতে যাইবে সেই সঙ্গে তাহাকেও যাইতে হইবে।  
সুতরাং ভাল একখানা শাড়ী না পড়িয়া যাইতে তাহার যেন লজ্জা  
করে। অক্ষুটে সে কথার ইঙ্গিত করিতেই অপরাজিতা হাসিয়া উঠিল।  
গালে একটা ঠোনা মারিয়া বলিল, শুধু কাপড়ে কি হবে, আয় তোকে  
সাজিয়ে দিই। বলিয়া চপলাকে কাছে টানিয়া বসাইল।

অপরাজিতা মনের মত করিয়া সাজাইতে বসিয়াছে চপলাকে।  
নিজের দামী শাড়ী ও গহনাগুলি পরাইয়া অচলাকে সে অপরূপা  
করিয়া তুলিল।

চপলা আয়নার সামনে দাঁড়াইয়া নিজেকে দেখিয়া খুসী হইয়া  
উঠিল।

অপরাজিতা আসিয়া তাহার গালে আঙ্গুল দিয়া বলিল, তোর মত  
আর একজনও খুব খুসী হবে।

লজ্জায় রাঙ্গা হইয়া চপলা চলিয়া গেল।

নবেন্দু ও ষোড়শীর কথা কিছুক্ষণ আগে অপরাজিতার মনে বাসা  
বাঁধিয়া ছিল। চপলা আসায় তাহার ছেদ পড়ে। এখন চপলা চলিয়া  
যাওয়ায় আবার এই দম্পতির কথা তাহার মনের মধ্যে ভাসিয়া  
বেড়াইতে লাগিল।

## আট

ভবানীপুরের একটা ক্লাবে নবেন্দু সভাপতিত্ব করিয়া বড় একটা ফুলের মালা হাতে লইয়া বাসায় ফিরিল। মালাটি বড় বড় লাল গোলাপ ফুলে সাজান। মধ্যে মধ্যে দুই চারিটি জঙ্গলি ফুলে তাহার কোল ভরাইয়া দিয়াছে। মালাটি সত্যিই দেখিতে বড় সুন্দর হইয়াছে।

নবেন্দু ঘরে আসিয়া নিজের বড় ফটোতে তাহা ঝুলাইয়া দিল। ষোড়শী ঘরে ছিল না। বোধ হয় ও ঘরে বসিয়া কি করিতেছিল। নবেন্দুর ডাকিতে লজ্জা করিল। দুই চারিবার জোরে জোরে গলা ঝাড়িয়া বিছানায় গা-টা একবার গড়াইয়া লইল। শুইয়া শুইয়া তাহার মনে পড়িল, ক্লাবের বিরাট জনতা, তাহার অপূর্ব বক্তৃতা এবং সম্বর্ধনা। এতবড় সম্মান সে এর আগে কখনও পায় নাই। বহুস্থানে তাহাকে সভাপতিত্ব করিতে হইয়াছে। বহু ফুলের মালা তাহার গলায় পড়াইয়া দিয়াছে, কিন্তু আজিকার কথা তাহার ভুলিবার নয়। নিজের ফটোয় তাহার মালাটি ঝুলিতেছে। দেখিতে দেখিতে তাহার অনেক কথাই মনে হইল। তাহার পাশেই স্ত্রীর ফটো। মনে হইল একবার সেই ছবিতে তাহার মালাটি ঝুলাইয়া দিয়া, স্ত্রীর সামনে দেখাইয়া বড় করিবে। কিন্তু উঠিয়া যাইতেই তাহার মনটা হঠাৎ দপ করিয়া জলিয়া উঠিল, নাঃ, ঠিক আছে। ও ফুলের মালা ওর গলায় মানায় না। অপদার্থ, অশিক্ষিতা, গেঁয়ো—সমস্ত জীবনটাই তাহার বিষময় করিয়া তুলিতেছে। সে কেবল চায় অর্থ। সম্মান, যশ ও খ্যাতির ধার দিয়াও সে যায় না। ভালবাসা বলিয়া কোন কিছু তাহার বুকে দানা বাঁধিয়া উঠে নাই। বোকা—প্রেমের এতবড় অবাঞ্ছিত মূর্তি ছনিয়ায় আর নাই। মূর্থ, মূর্থ! বলিয়া নবেন্দু পাশ ফিরিয়া শুইল।

পরক্ষণেই তাহার মনে পড়িল অপরাজিতাকে। শিক্ষিতা,

মার্জিতরুচি, শ্রীসম্পন্ন, আধুনিক অপরাধিতাকে । শুইয়া শুইয়া সে তাহাকেই কল্পনা করিতে লাগিল ।

কোন এক সময়ে ষোড়শী ঘরে আসিয়া ঢুকিয়াছে । বিছানায় ও ভাবে স্বামীকে শুইয়া থাকিতে দেখিয়া সে কাছে গিয়া বসিল । অথচ নবেন্দু জাগিয়া থাকিয়াও তাহাকে লক্ষ্য করিল না ।

ষোড়শী গায়ে হাত দিয়া বলিল, এ সময়ে শুয়ে আছ যে ! কাকার আজ আসবার কথা ছিল । ষ্টেশনেও গেলে না যে বড় । তোমার ঐ বড় দোষ । কাকা বড় চাকরী করেন । তাঁকে ধরলে একটা ভাল চাকরী মিলে যেতেও তো পারে । তা নয়, যত সব বাজে ঐ সব নিয়ে থাক । সেই জগ্গেই তো বাবা মা তোমার ওপর কত রাগ করেন । টাকা রোজগার না করলে সংসার চলবে কি করে ?

নবেন্দু কোন কথা বলিল না । হাত দিয়া ইসারায় তাহাকে সরিয়া যাইতে বলিল ।

ষোড়শীর কথা তাহার স্বামী গ্রাহ্যের মধ্যে আনিল না দেখিয়া তাহার সমস্ত রাগ গিয়া পড়িল তাহারই উপর । পটপট করিয়া অকথ্য ভাষায় যা খুসী বলিয়া চলিল । বলিল, তাহার সব কিছু সঞ্চয় শেষ হতে বসেছে । এমন করে সংসার আর চলে না । না শুনবে কারও কথা । শুধু ঐ সবে কি সংসার চলে । যত সব অনাহুষ্টি কাজ ! সময় নষ্ট !

অভিমাণে দুঃখে নবেন্দুর চোখ ফাটিয়া জল আসিবার উপক্রম হইল । আজ এত বড় সম্মান সে নগরবাসীর কাছে হইতে পাইয়াও এই অন্তরবাসীর কাছে তাহা যেন ভাঙ্গিয়া খান খান হইয়া গেল । এত বড় সম্মান যে কেহ দেখাইতে পারে তাহা তাহার ধারণার অতীত । এত বড় মুখরা স্ত্রী তাহার জীবনে যে কি পাষণ্ড ভার চাপাইয়াছে তাহা কল্পনা করিতেও কষ্ট হয় । এক মুহূর্তে বিষাদক্লিষ্ট হইয়া সে মুসড়াইয়া পড়িল । সাড়া শব্দ দিল না ।

ইহাতে ষোড়শীর রাগ আরও বাড়িয়া গেল । তাহার এই মূল্যবান

কথাগুলি যে শূন্যে মিলাইয়া গেল, এই দুঃখে সে আরও কঠিন হইয়া উঠিল। কর্কশ কণ্ঠে বলিয়া বসিল, আজ অপরাজিতাদিদি দশ টাকা না দিলে যে কি হ'ত তা ভাবতে পার কি? ভাল কথা বললে গায়ে মাথা হয় না। অত আর ভালও লাগে না। আমাকে বাপের বাড়ী পাঠিয়ে দাও। তারপর যা খুসী কর বলতে আসবো না আর। বলিয়া ষোড়শী রাগ করিয়া ঘর ছাড়িয়া চলিয়া গেল।

নবেন্দুর মনে ঝড় উঠিয়াছে। সেই সঙ্গে বৃষ্টি নামাইয়া এক প্রলয়ের সৃষ্টি করিতে পারে বলিয়া আশঙ্কা দেখা দিয়াছে। অনর্থক এই লইয়া ঝগড়া কাঁটি করিতে আর ভাল লাগে না। তাহার মুখরা অজ্ঞ স্ত্রীকে লইয়া সে আর পারে না। তাহার যাহা খুসী হয় করুক। সে কিছু বলিবে না। ভাবিয়া বিছানা হইতে উঠিয়া বসিল। টক-টকে লাল গোলাপ ফুলের মালার দিকে একবার সতৃষ্ণ নয়নে চাহিয়া জামা গায়ে জড়াইয়া অবনত গুহ্ম মুখে নবেন্দু বাহির হইয়া গেল।

সেদিনকার দেখা থিয়েটার প্রসঙ্গে বিরজা ও মনোজের মধ্যে ভীষণ তর্ক বাধিয়া গিয়াছে। মাধবী আর চপলা নির্বাক হইয়া থিয়েটার প্রসঙ্গ শুনিতেন। ষোড়শী পাশে আসিয়া দাঁড়াইল।

মাধবী বলিল, কি হ'ল মুখ ভার কেন? বরের হাতের টকটকে লাল গোলাপ ফুলের মালা নিয়ে পছন্দ হ'ল না? না ভাল লাগে আমাকে দিয়ে যাও কাজে লাগাব, বলিয়া একবার বিরজা ও চপলার পানে তাকাইল। মধুর সে হাসি। চপলা লজ্জা পাইয়া মুখ ফিরাইয়া বসিল। বিরজা তর্কের ফাঁকে একটু হাসিয়া লইয়া আবার তর্কে মাতিয়া উঠিল।

ষোড়শী বলিল, মালা নিয়ে ধুয়ে জল খাব। ও ভাল লাগে না। ও দিকে না ঘুরে অন্য জায়গায় ঘুরলে কাজ হবে সে জ্ঞান ওর নাই।

মাধবী সে কথায় খুসী হইল না। ষোড়শীর পানে তীব্র কটাক্ষপাত করিয়া বলিল, অমন রতনকে চিনলে না এখনও। কপালে দুঃখ



আছে। অপরাজিতা আর তুমি যেমন বিপরীত ধরণের, বর দুজনে হয়েছে ঠিক তেমনি বিপরীত ধরণের। মিলেছে ভাল।

রবিবারের দিন। বিধায়ক কি একটা কাজে বাহিরে গিয়াছে। বিরজা থিয়েটার দেখিয়া সে রাত্রি বাসায় গেল না। দিদির কাছে থাকিবে। মজলিস বসিয়াছে তাই। মাধবীর কাজের তাড়া নাই। সব কাজ শেষ করিয়া সকাল সকাল থিয়েটার দেখিয়া ফিরিয়াছে। এখন বসিয়া গল্প করিলে, আড্ডা জমাইলে ক্ষতি কি !

মনোজ বলিল, বৌদির সভানেত্রীত্বে যে বৈঠক বসেছে তার প্রধান অতিথি কে বলতে পার ?

বিরজা বলিতে যাইতেছিল, অচলায়তন ; কিন্তু তাহার আগেই মাধবী বলিল, আজ ষোড়শীকে করা যাক।

ষোড়শী ও সবের মধ্যে নাই। ও সব আমার ভাল লাগে না। সভা আর সমিতি। বক্তৃতা আর ফুলের মালা। যত সব—বলিতে বলিতে ষোড়শী অপরাজিতার ঘরের দিকে গেল।

তবে অচলায়তনই হোক। বলিয়া বিরজা মাধবীর পানে তাকাইয়া দেখিল।

মাধবী হাসিয়া বলিল, মাইরি, ভাইটিকে সবাই বোকা বলে, কিন্তু দেখছি ও একটু মানুষ হয়েছে। চপলা লজ্জায় সরিয়া গেল।

একটা রহস্যঘন আবরণের মেঘ যেন কাটিয়া যাইতে চায়। কোলাহল মুখরিত ছোট ঘরখানির আবহাওয়া পরিবর্তিত হইবার উপক্রম হইল, এমন সময় দূরে সাইরেন বাজিয়া উঠিল। দেখিতে দেখিতে চারিধার হইতে অনেকগুলি সাইরেনের ওঠা-নামা মরণ আর্ন্তনাদ চলিতে লাগিল।

মনোজ চীৎকার করিয়া উঠিল, ঐ, ঐ সাইরেন।

চপলা অবাক বিস্ময়ে চাহিয়া রহিল জানালা ধরিয়া। মাধবী সরিয়া গিয়া চপলার কাছে দাঁড়াইল। বিরজা উঠিয়া গিয়া জানালায় দাঁড়াইয়া মনোজকে ডাক দিল।

এক দিকে দুইটি যুবক জানালার কাছে দাপাদাপি করিয়া মজা দেখিতে লাগিল। অন্য দিকে দুইটি মেয়ে অবাক বিস্ময়ে চাহিয়া রহিল। অনন্ত আকাশ স্তব্ধ হইয়া রহিয়াছে।

সাইরেনের আর্দ্রনাদ তখনও চলিতেছে। রাস্তায় লোক চলাচলের বিরাম নাই। সকলেই উর্দ্ধশ্বাসী হইয়া সাইরেনের শব্দকে ব্যঙ্গ করিয়া চলিয়াছে। মনে একটু ভয় যে কাহারও হইয়াছে তাহা বুঝা যায় না। বরং মজা দেখিতেছে তাহারা।

এ. আর. পি-র দল ঘোরাফেরা করিতেছে। রাস্তার লোকজনকে বাড়ীর ভিতর ঢুকিয়া পড়িতে নির্দেশ দিতেছে, কিন্তু কে কাহার কথা শোনে। রসিকতা করিয়া পরস্পর পরস্পরকে সম্ভাষণ করিতেছে। রাস্তায় কাতারে কাতারে লোক আসিয়া জমিয়াছে। সকলেই উৎসুক আগ্রহে চাহিয়া রহিয়াছে। ছাদে বারান্দায় এবং দরজা জানালার সামনে স্ত্রী পুরুষ বালক বালিকাৱা জড় হইয়া অবাক বিস্ময়ে মজা দেখিতে লাগিল।

সাইরেনের শব্দ থামিয়া গিয়াছে। যাহারা যে অবস্থায় ছিল, কিছুক্ষণ আমোদ উপভোগ করিয়া সরিয়া পড়িবার উপক্রম করিতেছে। একটা অবজ্ঞার ভাব সকলের মুখে চোখে। যেন কিছুই হয় নাই। এ একটা রসিকতা মাত্র। ভারি তো সাইরেন! কি আর করবে এতে! বোমা! ভারি তো বোমা! পড়ুক না!

বড় রাস্তায় ট্রাম বাস গাড়ী ঘোড়া বন্ধ হইয়া গিয়াছে। কিন্তু লোক চলাচলের নিয়ন্ত্রণ নাই। দশ মিনিট পরে আবার সাইরেন বাজিয়া উঠিল। এবার একটানা শব্দ। তারপর চুপচাপ।

রাস্তায় যথারীতি ট্রাম বাস গাড়ী ঘোড়া চলিতে লাগিল। এ. আর. পি-র লোকেরা ক্লান্ত হইয়া ফিরিতে লাগিল। সকলেরই চোখে রহস্যঘন উৎকর্ষা পুঞ্জিভূত হইয়া উঠিয়াছে।

মনোজ হাসিতে হাসিতে বলিল, যাক, বাঁচা গেল। সাইরেনের মহড়া হয়ে গেল। মধ্যে মধ্যে এইরকম আরও হবে।

মাধবী আগ্রহভরে বলিল, কেন ?

পরীক্ষা। এ সব পরীক্ষামূলক ব্যবস্থা। শত্রুপক্ষ আক্রমণ করতে এলে সহরবাসীদের সতর্কতা করবার এ একটা নিদর্শন। প্রথম সাইরেনে মানে, সাবধান, বিপদ এসেছে। আশ্রয়স্থলে যাও। তারপর যতক্ষণ না বিপদ কেটে যায় অর্থাৎ শত্রুপক্ষ চলে না যায় ততক্ষণ অল ক্রিয়ার নির্দেশ দেবে না। অল ক্রিয়ার দিলে সকলে যথারীতি কাজ করতে থাকবে।

মাধবী গালে হাত দিয়া বলিল, মাগো! এতো আছে। ও মুখপোড়ারা আসেই বা কেন! শুধু শুধু আমাদের ভয় দেখাতে আসা।

মনোজ চোখ দুইটি আরও বড় করিয়া বলিল, বৌদি, সে অনেক কথা। তারপর চপলার দিকে 'আঙ্গুল দেখাইয়া' বলিল, ওর অবস্থা দেখেছো! বলিয়া হো হো করিয়া হাসিয়া উঠিল।

মাধবী অচলাকে কোলের কাছে টানিয়া বলিল, ওর কথা কেন, আমিই তো ভয়ে সারা! কি বিচ্ছিরি শব্দ! যেন মরণ আর্তনাদ! তারপর অচলাকে বলিল, তুই যা, তোর মা হয়তো খুঁজছে।

অচলা নিঃশব্দে চলিয়া গেল। মাধবী আর দাঁড়াইয়া রহিল না। দেখিল ষোড়শী দাপাদাপি করিয়া ঘুরিতেছে। তাহার স্বামী রাগ করিয়া অসময়ে কোথায় যে গেল কে জানে। মাধবী ছুটিয়া গিয়া তাহাকে শাস্ত করিতে লাগিল।

সমস্ত আবহাওয়া একমুহূর্তে পরিবর্তিত হওয়ায় সকলেই যেন কেমন ধারা হইয়া গিয়াছে।

এত বড় বাড়ীর মধ্যে আর্টিষ্টের বৌ মীনাঙ্কির সঙ্গে কাহারও বিশেষ বনিবনা নাই। মেয়েদের মহলে সে নিজেকে বড় ঘরের মেয়ে-বৌ বলিয়া পরিচয় দিয়া আত্মস্তুতি দেখায়। বয়স অল্প। রূপের ছটা নাই বলিলেই চলে। অপরাজিতা, মাধবী, অচলা, ষোড়শী, বড় ভাড়াটিয়ার বৌ, বাড়ীওয়ালী এবং নীচেকার বৌদের কাহারও সঙ্গে তাহার তুলনা করা চলে না। কিন্তু তবু ঔজ্জ্বল্য বাড়াইতে মীনাঙ্কির ক্রটি নাই। সকলের সঙ্গে মিশিলেও পরস্পরের মধ্যে মন খুলিয়া কথা বলিতে দেখা যায় না।

অল্পদিন হইল এই নবদম্পতি এ বাড়ীতে একখানি ঘর ভাড়া করিয়া বাস করিতেছে। আর্টিষ্ট পরেশবাবু কমার্সিয়াল ছবি আঁকিয়া কিছু রোজকার করে। এতদিন সে একটা মেসে থাকিয়া নিজের ব্যবসা চালাইয়া যাইত। আর্ট স্কুল হইতে বছর ছয়েক হইল পাশ করিয়াছে।

সম্প্রতি ইউরোপে যুদ্ধ বাধিয়া যাওয়ায় জার্মানীর মাল আসা বন্ধ। ইউরোপীয়ান ফার্মেরও অবস্থা খারাপের দিকে মোড় ফিরিয়াছে। সুতরাং সব সাহেবী বিজ্ঞাপন একরূপ নূতন করিয়া বাহির হওয়া বন্ধ। ব্যবসায়ের দিকটা ভাল নয়। নানাকারণে পরেশের আয় একে একে কমিয়া আসিতেছে। সংসার চালানো শক্ত। অতীতকালে ঘুরিয়াও বিশেষ সুবিধা হইতেছে না। কর্মক্রান্ত অবস্থায় ফিরিয়া আসিয়া সে বিছানায় গড়াইয়া পড়িল।

মীনাঙ্কি কাছেই ছিল। ঘরে বসিয়া কি একটা কাজ করিতেছিল। স্বামীকে আসিতে দেখিয়া এবং অমনভাবে শুইয়া পড়িতে দেখিয়া ব্যস্ত হইয়া উঠিল। কাছে গিয়া বলিল, অমন করে শুয়ে পড়লে কেন? শরীর ভাল নাই?

আর ভাল ! অবস্থা কাহিল ! সংসার অচল ।

যাও তোমার কেবল ঐ এক কথা ! ভারি তো সংসার । ছুটি তো প্রাণী ! বাচ্চাটার কথা ছেড়েই দাও ।

তাও আর চালাতে পারি না । ব্যবসায়ের অবস্থা দিন দিন শোচনীয় হয়ে উঠেছে । তার চেয়ে এক কাজ কর, তোমরা সব দেশে যাও । তবু কতকটা সামলান যাবে ।

আর তুমি ! বলিয়া মীনাফি রোষভরে স্বামীর পানে তাকাইল ।

আমি যেমন ছিলাম তেমনি থাকব । সেই পুরোনো মেসেই যাব না হয় ! তাছাড়া বোমার বাজার । কখন যে কি হয় কিছুই বোঝা যায় না । ও দিকে জাপানীরা হুড়মুড় করে এগিয়ে আসছে । কখন কি করে বসবে জানা যায় না তো ।

তা আশ্রুক । এদের সঙ্গে পারবে না ।

না পারুক । কিন্তু বোমা ফেলে একশেষ করে দেবে । জানো না তো এক একটা বোমা কি ভীষণ ।

তা হোক । আমি এখান থেকে যাচ্ছি না ! তুমি থাকবে আর আমি যাব কোন চুলোয় । সেটি হবে না ।

আমরা তো ছুটে পালাতে পারব । কিন্তু তোমরা কি করবে ?

আমরাও পালাবো । আমি কি হাঁটতে পারি না মনে কর । এত লোক কলকাতায় আছে, তাদের যা হবে আমারও তাই হবে । সেজন্য ভেবো না ।

এখন রোজ সাইরেন বাজবে । রাস্তায় লোক চলা দায় হবে রাস্তিরে । সব যুটযুটে অঙ্ককার হয়ে যাবে । পাশের মানুষ চেনা যাবে না । চুরি পকেটমারদের মরসুম পড়ে যাবে । মানুষ টেকা দায় হবে তখন ।

তা বলে তারা ঘরে এসে আর চুরি করবে না । রাস্তায়—তা সে রাস্তিরে না বেরুলেই তো হ'ল ।

ঘরে থাকলে কি সংসার চলে ?

সমস্ত দিন ঘোর, কাজ জোগাড় কর। রাত্তিরে না বেরুলেই তো হ'ল।

যাক অত শত বুঝি না। তোমাকে বোঝাতেও পারব না। যা ভাল হয় কর।

তা বলে আমি এখান থেকে এক পাও নড়ছি না। অপুদি, মাধবীদি, ষোড়শীদি, ভালমাসিরা সবাই কেউ তো যাবার নাম করে না। কেবল তোমার ঐ এক কথা। বোমা—বোমা! বোমা যেন ঠিক আমাদের ঘাড়ে এসে পড়ছে না কি।

তোমাকে নিয়ে আর পারি না। জাপানীরা কি বলেছে জানো? সহর থেকে সবাই সরে যাও। নইলে নির্ধ্যাত মৃত্যু।

যাও, যাও।

যাবে না যদি, তবে খাবে কি?

যেন ওর টাকাতেই সব চলে। কদিন থেকে আমার কত টাকা গেল জানো। তুমি টাকা না দাও, আমার নিজের টাকা ভেঙ্গে খাব। এখানে একবেলা খেয়েও আরামে থাকব। তা বলে অমন দেশ-মুখো আর হচ্ছি না।

তবে মর। আমি আর কিছু বলব না।

আচ্ছা আচ্ছা, হয়েছে। কিছু আর বলতে হবে না তোমায়। এখন বল রাত্তিরে খাবে কি?

ভাতই খাব।

তবে বললে যে শরীর খারাপ। সব ধাপ্পা কেবল তোমার! দেখি তোমার গা-টা! বলিয়া তাহার কপালে বুকে হাত দিয়া হাসিয়া সরিয়া গেল মীনাক্ষি; বলিল, এত ভয় দেখাতেও পার তুমি! নাও ওঠো, চা করে দোব একটু!

তাই দাও, বলিয়া পরেশ উঠিয়া বসিল। মীনাক্ষি চায়ের জল চড়াইবার জন্ত ষ্টোভটা টানিয়া বাহির করিল চৌকির নীচে হইতে।

ষোড়শী শুইয়াছিল, বাহির হইতে অপরাজিতা ডাকিল, কি, কি হচ্ছে !

এসো দিদি, এইমাত্র গা গড়াচ্ছি। আজ অনেক কাজ করতে হ'ল কিনা ? কোমরটা কটকট করছে। সেই কখন থেকে বসে বসে কাজ করছিলাম।

অপরাজিতা গিয়া খাটের উপর বসিল।

ষোড়শী সরিয়া গিয়া বলিল, ভাল করে বস দিদি ! কি খবর ? খবর সব ভালো। তারপর কানের কাছে মুখ নিয়া গিয়া বলিল, সেদিন বরকে অমন করে চটালে কেন ? অমন বর পছন্দ হয় না নাকি ? ষোড়শী নিমেষে গম্ভীর হইয়া গেল।

বল না ?

কি আর বলব ? নিত্যি অভাব ! এই সেদিন তোমার কাছ থেকে টাকা নিয়ে তবে সংসার চালাই। সংসার যে কি করে চলবে, টাকা রোজগার যে কিসে হবে সেদিকে খেয়াল নাই। ওর যত সব বাজে কাজে হাত। তাই আমার রাগ হয় মধ্যে মধ্যে। তোমার স্বামী কিন্তু বেশ ! দিন রাত টাকা নিয়ে ব্যস্ত।

অপরাজিতা ফস করিয়া বলিল, বর বদল করবে ?

ষোড়শীও সঙ্গে সঙ্গে উত্তর দিল, রাজি ! দেবে হাত ছেড়ে !

এই মুহূর্তে। তুমি রাজী থাকলেই হ'ল। আমার আপত্তি নাই !

অপরাজিতা ষোড়শীকে জড়াইয়া ধরিয়া বিছানায় শুইয়া পড়িল। কানে কানে বলিল, যে যা চায়, তা পায় না। ছুঃখ করে আর লাভ কি ভাই, তবে সত্যি বলছি, তুমি যা পেয়েছ তার কদর বুঝলে না। অমন ব্যক্তি আমার ভাগ্যে জুটলে দিনরাত পূজা করতাম কাছে বসিয়ে। শুয়ে শুয়ে কত গল্প করতাম আর শুনতাম।

ষোড়শী বলিল, ওসব বাজে কথা বলো না।

সত্যি ভাই ! যে যা চায় সে তা পায় না ! তুমি টাকার জগে জ্বলছো। আমি টাকা নিয়ে জ্বলছি।

শুইয়া শুইয়া তাহারা দুইজনে মনের কথা বলিয়া চলিল।

অপরাজিতা সামনে তাকাইয়া দেখিল লাল টকটকে গোলাপ ফুলের মালাটি এখন কি হইয়া গিয়াছে। তাই বলিয়া বসিল, এ মালা কখন গলায় পরলে না। হতভাগী কোথাকার!

সত্যি দিদি! ওটা দেখা মাত্রই আমার মনটা রাগে জ্বলে উঠেছিল। এখন দেখছি, সত্যি অন্ডায় করেছে। সে সময় ও সব কড়া কথা না বললে উনি অমন করে চলে যেতেন না। যাওয়ার পরই রাস্তায় সাইরেনের শব্দ। ওঁর কত কষ্ট হয়েছিল না তখন।

তবে? সত্যি কথা বলি ষোড়শী, তোমার যখন যা দরকার হবে আমার কাছ থেকে চেয়ে নিও। পরে সুবিধা হলে দেবে। কিন্তু মাথার দিব্যি রইল, তাঁকে টাকার জন্তে যেন গঞ্জন সইতে না হয়।

বেশ দিদি! দাও না কিছু টাকা। ধার হিসেবেই দাও।

বেশ দোব। কিন্তু এটা তোমাদের দুজনের জন্তে দিলাম। দুখানা নোট দুজনের জন্তে। তোমার জামা কাপড় আর ওঁর জামা কাপড়। এই টাকায় তোমরা কিনবে। দুজনে দোকানে যাবে। দুজনে পছন্দ করে কিনবে। দুজনে পড়বে। তারপর আমার যা যা করণীয় করব।

কি করবে দিদি?

তোমাদের দুজনকে নেমস্তন্ন করে খাওয়াব একদিন। আমার বড় সাধ। বল রাখবে? বলিয়া অপরাজিতা করুণ চোখে ষোড়শীর পানে তাকাইল। দুইজন দুইজনকে জড়াইয়া ধরিয়াছে। দুইজনের চোখেই জল।

ষোড়শী বলিল, এতও জানো দিদি?

এই নাও টাকা। কাল তোমাদের সন্ধ্যায় নিমন্ত্রণ থাকল। কাল সকালেই কিনে আনবে কিন্তু দুজনেই দোকানে গিয়ে।

বেশ। কি কি, কেমন কেমন কিনব বল?

তোমাদের পছন্দ মত।

আচ্ছা দিদি, এ তোমার কি খেয়াল বল তো?

তোমাদের দুজনকে ভালবাসি কিনা। তাই।



তুইজনে একেবারে তুইজনকে জড়াইয়া ধরিয়া আছে। অপরাজিতা স্নেহের অতিশয্যে ষোড়শীর মুখে গোটা কয়েক চুষন দিল।

বাহিরে জুতার শব্দ উঠিল। পরক্ষণে দরজা ঠেলিয়া নবেন্দু ঘরে ঢুকিয়াই অবাক। তারপর পিছন হটিয়া বাহিরে আসিয়া দাঁড়াইল।

অপরাজিতা আর ষোড়শী তাড়াতাড়ি উঠিয়া বসিয়া হাসিতে লাগিল। লজ্জাও কম পায় নাই তাহারা।

অপরাজিতা বলিল, আমি চলি ভাই। উনি বাইরে দাঁড়িয়ে রয়েছেন। বলিয়া উঠিয়া নিজের কাপড় গোছাইতে লাগিল।

ষোড়শীও তাহার কাপড় গোছাইতে গোছাইতে বলিল, যাবে কোথায়? দাঁড়াও। তোমায় মজা দেখাচ্ছি। তারপর নবেন্দুকে ডাকিল, ওগো ভেতরে এসো। ওখানে দাঁড়িয়ে আছ কেন? অপুদির কাণ্ড শোন।

নবেন্দু ঘরে ঢুকিয়া তাহাদের তুইজনকে দেখিতে লাগিল।

ষোড়শী বলিল, দিদির শখের কথা শোন। আমরা তুজনে দোকানে গিয়ে আমাদের পছন্দ মত ভাল কাপড় জামা কিনে এনে তাই প'রে ওর কাছে নেমস্তন্ন খেতে যাব।

বড় লোকের নেমস্তন্ন খেতে যাওয়ার বিপদ আছে জানো তো? ও সব আমাদের দ্বারা হবে না।

কেন হবে না? টাকা নাই?

নাই তো? কিসে কিনব? দরকার কি যেচে নেমস্তন্ন নেওয়ার? যেচে নয়। সেধে নেমস্তন্ন করতে এসেছে।

নিষেধ করে দাও। ও সব আমাদের পোষাবে না।

অপরাজিতা লজ্জায় কাঁঠ হইয়া গেল। এক পাশে দাঁড়াইয়া রহিল। কাজটা খেয়ালের বশে সে করিয়া ফেলিয়াছে। ভাল হয় নাই। অশ্রু ভাবে করিলেই হইত। এখন কি ভাবে কথাটাকে ঘুরাইয়া লইবে তাহা ভাবিতে লাগিল।

নবেন্দু বলিল, বড় লোকের গায়ে গা দিয়ে চলতে নাই। পরে পস্তাতে হয়। চলতে হয় সমানে সমানে।

অপরাজিতার ইচ্ছা হইল সরিয়া পড়ে। কিন্তু তাহা পারিল না। স্থির হইয়া একপাশে দাঁড়াইয়া তাহার কর্মফল ভোগ করিতে লাগিল। নবেন্দুকে সে জানে।

ষোড়শী একবার তাকাইল অপরাজিতার পানে। তারপর অবস্থা বুঝিয়া তাহার একটা হাত ধরিয়া বলিল, দিদি, ওঁর কথায় রাগ করো না। আমি সব ব্যবস্থা করে তোমার ওখানে কাল নেমস্তন্ন রাখব। মনে কিছু করবে না। ওঁর কথার ধরণই এই রকম।

না না, ও কিছু নয়। কিছু মনে করি নি। মনে করবার আছেই কি! বলিতে বলিতে অপরাজিতা সরিয়া পড়িল।

সে চলিয়া যাইতে ষোড়শী শব্দ হইয়া বলিল, জানো, দিদি আমাদের যা ভালবাসে এমন কাকেও না। তোমাকে কি কম ভালবাসে। কথাটা বলিয়া ফেলিয়া পরক্ষণে তাহাকে অগ্ৰভাবে ঘুরাইয়া বলিতে লাগিল।

নবেন্দু বুঝিল অপরাজিতার কথা। সত্যই নানাভাবে তাহার উপর অপরাজিতার আস্তুরিকতা লক্ষ্য করিয়াছে সে। আজ তাহাকে নিজের ঘরে পাইয়া এমন অপমান করা ঠিক হয় নাই। একটু খামিয়া সহজ সুরে বলিল, এতক্ষণ ধরে আমাদের কথাই হচ্ছিল বুঝি দুজনের মধ্যে? কি সব বলছিল—খুব নিন্দে!

ষোড়শী বলিল, দিদি তোমার কথায় পঞ্চমুখ। তোমাকে সত্যি শ্রদ্ধা করে। ভাল চোখেই দেখে। তোমাকে দেখে বলেই তো আমাকে কত কথা শুনতে হয়। না, দিদি আমাদের হিতাকাঙ্ক্ষী। ওকে ভুল বুঝো না। বলিয়া বালিসের তলা হইতে দুইখানা নোট বাহির করিয়া বলিল, এই নাও দিদির নমস্কারি।

দুই হাত পাতিয়া নবেন্দু বলিল, দাও।

ষোড়শী টাকা দিতেই নবেন্দু তাহা লইয়া মাথায় ঠেকাইল।

বলিল, অমন শুভাকাঙ্ক্ষীর প্রতি অশ্রায় ব্যবহারে লজ্জিত। চল, দুজনে গিয়ে ওঁর কাছে ক্ষমা চেয়ে আসি। এসো এসো। কি মনে করেছেন উনি জানি না।

রাস্তায় টেলিগ্রাম, টেলিগ্রাম, বলিয়া হাঁকিয়া চলিয়াছে খবরের কাগজের হকাররা।

রাস্তায় লোক জমিয়াছে। সংবাদ গুরুতর। বোমার কথা। আর যুদ্ধের কথা। জাপানীর আসিল বলিয়া। এদিকে সাজ সাজ রব।

মনোজ একখানা কাগজ লইয়া উপরে উঠিতেছিল। মুখে হতাশার ভাব। আর কলকাতায় থাকা চলবে না। এলো বলে।

বাড়ীশুদ্ধ সব একে একে আসিয়া মনোজকে ঘিরিয়া ধরিল।

ভালমাসি চীৎকার করিয়া বলিতেছে, গেল গেল, সব গেল।

ইতিমধ্যে কে যেন বলিয়া বসিল, ও ঘরে ছোট ভাড়াটিয়ারা কাল দেশে যাচ্ছে। ওরা আর থাকবে না। কখন বোমা পড়ে কে জানে! প্রাণ থাকতে পালিয়ে যাওয়াই বুদ্ধিমানের কাজ।

আবার একটা পরামর্শ সভা বসিয়া গেল। এখানে ওখানে সেখানে। ঘরে ঘরে আলোচনা চলিতে লাগিল। আর এই সহরে বাস করা চলে কি না।

একদল ঠিক করিয়াছে, মরি বাঁচি এখানেই থাকিব। আর একদল বলিতেছে, সুবিধা বুঝিলে পালাইতে কতক্ষণ। অশ্রু দল স্থির করিয়া ফেলিয়াছে, আগুনের মধ্যে থাকা ভাল কথা নয়। কাঁচা প্রাণ পরের হাতে তুলিয়া দিতে তাহারা পারিবে না। আপাততঃ সরিয়া পড়া যাক। পরে অবস্থা ভাল হইলে আসা যাইবে। নানাজনের মানা মত।

মাধবী অপরাজিতার ঘরে। পাশে চপলা। বিরজা হস্ত দস্ত হইয়া আসিয়া ঘরে ঢুকিল। মনোজের হাতের কাগজ সে দেখিয়াছে।

মাধবী বলিল, মুন্সিল হ'ল একজনের। না না, দুজনের। দুদিন পরে ওরা এলেই হ'ত। যত সব বাধা দেবার গৌসাই।

অপরাজিতা হাসিয়া বলিল, বাধা কিসের? ছুহাত এদের এক হোক তারপর ওরা হাতাহাতি করে মরুক না কেন? বলিয়া হো হো করিয়া হাসিতে লাগিল।

চপলা বলিল, আমাদের বাড়ীর কেউ কলকাতা ছেড়ে যাবে না ঠিক হয়ে গেছে।

তা যাবে কেন? ঠেস দিয়া বলিল মাধবী। তারপর বিরজাকে লক্ষ্য করিয়া বলিল, ওরাও যাবে না।

বিরজা বলিল, আমি যাব না। দেখি না কেমন বোমা পড়ে।

লড়াই হয় তুই দলের।

অপরাজিতা হাসিয়া বলিল, ওদের লড়াই না, তোমাদের ছুজনের লড়াই। বিয়ে তো হবে না, অনেক বাধা দেখছি।

কথাটা শুনিয়া বিরজা ও অচলার মুখ ফ্যাকাশে হইয়া গেল। অপরাজিতা তাহা লক্ষ্য করিয়াছে। তাই বলিয়া বসিল, অমন অলক্ষ্যে কথা বলতে আছে কি! বোমা, যুদ্ধ, এরোপ্লেন, ব্র্যাক-আউট হোক না যত খুসি। ওদের ঠেকায় কে? বড় বাড়ীর পিছন দিকের নীচের তলার ছোট একটা ঘরে থাকবে ওরা ছুজনে। সেখানটায় চলবে ওদের মধ্যযামিনীর পালা। যারা মরে মরুক! ওদের মারে কে? বিয়ে হবেই।

মাধবী বলিল, বড় ভাবিয়ে তুললে ওরা, জাপানীদের জন্তে পালাব না, পালাব ওদের জন্তে। এমন করে বেড়াচ্ছে ছুজনে যে থাকা যায় না। মুখ যেন ছায়াবাজির ছবি। ক্ষণে ক্ষণে পরিবর্তন হয় কত! আচ্ছা কথা দিচ্ছি, বিয়ে তোমাদের দোব। তবে যুদ্ধের একটা শেষ বেশ হয়ে যাক।

অপরাজিতা বলিল, এক কাজ করা যাক। বিয়ে দিয়ে ওদের কেন পাঠিয়ে দাও না কোন জঙ্গলে। সেখানে বোমা যাবে না, সাইরেনের শব্দ যাবে না। বলিয়া সে একচোট হাসিয়া লইল।

বিরজা বলিল, চলি দিদি।

তবে এ সময়ে এলি কেন? বলিয়া মাধবী কটাক্ষপাত করিল  
বিরজার উপর।

এই তোমাদের দেখতে? যে অবস্থা দিন দিন।

আমাদের দেখতে না তোমার নিজেরটিকে দেখতে? পড়াশুনা  
ভালই হচ্ছে। বাবাকে লিখে দোব সে কথা।

বিরজা দিদির কথা শুনিয়া অবাক হইয়া গেল। তবে দিদির কি  
মত বদলাইয়া গিয়াছে।

অপরাজিতা বলিল, ভাইটি, একটু পড়াশুনা কর। পাশ করতে  
হবে। না করলে বিয়ে করে একে খাওয়াবে কি? চপলা তো বলেছে,  
ফেল করা ছেলেকে বিয়ে করবে না।

বিরজা দেখিল, বোমার বাজারে সবাই গরম গরম কথা বলিতে  
আরম্ভ করিয়াছে। আর থাকা ঠিক নয়।

এমন সময় মনোজ কাগজখানাকে পতাকার মত উড়াইতে  
উড়াইতে আসিয়া ঘরে ঢুকিল। সব এক হো যায় গা! নিলে সব।  
পালাও পালাও! বিরজা, গতিক সুবিধার না। সরে পড়। আজ  
রাত্রে এক কাণ্ড হয়ে যাবে। যেখানে এসে ওরা পৌঁছেছে সেখান  
থেকে এখানে আসতে ক' ঘণ্টার পথ মাত্র। কাল সকালে হয়ত দেখব,  
সব সহর গুঁড়ো হয়ে গিয়েছে। ভাল চাও তো বাড়ী পালাও।  
আমি তো রেডি।

চপলা এক ফাঁকে সরিয়া পড়িয়াছে। বিরজা অপ্রস্তুত মুখে  
যাইবার জন্য পা বাড়াইয়াও যাইতে পারিতেছে না।

এই আবহাওয়ার মধ্যে পা টিপিয়া টিপিয়া আসিয়া দাঁড়াইল  
ভালমাসি। তাঁহার চোখ মুখ ক্যাকাশে হইয়া গিয়াছে। ভাবী  
আশঙ্কায় বিপর্যাস্ত। ইহাদের মতামত জানিতে চায়। সেও ঠিক  
করিয়াছে, এখানে থাকা আর নিরাপদ নয়।

প্রথম প্রথম ষোড়শীকে কাছে রাখিয়া অপরাজিতা নবেন্দুর সামনে বসিয়া গল্প করিত। তারপর কখন যে তাহারা মুখোমুখি বসিয়া গল্প জুড়িয়া দিয়াছে এবং ষোড়শী ও পাশে বসিয়া চায়ের জল গরম করিতেছে কিম্বা অগ্ন কাঙ্গে ব্যস্ত সে খেয়াল কাহারও হয় নি। ইহাদের অভাব কিছুটা মিটাইয়াছে অপরাজিতা এবং অপরাজিতার অভাবও কিছুটা মিটাইতেছে ইহারা।

সেদিন থিয়েটার দেখিয়া আসিল অপরাজিতা, ষোড়শী ও নবেন্দু। তারপর একদিন গেল সিনেমা দেখিতে তিনজনেই। আর একদিন গেল ইডেন গার্ডেন, চিড়িয়াখানা। এইভাবে অপরাজিতা নানা ভাবে নবেন্দুর সান্নিধ্যলাভের সুযোগ করিয়া লইতেছে। ষোড়শীকে এমন ভাবে হাত করিয়াছে যে, সে যাহা বলিবে ষোড়শী তাহাই করিবে।

অপরাজিতা, নবেন্দু ও ষোড়শীকে সাজাইয়া আদর যত্ন করে। রান্না করিয়া দুইজনকে খাওয়ায়। ভাল কিছু আনিলেই ষোড়শীকে না দিয়া নিজে ব্যবহার করে না।

একদিন আসিয়া অপরাজিতা হাসিয়া বলিয়া বসিল, তুই যে আমার! আমার যা কিছু সবই তোরা! কথাটা ষোড়শীকে বলায় সে এক মুহূর্ত্ত দেৱী করে নাই তাহা নবেন্দুকে বলিতে।

নবেন্দুর মনে আবার ঝড় উঠিয়াছে। অপরাজিতার ব্যবহার তাহার ভাল লাগিতেছে না। আশ্বে আশ্বে এমন ভাবে সে ইহাদের দুইজনের মধ্যে বসিয়া গিয়াছে যে নড়ান অসম্ভব। তাহাকে ছাড়া কোন কাজই আর ইহাদের হয় না।

অপরাজিতা সখী সাজিয়া নবেন্দু আর ষোড়শীর সেবা করে। বান্ধবী সাজিয়া হাসি ঠাট্টা করিতে থাকে। গৃহিনী সাজিয়া এই দুই

তরুণ তরুণীকে দুই কোলে বসাইয়া আদর করিতে আহ্বান করে। নানা রূপে নিজেকে সে ইহাদের লইয়া ব্যস্ত থাকে। নিজে বেশ বুঝিয়াছে নবেন্দুর দৃষ্টি কোন দিক দিয়া চলিতেছে। ষোড়শীকে শিখণ্ডি করিয়া না রাখিলে ভাল দেখায় না। নবেন্দুর বুঝিতে আর বাকী রহিল না অপরাজিতাকে। অপরাজিতারও তাই।

কিন্তু বেশীদিন কথাটা চাপা থাকিল না। ভালমাসি একদিন অপরাজিতার স্বামীকে স্পষ্ট জানাইয়া দিল।

যুদ্ধের বাজারে এই বাড়ীতে অন্তর্দ্বন্দ্ব আরম্ভ হইয়াছে কয়েক দলের মধ্যে। ঘটনা যে নানাভাবে ছড়াইয়া পড়িয়াছে এই বাড়ীখানার বিভিন্ন অংশে তাহার পরিবেশটা অভিনব। মনোজ্ঞ বাইরের ঘরে থাকিত। বিরজার আবহাওয়া তাহাকে পাইয়া বসিল। মনোজ্ঞের ঘর হইতে শাড়ীর শব্দ শোনা যায়।

ভালমাসি যতই ঢাক পিটাইয়া বেড়াক না কেন তাহার শক্তি কোন কাজে লাগিতেছে না। বরং বিষাক্ত আবহাওয়াটা ছড়াইয়া পড়িতেছে দিন দিন।

মীনাঙ্কি ও পাশে যাইতেছিল। ভালমাসি তাহাকে টানিয়া লইয়া গেল একধারে। ফিস্‌ফিস্‌ করিয়া বলিল, তোমরা এই যুদ্ধের বাজারে থাকবে তো ?

মীনাঙ্কি বলিল, সেই রকমের ইচ্ছা তো আছে। তবে সবাই যদি পালাতে আরম্ভ করে তো আমরা দুজনে একলা থাকব কি করে ? আপনারা কি করবেন ঠিক করেছেন কিছু ?

ভালমাসি গম্ভীর হইয়া বলিল, এমনিতেও না, অমনিতেও না। এ বাড়ীতে থাকা আর সম্ভব নয়। বিষাক্ত আবহাওয়া সর্বত্র ছড়িয়ে পড়েছে। ঘরে ঘরে কি সব করছে, ঘটছে দেখলে গা ঘিন ঘিন করে। সবাই সমান। ও সব আর চোখে দেখা যায় না।

মীনাঙ্কি সায় দিয়া বলিল, সবাই সমান। বাধা না দিলে ক্রমেই বেড়ে যেতে থাকে। এক থেকে দুই, দুই থেকে তিন, দেখতে দেখতে

ও সব ব্যাপার গা সওয়া হয়ে যায়। সব ঘরে, সব জায়গাতেই ঐ এক ধারা চলছে। কোথায় যাবেন। বাধা দেবেন কোথায়। আর বাধা দিলেই বা শুনবে কে? শ্রোতের ফুল। সব চলেছে একদিকে। একটু থামিয়া মীনাঙ্কি ভালমাসিকে বলিল, ওসব ভেবে ফল নাই। লোকের কথায় থেকে কি ফল! নিজের নিয়ে থাকাই ভাল। চার দিক থেকে এসে জুটেছি। কারও সঙ্গে কারও সম্বন্ধ নাই। এক আসছে এক যাচ্ছে। এ একটা সরাইখানা। ভান্সা হাট যেন।

ভালমাসির ভাল লাগিল না মীনাঙ্কির কথাগুলি শুনিতে। আঘাত খাইয়া খাইয়া তাহার মন ভাঙ্গিয়াছে বলিয়া আর আগেকার মত চীৎকার করিয়া বেড়াইত না। গায়ে গা দিয়া ঝগড়া করিবার আর প্রবৃত্তি হয় না। ঢাকা ঘুরিয়াছে। কিন্তু তাহার ঢাকা কাদায় পড়িয়াছে।

ও দিক হইতে চীৎকার শোনা গেল, কে যেন আর একজনকে শাসাইয়া বলিতেছে, বোমার বাজার, এই আছি, এই নাই। ভাল কথা বল। যেতে আর কতক্ষণ।

উত্তর হইল, বোমায় তোমার মরণ নাই। হলে বাঁচি।

মীনাঙ্কির হাসি পাইল। এমন বোমাকে কেন্দ্র করিয়া মানুষ ভালবাসারও লীলাখেলা না দেখাইয়া ছাড়ে না।

মীনাঙ্কি আগাইয়া চলিল। চপলাকে ধরিয়া মাধবী চুপি চুপি কি কথা বলিতেছে যেন। কাছে গিয়া শুনিতে পাইল, মাধবী একটু আগে তাহাদের লইয়া যে কথা বলিয়াছে তাহা সামান্য রসিকতা ভিন্ন আর কিছু নয়। সেজ্ঞ সে রাগ না করে।

মীনাঙ্কি থমকিয়া দাঁড়াইল।

মাধবী তাহাকে দেখিয়া হাসিয়া বলিল, এই রাধিকার মানভঞ্জন হচ্ছে আর কি! বিয়ে যে এদের হবে না সে জানি। অমন বাবা যার তার সম্বন্ধে ঠিকই ভেবেছি। তবে যতদিন মানভঞ্নের পালা গাওয়া যায় ততদিন সময়টা তো কাটবে এক রকম।



চপলা রাগে ছিটকাইয়া সরিয়া গেল।

মাধবী বলিল, যেও না বাছা, ও ঘরে ননীর ভাঁড় আছে। ঘাটে যেতে হবে। কাণ্ডারীকে ঘাটেই পাবে।

মীনাঙ্কি বলিল, দিদি যেন কি।

ঐ নিয়েই তো আছি। ভাই আর চপলা, দেওর আর মানসী। দোব ছটোকে গাঁথিয়ে। তারপর মজা দেখুক না। একটু হাসিয়া বলিল, আচ্ছা এদের ছজনকে বদলানো যায় না। ভাগ বদলান?

মীনাঙ্কি বলিল, তা কি হয়, যার দিকে যার মন।

দূর ছাই! দেখবে? ছুদিন কাছে বসতে দিয়ে ছটো কথা বলতে দিলেই ভালবাসা জমে উঠবে। তখন আগেকার ভালবাসা-জনের কথা মনেই আসবে না আর।

দীর্ঘনিঃশ্বাস ফেলিয়া মীনাঙ্কি বলিল, এই-ই ছুনিয়ার রীতি।

মাধবী সায় দিয়া বলিল, এই সত্যি, আর সব মিথ্যে! ভালবাসার পাখা আছে, কেবল উড়ে বেড়ায়। চোখের খেলা শুধু।

যা বলেছ দিদি! আসি তবে।

মাধবীর সেদিনকার কথা শুনিয়া বিরজা ঘাবড়াইয়া গিয়াছিল। ভয়ে হোক, রাগে দুঃখে অভিমানে হোক সে পর পর কদিন আসিল না। সহরের আবহাওয়া এই কয়দিনেই বদলাইয়া গিয়াছে।

চপলা খুর খুর করিয়া ফেরে। মুখ শুকাইয়া মাধবীর আশে পাশে ঘুরিয়া বেড়ায়। কথা বড় বলে না।

মাধবীর আর সহ্য হইল না। মনোজকে ডাকিয়া বলিল, যাও ভাই ঠাকুরপো, বিরজাকে ডেকে আন একবার।

মনোজ তো অবাক। বিরজাকে ডাকিতে হইবে অবশেষে। যে রোজ না আসিলে থাকিতে পারিত না; তাহার আসা বন্ধ হওয়ার কারণ কি? বৌদির সেদিনকার তাড়া খাইয়া আর এ পথ মাড়াইবে না বোধ হয়। মনোজ বাঁকিয়া বসিল।

অবশেষে অনেক সাধ্য সাধনা করিয়া মাধবী মনোজকে পাঠাইল। বলিয়া দিল, বিরজাকে নেমন্তন্ন করে এস। সে আজ এখানে থাকবে। আনা চাইই।

মনোজের সঙ্গে বিরজা আসিল। আসিতেই মাধবী তাহার হাত চাপিয়া ধরিয়া বলিল, রাগ করলে ভাই সে দিনকার কথায়। দূতিয়ালী করতে গেলে অনেক কিছু শিখতে হয়। এইসব নতুন কথা সবে শিখেছি তাই তোমার ওপর প্রয়োগ করে দেখলাম, ভালবাসার গভীরতা কতটুকু জন্মেছে তোমার! তা দেখছি এখন মাটি কাঁচা। শক্ত হতে দেরী আছে। শক্ত হলে তবে ছাঁচ বাঁধবে। তার অনেক দেরী এখনও। সে দিক দিয়ে চপলা ঠিক আছে।

বিরজা প্রথমটা ভয়ে ভয়ে ছিল। দিদির কথা শুনিয়া বলিল, তোমার পাল্লায় যখন পড়েছি তখন নাকানি চোকানি না খাইয়ে কি আমাদের ছাড়বে।

সকলেই হাসিতে লাগিল। এমন সময় দেখা মিলিল চপলার। বিরজাকে দেখিয়াই সে যে অত্যন্ত খুশী হইল তাহা আর কাহারও বুঝিতে বাকি রহিল না।

মাছুর পাতিয়া খেলার আয়োজন চলিতে লাগিল। সবে তাহারা একদান খেলিয়াছে এমন সময় সাইরেন বাজিয়া উঠিল।

পরক্ষণে দেখা গেল একঝাঁক এরোপ্লেন তাহাদের মাথার উপর দিয়া দ্রুত চলিয়া যাইতেছে।

নিমেষে আবহাওয়া বদলাইয়া গেল। আশে পাশের দরজা জানালা ছুম দাম করিয়া বন্ধ হইতে লাগিল। মনোজ তাড়াতাড়ি ঘরের দরজা জানালা বন্ধ করিয়া আলো নিবাইয়া বসিতেই সকলে ভয়ে এতটুকু হইয়া গেল।

এরোপ্লেনগুলি আবার ছুম ছুম করিয়া ফিরিয়া আসিতেছে যেন। কিন্তু এদিক দিয়া কেন?

একটা প্রচণ্ড শব্দ উঠিল। টিনের উপর বোমা পড়িয়াছে

ঘরের মধ্যে কয়জন একেবারে জড়সড় হইয়া বসিয়াছে। কাহারও মুখে কথা নাই।

আবার শব্দ। আবার শব্দ।

পাশের ঘর হইতে কে যেন বলিয়া উঠিল, ঐরে! সেরেছে। দিলে সব শেষ করে। গেলাম আর কি! না পালাল চলবে না।

আর একখানা ঘর হইতে চীৎকার উঠিল। করুণ সে চীৎকার। আর্ন্তস্বরে বলিয়া চলিল, আর না, আর না! আর একদণ্ডও থাকা চলবে না। শেষে বেঘোরে প্রাণটা যাবে। সকাল হোক তো।

মাধবী বলিল, ভায়া, কপাল তোমার মন্দ। বড় আশা করে ডেকেছিলাম। সব ভেস্বে গেল। পথ দেখ এবার তুমি। তারপর চপলাকে ধরিতে গিয়া তাহাকে পাইল না হাতের কাছে। জোরে ডাক দিতেও পারে না। আস্তে আস্তে বলিল, চপলা, ও চপলা।

একটু দূর হইতে অস্ফুট শব্দ আসিল, এই যে আমি এখানে। কোথায় তুই! ব্যস্ত ব্যাকুল হইয়া উঠিল মাধবী।

চৌকীর নীচে। এক কোণে বসিয়া চপলা সাড়া দিল। এখানে, এখানে আছি চৌকীর নীচে, কোণের দিকে।

বিরজা, বিরজা কোথায়?

বিরজা ও ধারে একটা বেঞ্চি ছিল তাহার ভিতর হইতে সাড়া দিল, এই যে আমি! বেঞ্চির নীচে।

হো হো করিয়া হাসিয়া উঠিল মাধবী আর মনোজ। বিরজার মুখ দিয়া কথা ভাল বাহির হইতেছে না।

মাধবী তাড়াতাড়ি উঠিয়া আলোটা জ্বালিল।

মনোজ বাধা দিয়া বলিল, করছেন কি বৌদি! এখন আলো জ্বালে? এরোপ্লেন মাথার ওপর ঘুরছে। দেবে বোমা ফেলে। আলো জ্বলেছ কি মরেছ।

মরুক! মরাই উচিত! তারপর দুইকোণে দুইটি নিরাপদ আশ্রয়ের মধ্যে ইহাদের দুইজনকে দেখিয়া হাসিতে হাসিতে বলিল, আ

আমার কপাল, ভেবেছিলাম এই ফাঁকে ছুজনে ছুজনকে জড়িয়ে ধরে এক পাশে সরে থাকবে। তা না পালিয়েছে দেখ এরা কোথায়। এ ওখানে, ও সেখানে। নিরাপদ স্থান বেছে নিয়ে আগে থেকেই সরে পড়েছে। আর আমরা দেওর ভাজে মরি আর কি! কি দরদ! আমাদের ওপর দরদ না থাকতে পারে। কিন্তু তোমাদের পরম্পরের মধ্যে তো দরদ থাকা উচিত ছিল। মাধবী আবার হাসিয়া উঠিল; বলিল, এরই নাম ভালবাসা! প্রাণ রাখতে প্রাণান্ত।

মনোজ টিপ্তননী কাটিয়া বলিল, ওদের ভালবাসা অমনি!

মাধবী হাসিতে হাসিতে বলিল, আর না। অনেক শিক্ষা হয়েছে। বোমা বাজিয়েও শিক্ষা হ'ল না তোমাদের! বোমার ভয়ে হোক, এই সময়ের ফাঁকে হোক, ছুটি আপনজন এক হয়ে গায়ে গা দিয়ে মিশে থাকবে, তা না, এ ওদিকে, ও সেদিকে। কে কার খোঁজ রাখে। কে কার কথা ভাবে। বিপদ এলে আপন পর চেনা যায়। তোমরা তাই শেখালে, আর দেখালে আমাদের।

মাধবী উঠিয়া দাঁড়াইল। কোমরে কাপড় জড়াইয়া দুইজনকে গম্ভীর স্বরে ডাক দিল, এই বেরিয়ে এস। এস বেরিয়ে। প্রাণের টান কত। ভালবাসার বেশ নমুনা দেখালে যা হোক।

ও দিকের কোণ হইতে চপলা, এ দিকের পাশ হইতে বিরজা আসিয়া দাঁড়াইল শুষ্কমুখে মাধবীর সামনে।

বস এখানে। এমনি ভালবাসা তোমাদের! প্রাণের ভয়ে দে ছুট! কে কার খোঁজ রাখে। বলিয়া আবার হাসিতে লাগিল। মনোজ ছুটিয়া গিয়া আলো নিভাইয়া দিল।

ঘর অন্ধকার। চারিজন এক জায়গায় চুপ করিয়া বসিয়া রহিল। কে কি ভাবিতেছে অনুমান করা সহজ নয়। বাহিরে তখনও দাপা-দাপি চলিতেছে।

অপরাজিতা শুইয়া শুইয়া তখন নবেন্দুর কথা ভাবিতেছিল। এইমাত্র

তাহার লেখা একখানা বই পড়া শেষ করিয়াছে। বইখানির নায়িক মনে হইল সে নিজেই। নায়ক লেখক স্বয়ং।

ষোড়শী লেখাপড়া জানে না তাই রক্ষা। নইলে এই বইখানা লইয়া সে কুরুক্ষেত্র বাধাইয়া দিত।

অপরাজিতা ভাবিতে লাগিল, তাহার মনের কথা যেমন নবেন্দু ধরিয়াছে এমন আর কেহই পারে না। অপরাজিতার মনে হইল, তাহাকে আরও কাছে পাইলে সে সুখী হইত। কি ভাবে পাওয়া যায় তাহাই ভাবিতে লাগিল।

কখন ঘুমাইয়া পড়িয়াছে। বইখানা ও পাশে পড়িয়া আছে। পাশ বালিশটাকে জড়াইয়া ধরিয়া শুইয়া আছে। গায়ের কাপড় খুলিয়া গিয়াছে। এমন সময় বাহির হইতে সাড়া আসিল, ষোড়শী, ষোড়শী! তারপর দরজা খুলিয়া দেখিল বিছানায় অপরাজিতা। নবেন্দু একদৃষ্টে তাহাকেই দেখিতে লাগিল।

ও ধার হইতে উত্তর দিল ষোড়শী, এই যে যাচ্ছি।

ষোড়শীর কথায় নবেন্দুর চমক ভাঙ্গিল। দুই পা পিছাইয়া আসিয়া নিজের ঘরের দিকে চলিল।

দরজার সামনে ষোড়শীর সঙ্গে দেখা। একসঙ্গে দুইজনে ঘরে ঢুকিল। জামা খুলিতে খুলিতে নবেন্দু বলিল, কার কাপড় পড়েছ?

একগাল হাসিয়া ষোড়শী বলিল, অপুদি তার ভাল কাপড়খানা আমাকে পরিয়ে আমার আটপোরে একখানি ডুরে সাড়ী নিজে পরে—

অবাক হইয়া নবেন্দু বলিল, সর্বনাশ! হয়েছিল আর কি! তুমি শুয়ে আছ মনে করে ও ঘরে ঢুকে পড়েছিলাম। গায়ে হাত দিয়ে ডাকি আর কি—

ষোড়শী হাসিতে হাসিতে বলিল, দিদির ঐ এক সাধ। খেয়াল বটে! সত্যি আমাদের ছজনকে কি চোখেই না দেখেছে। তোমার কথা বলতে যেন ওর মুখ দিয়ে লাল পড়ে। বড় ভাল মেয়ে। নবেন্দু মনে মনে বিষয়টা অস্বপ্নমান করিয়া লইল। তারপর অন্য কথা আনিয়া

বলিল, আর তো রাখা যায় না তোমাকে। আমি উঠছি মেসে। তুমি দেশে যাও। এভাবে থাকা যায় না। শুনেছ কজন মরেছে কাল। এ বোমা তো কিছুই নয়। এই তো সবে পত্তন হ'ল। এর পর রোজ আসবে, হানা দেবে। কাল বরং তোমাকে রেখে আসি।

ষোড়শী বলিল, অপুদিও সেই কথা বলছিল।

তবে আর কথা কি? পাড়ি জমাও।

ষোড়শী চিন্তিত মুখে বলিল, আমি না হয় চলে যাচ্ছি। কিন্তু তুমি তো এই অবস্থার মধ্যে থাকবে। কখন কি হয় কে জানে!

আমার কথা ভেবো না। অবস্থা বুঝলেই ব্যবস্থা করবো। পা তুলেই রইলাম জানবে।

দুইজনে বসিয়া বসিয়া বিদায়ের পালা রচনা করিতে লাগিল।

## এগার

মীনাঙ্কি হাসিতে হাসিতে অপরাজিতাকে বলিল, বুকুলে দিদি, বিপদ এলে তখন শত্রু মিত্র জ্ঞান থাকে না।

তা বেশ ভালই জানি। এই তো তার নমুনা ! বলিয়া ভালমাসি, বাড়ী ওয়ালীর কথা পাড়িল।

কয়দিন হইতে এই দুই মহিলার মধ্যে ভীষণ ঝগড়া বাধিয়াছে। উপলক্ষ্য নীরদাসুন্দরী। সন্ধ্যার সময় তুমুল ঝগড়া। হাতাহাতির উপক্রম। এমন সময় সাঁইরেন বাজিয়া উঠিল। আর যায় কোথায়। ভালমাসি গিয়া নীরদাসুন্দরীকে জড়াইয়া ধরিল। বাড়ীওয়ালী বৌ গিয়া ধরিল ভালমাসিকে। তিনজনে জড়াজড়ি করিয়া ঢুকিল কলতলার মধ্যে নিরাপদ স্থানে। চারিদিক ঘেরা। বোমা পড়িলে তাহার কণা আর ছিটকাইয়া আসিতে পারিবে না।

উপরের আকাশে এরোপ্লেনের দাপাদাপি। নীচের কলঘরে এদের মাতামাতি। কোথায় বিপদ। কোথায় কোলাহল। মীনাঙ্কি হাসিয়া বলিল, তাহলে শ্রামের বাঁশীর গুণ আছে। সব এক করে দেয়।

অপরাজিতা আড়াল হইতে দেখিল নবেন্দু তাহার পানে একদৃষ্টে তাকাইয়া আছে। লজ্জা পাইয়া সে সরিয়া দাঁড়াইল। মীনাঙ্কিকে টানিয়া ও ধারে লইয়া গেল। পরক্ষণে আবার আগাইয়া আসিয়া দেখিল নবেন্দু ঠিক তেমনি ভাবে দাঁড়াইয়া আছে।

ভাব পরিবর্তন করিয়া অপরাজিতা মীনাঙ্কিকে বলিল, সব তো পালাতে আরম্ভ করেছে। তোমরা যাচ্ছ কবে ?

পালালেই তো হয়। ভাল লাগে না থাকতে। এই সব দেখে মনটা খারাপ করছে। কখন কি হয় বলা যায় না। কিন্তু দিদি তুমি ?

অপরাজিতা জানে তাহার যাইবার স্থান নাই। স্বামী দোকান বন্ধ করিয়া কখনও কলিকাতা ছাড়া হইবে না। আর সে কি করিয়া তাহাকে ফেলিয়া কোথায় যাইবে। কিন্তু অশ্রু কথা বলিল, আমি সব ঠিক করে রেখেছি। পালালাম বলে। এখানে কি থাকতে আছে। আর। না থাকা যায়।

এমন সময় ষোড়শী আসিল।

আমি তো রেডি। সব কথা হয়ে গেল। চললাম। দোষ ক্রটি করে থাকলে ক্ষমা করো দিদি। আবার যদি দেখা হয় তো মনের কথা বসে বসে বলব তখন।

অপরাজিতা অবাক হইয়া বলিল, তুমি একলা যাচ্ছ ?

হ্যাঁ। ওঁর যাওয়া কি সম্ভব ?

তা বটে ! পুরুষ মানুষ। ভয়ে পালিয়ে গেলেই বা চলবে কেন ? আর তেমন তেমন দেখলে পালাতে কতক্ষণ !

তবে দিদি একটা কথা বলে রাখি, অমুরোধ সেটা। উনি আমাকে পৌঁছে দিয়ে এখানে এসে যে কটা দিন মেস ঠিক করতে না পারেন সে কটা দিন ছুটো খেতে দিও। খরচ দেবার মত স্পর্দ্ধা রাখি না। দয়া করে দেখবে তোমার দাদাকে !

দাদা আবার কবে থেকে হলেন উনি। বলে হাসতে লাগল অপরাজিতা।

সেই যে একদিন দাদা আর বৌদি বলে আমাদের ছুজনকে নিয়ে কি সব বলে গেলে। বলিয়া অতীতের একটা রঙ্গমঞ্চের পর্দা অপরাজিতার সামনে ধরিয়া বসিল ষোড়শী।

অপরাজিতা কবে কি কথা বলিয়াছে খেয়ালের বসে তাহা কি তাহার মনে আছে ! ভাবিয়া বলিল, তা হবেও বা। যা বলছ বল। দাদাই বটেন !

মীনাক্ষি বলিল, তোমরা কথা বল, আমি চলি। কাজ আছে কত। গোছান গোছান বলিয়া ইত্যাদি, সে চলিয়া গেল।



অপরাজিতা শক্ত মুঠিতে ষোড়শীকে ধরিয়া বলিল, চল বৌদি, দাদাকে বলে আসি কথাটা।

ষোড়শী অপরাজিতার মুখ চোখের ভাব দেখিয়া ভয় খাইয়া গেল। বলিল, না, না, রাগ কর কেন ?

অপরাজিতা মনে মনে ভাবিয়া লইল এই রকম একটা কথা। না হইলে সুবিধা হইবে না।

তুই জনে ও ঘরে গেল।

ষোড়শী বলিল, দেখ আমি তো চললাম। যতদিন কোন ভাল মেস না পাও ততদিন এখানেই থাকবে। দিদির জিন্সায় রেখে যাচ্ছি কোন অসুবিধা হতে দেবে না সে।

নবেন্দু হাসিয়া বলিল, মেয়েদের জিন্সায় ছেলেরা থাকবে। না ছেলেদের জিন্সায় মেয়েরা থাকে।

অপরাজিতা গম্ভীর হইয়া বলিল, ওসব কথা শুনি না দাদা, কাল থেকে আমার তত্ত্বাবধানে থাকতে হবে। বড় কড়া মেয়ে আমি। যা বলব তাই করতে হবে। উঠতে বললে উঠবে, বসতে বললে বসবে।

ও আমি পারব না। অন্য পথ দেখ ষোড়শী। তোমার দিদির অধীনে থাকতে পারি। কিন্তু আমার বোনের অধীনে থাকতে নারাজ। বলিয়া গম্ভীর হইয়া উঠিল নবেন্দু।

কারণ !

কারণ অনেক। বোনটি লোক ভাল নয়। পেটে পেটে কি সব মতলব খেলছে।

ষোড়শী অপরাজিতাকে বলিল, ওর কথা ছেড়ে দাও। আমি তোমার জিন্সায় ওকে রেখে যাচ্ছি। এমন শক্ত বাঁধনে বাঁধবে যেন নড়তে না পারেন। বেয়াদপি করলেই চাবুক লাগাবে।

সে বৌদি হলে পারতাম। বোন হয়ে পারব কি করে ?

সবই হবে। যখন যেমন বুঝবে তখন তেমন করবে ?

অপরাজিতা বলিল, এস বৌদি, তোমার বিদেয়ি কাপড় নিয়ে যাও।

এখন থেকেই তোমায় বিদেয় করে বাঁচি। বলিয়া নিজেই হাসিতে হাসিতে তাহার ঘরে চলিয়া গেল।

নবেন্দু বলিল, বৌদির মত মানুষ আর দেখা যায় না।

আমাদের দুজনকে কি চোখেই না দেখেছে। বলিল ষোড়শী।

নবেন্দু বলিল, ওকে নায়িকা করে একখানা বই লিখব। নানা রূপে আমাদের সামনে এসে দাঁড়ায়। কখনও আমার মা হয়ে কাছে আসে। তেমনি কাপড় প'রে। কখন তোমার মা হয়ে বসে। তেমনি জামাইত্ব। কখন বৌদি, কখন বা বোন। সময় সময় যি সেজে ব'সে আমাদের সেবা করে। অদ্ভুত মেয়ে। মেয়ে অপরূপা।

তাই তো বলি, মানুষ বটে একখানা। বলিল ষোড়শী।

দুখানা নয় তো? হাসিয়া বলে নবেন্দু।

কথা চলিয়াছে অপরাজিতার নানা রূপ সম্বন্ধে দুই জনের মধ্যে, এমন সময় অপরাজিতা আসিয়া সামনে দাঁড়াইল। হাতে শাড়ী একখানা। লালপেড়ে শাড়ী। টকটকে লাল।

নবেন্দু হাসিয়া বলিল, বিদেয়ির বহরটা ভালো। আমিও তো যাচ্ছি ওর সঙ্গে। আমাকে বিদেয়ি দেবে না।

ধমক দিয়া অপরাজিতা বলিল, অমন করে কথা বললে আর আমি তোমার সঙ্গে কোন সম্বন্ধ রাখব না। কথা খুব শিখেছ।

টপ টপ করিয়া অপরাজিতার চোখ দিয়া জল গড়াইয়া পড়িল। সবাই অবাক। অপরাজিতা নিজেও কম অবাক হয় নাই। আর কথায় কথা বাড়াইয়া লাভ নাই। লজ্জিত হইয়া সে সরিয়া পড়িল।

নবেন্দু ষোড়শী এক দৃষ্টে অপরাজিতার পানে চাহিয়া রহিল।

সাজ সাজ রব উঠিয়াছে বাড়ীর সকলেরই মুখে।

মুন্সিল হইয়াছে শশীপদ আর তাহার স্ত্রীর। বাড়ীর কর্তা সাজিয়া বসিয়া বেশ নির্বিবাদে ও কর্তৃত্ব বজায় রাখিয়া চালাইতেছিল। বাধ সাধিল যুদ্ধ ও তাহার আতঙ্ক।

সকলে চলিয়া যাইবে। এত বড় বাড়ী পড়িয়া থাকিবে। কে ভাড়া দিবে। বাড়ীর মালিককে পত্র লিখিয়া সে কথা না জানাইলে সমস্ত দাবী ও ঝুঁকি তাহারই উপর গিয়া পড়িবে। তখন—

ভীষণ ভাবনা ধরিয়াছে এই দম্পতির। কিন্তু বিপদ তো তাহাদের একার নয়। সর্বত্রই এই এক অবস্থা। সকলেই পলাইতেছে। সকল বাড়ীওয়ালার একই অবস্থা। সে কথা ভাবিয়া কতকটা সান্ত্বনা পাইল ইহারা। অবশেষে পত্র লিখিতে বসিল। যুদ্ধের ষোড়ামুটি অবস্থা ও পারিপার্শ্বিক ঘটনা বিবৃত করিয়া জানাইল বাড়ীর মালিককে।

পত্র আসিতেও দেরী হইল না। তিনি প্রকৃত অবস্থা আগে হইতেই অনুমান করিয়াছিলেন। সব কথা পরিস্কার করিয়া লিখিলেন। যাহারা চলিয়া যাইতে চায়, যাইতে পারে। তাহারা কি করিবে সম্বন্ধ জানাইয়া চিন্তা দূর কর।

বাড়ীর সামনে একটু খোলা জায়গা পড়িয়াছিল সেখানে ট্রেন্কে কাটা হইতেছে। অবস্থা বুঝিলে এই গর্তের ভিতর শুইয়া মানুষ আশ্রয় লইতে পারে। তাহারই আয়োজনে অনেকে ব্যস্ত।

নোটিশ আসিয়াছে বাড়ীর সামনে দরজার মুখে একটা দেওয়াল তুলিতে হইবে। বাহিরে বোমা পড়িলে তাহার টুকরাগুলি যাহাতে বাড়ীর ভিতরে না ঢোকে এ তাহারই ব্যবস্থা। শশীপদ মহা ভাবনায় পড়িয়াছে।

এত বড় বাড়ীর যাহারা বাসিন্দা সেই পুরুষবর্গের মধ্যে কেহ কাহারও সহিত বিশেষ কথাবার্তা বা আলাপ পরিচয় করিত না। এখন সকলেই সকলের পরামর্শ চায়। বসিয়া বসিয়া কথাবার্তা বলে।

মেয়েদের তো কথাই নাই। এক ঘরে বসিয়া এই কথাই আলোচনা করিতে থাকে।

ভালমাসির খোরাক জুটিয়াছে ভাল। এর কথা ওকে, ওর কথা তাকে বলিয়া অবস্থাকে আরও গরম করিয়া রাখিতেছে। তাহারও ভয় ধরিয়াছে কম নয়।

মহিলা মহলে ভয়ের ভাব বেশী। উৎসাহ ও উদ্বেজনা ততোধিক। বাহিরের সংবাদ জানিবার আগ্রহ ক্রমেই বাড়িয়া চলিয়াছে। ছেলেরা নানা গুজব আনিয়া নিত্য নূতন সংবাদ পরিবেশন করিতেছে।

কয়দিন হইতে বিরজার কোন সংবাদ নাই। মাধবী ব্যস্ত ব্যাকুল হইয়া উঠিল। এই দুর্দিনে তাহার সংবাদ না লইলে তো চলে না। মনোজকে ধরিল। প্রথমে খোসামোদ তারপর ঘুষ দিয়া তাহাকে বিরজার খবর আনিবার জ্ঞপ্ত পাঠাইল।

ঘণ্টা কয়েক পরে মনোজ ফিরিয়া আসিয়া বলিল যে, বিরজা দেশে চলিয়া গিয়াছে। মেসের অনেকেই চলিয়া গিয়াছে অবশ্য যাহারা ছাত্র ছিল। বাকী যাহারা আছে তাহারা সরিয়া পড়ার জ্ঞপ্ত তোড়জোড় করিতেছে। ও দিককার অনেক বাড়ী বন্ধ দেখা গেল।

এক ফাঁকে মনোজ তাহার সঙ্গীদের লইয়া সারা সहर ঘুরিয়া দেখিয়া আসিয়াছে। অবস্থা ভাল নয়। ঘোড়ার গাড়ী, ট্যাক্সি ছুটিতেছে ক্রমাগত স্টেশনের দিকে। স্টেশনে লোকে লোকারণ্য। সব পলায়ন তৎপর হইয়া উঠিয়াছে আর কুলিদের পড়িয়াছে মরশুম।

মনোজ বসিয়া বসিয়া মাধবীকে কলিকাতার হালচাল বলিয়া চলে।

মাধবীর উপর কড়া চিঠি আসিয়াছে। সहर মনোজকে সঙ্গে লইয়া সে যেন চলিয়া আসে। কলিকাতার সংবাদ যে ভাবে তাহারা প্রতিদিন পাইতেছে ও আগন্তকের কাছে যে সব ঘটনা শুনিতেছে তাহাতে আর সাহস হয় না ওখানে রাখার। কথার অবাধ্য হইবে না।

মাধবী আর আপত্তি তুলিল না। স্বামী আসিলেই তাহাকে চাকরীর জ্ঞপ্ত সাবধানে থাকিবার, আবার সময় বুঝিলে সরিয়া পড়ার নির্দেশ দিয়া তাহারা দেওর ভাজে ঘর সামলাইতে লাগিল।

এত সাজান ঘর। এত যত্ন করিয়া কিনিয়া রাখা সাজান গুছান জিনিসপত্র সব ফেলিয়া তাহারা চলিয়া যাইবে। ফিরিয়া আসিয়া

এইগুলি দেখিতে পাইবে কিনা সন্দেহ। হয়তো বাড়ীখানাই বোমার  
আঘাতে গুঁড়া হইয়া যাইবে। ভাবিতে লাগিল মাধবী।

মনোজ কখনও বা ভয় দেখায় বেশী মাত্রায়। কখনও বা সাস্তুনা  
দিয়া বলিতে থাকে, ও কিছু নয়। কিছু হবে না।

এমন সময় আসিল চপলা। আসিয়াই মাধবীকে টিপ করিয়া  
প্রণাম করিয়া বলিল, দিদি, চললাম। দেশে যাচ্ছি। সব তৈরী।

অবাক হইয়া মাধবী চপলাকে দেখিতে লাগিল। বিরজা ও  
চপলাকে লইয়া সে অনেক কল্পনা করিয়াছিল। সেই বিরজা কদিন  
হইল চপলার মোহ ত্যাগ করিয়া বোমার ভয়ে পলাইয়া গিয়াছে।  
আজ চপলাও পলাইতেছে সেই বোমার ভয়ে। হায় বোমা!  
ভালবাসা ইহাদের কাছে কি কিছুই নয়।

মনোজ হাসিয়া বলিল, যাও! সবাই যাবে। আমরাও কাল  
বাড়ী যাচ্ছি। তবে বৌদিকে তোমাদের ঠিকানাটা দিয়ে যেও।

মাধবী বলিল, সত্যি, তোদের ঠিকানাটা দে তো। চিঠি দোব।  
তোরাও দিবি। আমাদের ভুলিসনি! ভুলিসনি তোর বিরজাকে। দেখি,  
বাড়ী তো যাচ্ছি, যদি কিছু করতে পারি। ভাবিস নি।

হঠাৎ চপলার চক্ষু সজ্জল হইয়া উঠিল।

নীরদানন্দরী কোথাও যাইবে না ঠিক করিয়াছে। সবাই চলিয়া  
গেলেও সে ঠিক থাকিবে এই বাড়ী আগলাইয়া। শশীপদ সরিয়া  
পড়িবার চেষ্টায় আছে। তাহার দেশ ঘর কোথাও নাই। অবশ্য  
এককালে ছিল। এখন তাহার নিশানা পাওয়া দায়। সে চেষ্টা  
করিতেছে কোন দূর সহরে চলিয়া যাইবে। হয়তো বা কানীতে সেই  
বৃদ্ধের বাড়ীতেই গিয়া উঠিবে।

নীরদাসুন্দরী বলে, সাত কাল গিয়ে এককালে ঠেকেছে তার, আর ভয় কিসের ! যা হয় হোক ! সে এক পাও নড়বে না ।

উপর হইতে ভালমাসি টিপ্পনি কাটিয়া বলিল, সেই ভাল, কলতলায় বাদ সাধবার কেউ থাকবে না । দিন রাত জল নিয়ে থেক ।

অপরাজিতা আর এক টিপ্পনি কাটিয়া বলিল, পলতায় কি টালায় যদি বোমা পড়ে তাহলে জল আসবে কোথা থেকে ? বিনা জলে কি মাসির একটা দিনও চলবে ?

নীচে হইতে নীরদাসুন্দরী ব্যঙ্গ কটাক্ষ করিয়া বলিল, ও আমার কপাল ! বলে কি দেখ না !

গোঁ গোঁ শব্দ করিতে করিতে একদল এরোপ্লেন আকাশে উড়িয়া চলিল । সকলেই অবাক হইয়া উপরের দিকে তাকাইয়া রহিল । কিছুক্ষণ পরে আবার তাহারা ফিরিয়া আসিল ।

অপরাজিতা বলিল, তাড়া করতে গিয়েছিল । তাড়া খেয়ে ওরা পালিয়ে যাওয়ায় এরা ফিরে আসছে ।

শশীপদ কোথা হইতে হস্তদন্ত হইয়া আসিয়া বলিল, সর্বনাশ ! রেজুন শেষ । আন্দামান যায় যায় । কলকাতার পালা এবার ।

নীরদাসুন্দরী বিরক্ত মুখে বলিল, যাক ও সব কথা । যত সব বাজে কথা । হয় হোক । আমি ওতে ভয় খাই না ।

সামনের বাড়ী, পাশের বাড়ী, ও দিকের বড় বাড়ীর সবাই কদিন হইতে পাড়ি জমাইতেছে । তাহাদের লটবহর আর কথাবার্তার বহর শুনিয়া অনেকের ভয় ধরিয়া গিয়াছে ।

শশীপদের স্ত্রীরও ভয় ধরিয়া গিয়াছে । সে এখানে একদণ্ড থাকিতে রাজী নয় । থাক বাড়ী, লোক জন, প্রতিবেশী । ভাড়া আদায় করার

নেশা তাহার চলিয়া গিয়াছে। বাড়ীওয়ালী সাজিবার সখও মিটিয়াছে।  
হুইজনে পরামর্শ করিয়া ঠিক করিল তাহারাও চলিয়া যাইবে।

বাহিরের রোয়াকে বসিয়া শশীপদ কি যেন ভাবিতেছিল।

নবেন্দু হন হন করিয়া আসিতেছে। হাতে একখানা কাগজ।

শশীপদ জিজ্ঞাসু মুখে বলিল, কি খবর ? টেলিগ্রাম নাকি ?

কাগজখানা শশীপদের হাতে দিয়া সে পাশে থপ করিয়া বসিল।  
কপালে ঘাম মুছিয়া বলিল, সব শেষ ! আর বাঁচবার উপায় নাই।  
কাতারে কাতারে সৈন্য চলেছে সীমান্তের দিকে। আর একটা বড়  
রকমের আক্রমণ হ'ল বলে। কাল কি পরশু। এবার কলকাতা শেষ  
করে দিয়ে তবে ছাড়বে।

শশীপদ হতাশ হইয়া বলিল, আর থাকা যায় না।

ঠিক কথা। এত বিপদের মধ্যে বাস করা যায় না। বলিয়া  
নবেন্দু পকেট হইতে চিঠি বাহির করিয়া বলিল, বাড়ী থেকে চিঠি  
এসেছে। একদিন অন্তর আসছে। চলে এস। চলে এস। আর  
থেকে কি ফল। দিন কয়েকের ছুটি না দেয় তো চাকরী ছেড়ে দিয়েই  
এস। বেঁচে থাকলে চাকরীর অভাব হবে না।

ঠিক বলেছেন। আগে প্রাণ তারপর অন্য সব। সেই প্রাণটাই  
যদি গেল অনালে বেঘোরে তবে থাকল কি ? বলিল শশীপদ।

হাসিতে হাসিতে নবেন্দু বলিল, তার ওপর আর এক বিপদ  
জুটেছে। যারা এখান থেকে পালিয়ে যাচ্ছে। তারা ক্রমাগত যা  
তা বলে ওদের সব ভয় ধরিয়ে দিচ্ছে। বলে কি না হাওড়া ব্রিজের  
চিহ্ন মাত্র নাই। বড় বড় বাড়ী সব ধুলোয় মিশিয়ে দিয়েছে।  
বড়বাজার, ডালহাউসি স্কোয়ার সব শেষ।

একটু থামিয়া আবার বলিতে লাগিল, আচ্ছা মজা হয়েছে। যারা  
পালাল তারা না বলেই বা চুপ করে থাকে কি করে। কাপুরুষ বলবে  
যে তাদের। তাই যা খুসী তাই বলে তারা ভয় ধরিয়ে দিচ্ছে। নিজেরা

সব পালিয়ে এসে যে বুদ্ধিমানের কাজ করেছে সেই কথাই বার বার করে সকলকে বলে বেড়াচ্ছে। ভাবছে খুব বীরত্বপনা দেখালে। বোমা পড়ল শ্রামবাজারে। সে কি এতটুকু অঞ্চল। পড়েছে তো বাজারে আর একটা বাড়ীতে। কিন্তু হলে কি হবে। সারা শ্রামবাজার অঞ্চলে যারা থাকে সকলেরই আত্মীয় স্বজন ভাবছে তাদেরই লোকের ওপর সেই বোমা পড়েছে।

শশীপদ গম্ভীরভাবে বলিল, গ্রামের লোকেরা একটু বোকা, আর ভীতু। যে যা বলে তাই বিশ্বাস করে বসে। ভেবে দেখে না একটুও। বাইরে থেকে অমন লাগে। চোখের সামনে আমরা যা দেখে ভয় পাই না, ওরা সেখান থেকে তা অনুমান করে ভয়ে সারা হয়।

যুদ্ধের কি অবস্থা শুনলেন জানলেন তাই বলুন। যুদ্ধ হবে তো ?

হবে মানে ? হচ্ছে যে ! এতেও বিশ্বাস হচ্ছে না আপনার ?

না, না। আমার বিশ্বাস হচ্ছে না। একি কথার কথা ! বলিয়া শশীপদ কাগজখানা তুলিয়া ধরিল। ধরিতেই যে ছবি প্রথম পৃষ্ঠায় দেখিল তাহাতে তাহার মাথা ঘুরিয়া গেল।

একখানা ভাঙ্গা বাড়ীর ছবি। বাড়ীটা যে প্রকাণ্ড বড় তা তাহার স্তূপ দেখিলেই বোঝা যায়। শশীপদ বলিয়া উঠিল, এঁটা, এ যে সর্বনেশে কাণ্ড ! আচ্ছা চলুন। আমিও যাচ্ছি আপনার ঘরে একটু পরে। অনেক পরামর্শ আছে।

নবেন্দু হাসিতে হাসিতে বলিল, আমার সঙ্গে পরামর্শ ! তারপর সে দ্রুত চলিয়া গেল তাহার ঘরের দিকে।

নবেন্দু জামা কাপড় পরিবর্তন করিয়া কাঁকা ঘরে পায়চারি করিতে লাগিল। সব শূন্য লাগে যেন।

এমন সময় শোনা গেল পাশের ঘরে তাসের আড্ডা পড়িয়াছে। তাহাদের কোলাহলের অন্ত নাই। যুদ্ধের বাজারে তাহারা বাজী মাং করিতে চায়।

হাসি পাইল নবেন্দুর। এই এত বড় বাড়ীতে পুরুষের সাড়া শব্দ



মিলিত না। মেয়েরাই হৈ হৈ করিয়া বেড়াইত। এ গর ঘরে বাইত। ও তার ঘরে গিয়া বসিয়া গল্প করিত। তাহাদেরই যেন সব। সারাদিন চাকরী করিয়া, ব্যবসা করিয়া বাড়ী ফিরিয়া আসিয়া কে কোথায় কোন ঘরে পড়িয়া থাকিত কেহ কাহারও খোঁজ খবর রাখিত না। এখন তাহারা হুকের বাজারে তাস খেলিয়া আড্ডা দিয়া সারা বাড়ী ঘর ঘুরিয়া বেড়াইয়া হৈ হল্লা করিয়া চলিতেছে। এ যেন মেসবাড়ী একটা।

নীরদাসুন্দরী একা কল ঘরে। বাধা দিবার কেহই নাই। কল হইতে অবিরত জল পড়িতেছে। কাহারও প্রয়োজন নাই। রান্না-বাড়ার প্রয়োজন যে অনেকের ফুরাইয়াছে। অফিসের ক্যাটিনে কেহ খায়। কেহ বা হোটেল। নেহাৎ যাহারা পারে না তাহারা নিজেরা সিদ্ধপাক রান্না করিয়া উদর ভরাইয়া লয়।

এত বড় জম জমট লক্ষ্মীমন্ত বাড়ীখানার এই শ্রী হইয়াছে দেখিয়া শশীপদ মনের দুখে ঘুরিয়া বেড়ায়। মেয়েদের কোলাহল, কলগুঞ্জন যেন কোন যাত্ৰকরের মন্তবলে স্তব্ধ হইয়া গিয়াছে।

শশীপদ গিয়া দাঁড়াইল নবেন্দুর ঘরের সামনে।

আসুন দাদা, আসুন।

শশীপদকে এরূপ সম্মান কেহ করিত না। বাড়ীওয়ালা সাজিয়া তাহার মেজাজ যেরূপ গরমে উঠিয়াছিল তাহাতে তাহার সঙ্গে কথা বলা অনেকের সহজ সাধ্য ছিল না। কেহ কথা বলিলে শশীপদ ভাবিত খোসামোদ করিতে চায়। ভাড়া বাকী রাখার মতলবে আছে। কাজেই সেও সেই ভাবে কথা বলিত। তাহার ভাব দেখিয়া অশ্বেরাও সেই মত চলিত। সেই শশীপদ এখন এমন হইয়া গিয়াছে। কেহ ডাকিয়া কথা বলিলে যেন কৃতার্থ হয়।

পাশের ঘর হইতে চীৎকার উঠিল—বাজি মাং !

শশীপদ আঁতকাইয়া উঠিল।

নবেন্দু হাসিয়া বলিল, বাজি মাংই বটে ! চাকরী আর খেলাঃ  
সংসারের ঝামেলা তো সব চুকেছে। এ ছাড়া আর কথা কি !  
একটা কথা ভুলে গিয়েছি। শুধুন, চোর গুণ্ডার বড় অত্যাচার আরম্ভ  
হয়েছে। অন্ধকার রাস্তা। সাবধানে চলবেন।

শশীপদ ভয়ে ভয়ে বলিল, তাই নাকি ? এ বাড়ীতে গুণ্ডার  
চড়াও হবে না তো ?

হো হো করিয়া হাসিয়া উঠিল নবেন্দু, যে মেস বাড়ী করে  
তুলেছেন তাতে সে দিক দিয়ে ভয় কিছু নাই। আবার ভয় নাই  
বা কেন ? দিনে সবাই চাকরীর জগ্গে বাইরে থাকে। সেই  
ফাঁকে—

শশীপদ আস্তে আস্তে বলিল, তা হলে—অতবড় বাড়ীর দায়িত্ব  
ঐ বুড়ো আমার ঘাড়ে চাপিয়ে দিয়ে যে এমন জব্দ করবে তা কে  
জানে ? কি বিপদ—

এতদিন তো সে কথা ভাবেন নি। বেশ বাড়ীওয়ালা সেজে  
রাজত্ব করছিলেন। বলিয়া নবেন্দু একটা কটাক্ষ করিল।

শশীপদ বলিল, যাই একবার ও ঘরে, কাজ আছে। পরে আসব।  
বলিয়া সে চলিয়া গেল।

নবেন্দু বিছানায় শুইয়া পড়িয়া কড়িকাঠ গুণিতে লাগিল।

শনিবার হইলে বাড়ী যাইবার হিড়িক লাগে সকলের। ট্রেনের ভিড় বাড়িয়াছে অসম্ভব। শুক্রবার সন্ধ্যার দিকে ঘরে ঘরে পুঁটলীর বহর বাড়িয়া উঠে।

ঘরে বসিয়া সবাই সেই কথাই বলাবলি করে। যাবে কেমন করে। যে ভীড়। অথচ প্রতি সপ্তাহে তাহাদের জীবন্ত অবস্থাটা বাড়ীতে না দেখাইলে তো চলে না।

ষ্টেশনের মুখ হইতে প্লাটফর্ম পর্য্যন্ত কাতারে কাতারে লোক দাঁড়াইয়া আছে। তখনও ট্রেন আসে নাই। প্লাটফর্মে ট্রেন ঢোকা মাত্রই চলতি ট্রেনে একে একে সব উঠিয়া পড়ে। ট্রেন যখন থামিল তখন দেখা গেল গাড়ী একদম ভর্তি হইয়া গিয়াছে।

ঘরে বসিয়া ট্রেনের গল্প, ভীড়ের গল্প এবং যাত্রীদের দুঃস্বপ্নের কাহিনী শুনিতে শুনিতে শশীপদর কান ঝালাপালা হইয়া গিয়াছে। যে ঘরে যাইবে সে ঘরেই ঐ এক কথা।

ঘুস দিয়া টিকিট কাটিতে হয়। ঘুস দিয়া ট্রেনের কামরার ভিতর বসিতে হয়। মোটের জন্ত কুলিকে বেশী ঘুস দিতে হয়। অত্যধিক ভীড়ের জন্ত ষ্টেশনে পুলিশ মিলিটারী বসিয়া গিয়াছে, তাহারাই আবার বেশী ঘুস খায়।

আলোকোজ্জ্বল কলিকাতা কালি মাখিয়া বসিয়া আছে। রাস্তার মোড়ে মোড়ে পুলিশের সঙ্গে এ. আর. পি। আলোগুলি কাল টুপী পরিয়া বৌ সাজিয়াছে যেন। এখানে-সেখানে গর্ত খুঁড়িয়া ট্রেন কাটা হইয়াছে। বাড়ীর সামনে দেওয়াল তুলিয়া নিরাপদ আশ্রয় রাখার ব্যবস্থা হইয়াছে। সদর রাস্তায় অল্প আলো, গলিতে অন্ধকারের রাজত্ব।

জানালা দরজায় যেখানে কাচের পতন সেখানে পট্টি বাঁধার ব্যবস্থা

করা হইতেছে। বোমা পড়িলে কাচে আঘাত লাগিতে পারে। তাহার ফলে সেই কাচগুলি বোমার সঙ্গী হইয়া আঘাত দিবার জন্ত ছুটিয়া বেড়াইতে পারে। হয় কাচ খোল, না হয় পট্টি বাঁধিয়া দাও। শশীপদ দেখে সব ঘরেই পট্টী বাঁধা হইয়া গিয়াছে। তাহার ঘরে কেবল এই কাজ করা হয় নি। ছুটিল নিজের ঘরে। শ্রাকড়া কাগজ আর আটা দিয়া কাচের জানালায় পট্টি বাঁধিতে লাগিল। তাহার ঘর শূন্য। একলা কখন আসে, কখন যায় কোন ঠিক নাই। বাড়ীর উপর তাহার মায়া আর নাই যেন। দেখিতে দেখিতে এ কি হইয়া গেল।

মাথায় হাত দিয়া একসময় বসিয়া পড়ে সে ঘরের মেঝের উপর। দুখানা এরোপ্লেন উপর দিয়া যেন আসিতেছে। শাদা চিক চিক করিতেছে।

পাশের ঘর হইতে একজন চীৎকার করিয়া উঠিল, জাপানী এরোপ্লেন রে! একেবারে জাপানী! কি শাদা! আর চিক চিক করছে কেমন? এ ধরণের এরোপ্লেন কখনও দেখিনি।

শশীপদ বারান্দায় আসিয়া আকাশের পানে তাকাইয়া ঐ এরোপ্লেন দেখিতে লাগিল। নবেন্দু বাহিরে আসিয়া শশীপদকে টানিয়া ঘরে লইয়া গেল। অবাক কাণ্ড! এই অবস্থায় দাঁড়িয়ে দেখচেন? ভয় নাই এতটুকুও! একেবারে জাপানী মাল! বোমা ফেলল বলে।

শশীপদ হতভম্ব হইয়া গিয়াছে। কত ছোট ঐ ছুটি এরোপ্লেন। অনেক উপরে আছে তাহারা। আশ্চর্য্য ব্যাপার!

নবেন্দু সাবধান করিয়া বলিল, এমনভাবে যদি থাকেন তো বৌদিকে চিঠি লিখে দোব। বাড়ী আগলানো বের করে দোব। অমনভাবে আর কখনো দাঁড়াবেন না। নীচে কোণের দিকে একটা ঘর ঠিক করা হয়েছে। সাইরেন বাজলেই সবাই সেখানে গিয়ে ঢুকবে। একেবারে নিরাপদ আশ্রয়। চারদিক ঘেরা কোন দিক থেকে ছিটে ছাটা আসার উপায় নাই।

সেদিন রাত্রে সবাই শুইয়াছে। অকস্মাৎ সাইরের বাজিয়া উঠিল  
একটানা আর্তনাদ।

হুম দাম, হুড় দাড়, ধপ ধপ শব্দ করিতে করিতে সবাই আসিয়া  
সেন্টারে আশ্রয় লইল।

ঘরখানি বড়। অনেকগুলি লোক থাকিতে পারে। অন্ধকার  
ঘরে একদল লোক ভয়ে জড়সড় হইয়া বসিয়া আছে। মধ্যে মধ্যে  
টর্চের আলো ফেলিয়া নিজেদের অবস্থা নিজেরা দেখিয়া লইতেছে।

সাইরেন বাজার সঙ্গে সঙ্গে শব্দ হইল এরোপ্লেনের। হুম হুম  
করিয়া চলিতেছে না আসিতেছে কিছু অনুমান করা যায় না। নবেন্দু  
বলিল, আজ শেষ রাত্রি।

শশীপদ আর্তনাদ করিয়া উঠিতেই একজন বলিয়া উঠিল, এই চুপ !  
চুপ ! শব্দ করেছেন তো মরেছেন।

শশীপদ কাঁদিতে কাঁদিতে বলিল, আর না। খুব শিক্ষা হয়েছে  
আমার। সকাল হলেই পালাব। আর এ বাড়ীর পানে ফিরেও চাইব  
না। কিসের বাড়ী ! কার বাড়ী !

নবেন্দু টিপ্তনী কাটিয়া বলিল, আপনার ভরসায় তো আমরা আছি।  
আপনি চলে গেলে আমরা থাকব কি করে ? সে হবে না। আপনার  
যাওয়া চলবে না।

আবার এরোপ্লেনের শব্দ।

একজন বলিল, এইদিকেই আসছে না ?

আসছে না মানে। এসে একেবারে মাথার ওপর ঘুরছে। বন বন  
করে ঘুরছে।

দিলে সাবাড় করে ! গেলাম আর কি !

ভগবান বাঁচাও ! দোহাই ভগবান !

কালরাত্রি কি আর পোয়াবে না !

কাল পোয়াবে !

চন্দ্রনাথ তখন হইতেই তৈয়ারী হইতেছিল। বলিল, জামা

কাপড় টাকা পয়সা সব রেডি। সঙ্গেই থাকে। রাত্রে শোবার সময় রোজ সব কিছু রেডি করে রাখি। সাইরেন বাজা মাত্র তৈরি হয়ে নিই একমিনিটে। তারপর গুমটি ঘরে আশ্রয় নোব। শেষ হ'ল তো হ'ল। না হ'ল তো এইখান থেকে চৌচা দৌড়। প্রথম হাওয়ার ব্রীজ। তারপর সড়ক। গ্র্যাণ্ড টাঙ্ক রোড। শেষে বাড়ীর পুকুর ঘাটে পা ধুয়ে ঘরের ছেলে ঘরে গিয়ে উঠব।

নবেন্দু বলিল, চন্দ্রনাথ ওস্তাদ ছেলে। কিন্তু ওর শালা আরও ওস্তাদ। সে কদিন থেকে ছোলা চিড়ে চিনি লেবু সব রেডি করে রেখেছে। কলকাতা শেষ হবার একটু আগেই সরে পড়বে।

আমিও তো শেষ না দেখে যাব না। আর একজন বলিয়া উঠিল।

চন্দ্রনাথ ধমক দিয়া বলিল, হাওয়ার ব্রীজ ভাঙবে গুনলাম। তাহলে যাবে কি করে?

সে এক সমস্তার কথা।

একজন বললে, দে সাঁতার। চিং সাঁতার। ডুব সাঁতার।

উপরে তখনও এরোপ্লেন ছুটাছুটি করিতেছে।

নীচে একদল মৃত্যুভয় ভীত জীব বসিয়া হাসির ছড়া কাটিতেছে।

একজন হো হো করিয়া হাসিয়া উঠিল। সঙ্গে সঙ্গে আর একজন শিয়াল ডাক ডাকিতে শুরু করিল।

শশীপদ হাত জোড় করিয়া বলিল, দোহাই! এই বিপদের মধ্যে অত বাড়াবাড়ি আর করবেন না। ভালও লাগে এ সব।

ভালো কি লাগে মশাই। প্রাণের দায়ে করে বসি।

বেশ থামুন। আর না, এরোপ্লেনগুলোকে আগে যেতে দিন। তার পর নাচ গান হুলা যা খুসী করবেন। এই করেই তো সব সময় কাটাচ্ছেন। মেয়েরা ছিল লক্ষ্মী। বাড়ী ছিল লক্ষ্মীমন্ত। তারা চলে যাওয়ায় শ্রীহীন হয়ে পড়েছে। কোথাও এতটুকু শ্রী দেখা যাচ্ছে না। যত সব লক্ষ্মীছাড়ার দল!

আবার সাইরেন।

একজন বলিয়া উঠিল, আবার শব্দ ওঠে যে। আসছে নাকি আবার? না না, এ যে অল ক্রিয়ার। বিপদ কাটল তাহলে—

দুর্গা ত্রীহরি! দুর্গা ত্রীহরি! বলিতে বলিতে শশীপদ উঠিয়া পড়িল। গোটাকয়েক টর্চ একসঙ্গে জ্বলিয়া উঠিল ঘরের মধ্যে।

গভীর রাত্রে শশীপদ রাস্তায় আসিয়া দাঁড়াইল। তাহার হাতে একটা স্মটকেশ। এ দিক ও দিক তাকাইয়া দীর্ঘনিঃশ্বাস ফেলিয়া বলিল, মা খুব মুখ রেখেছ। তোমার সব কিছু থাকল, আমি এই শ্মশান আগলিয়ে থাকতে পারি না। ভয়কাতর মুখ চোখ। হাত পায়ের অবস্থাও তেমন শক্ত সবল বলিয়া মনে হয় না। নবেন্দুর সন্দেহ হইয়াছিল শশীপদ আর থাকিবে না। সব কিছু ফেলিয়া পলাইবে।

এমন সময় বাহিরে কড়া নাড়ার শব্দ।

কে! কে!

দরজা খুলুন।

নবেন্দু দরজা খুলিতেই দেখিল শশীপদ থর থর করিয়া কাঁপিতেছে তখনও। হাতে স্মটকেশ।

কি হ'ল।

পালিয়ে যাচ্ছিলাম। রাস্তা থেকে ফিরে এলাম, শুধু আপনাকে একটা কথা বলবার জগ্গে।

কি কথা? আচ্ছা শুনছি ঘরে এসে একটু বসুন না। বসে বসে বলুন। বড্ড ভয় খেয়ে গেছেন দেখছি। হাত পা যেন কাঁপছে। বলিয়া সে শশীপদকে টানিয়া আনিয়া খাটের উপর বসাইল।

আমি চলে যাচ্ছি। ভার রইলো সব আপনার ওপর। তার জগ্গে আপনার ভাড়া আমি যকুব করে দেব।

আমি কিন্তু ভাড়া আদায় করতে পারব না।

যে যা দেয় নেবেন। না দেয় চাইবেন না। এখন দেখছি

ভাড়া দেয়ে ভাড়াটের কদর বেশী। তাদের জিইয়ে রাখতে পারলে বাড়ী থাকবে, ভাড়াও থাকবে। দোহাই, এ ভারটি আপনাকে নিতে হবে। আপনাকেই কেবল বিশ্বাস করি। ভরসা রাখি।

পাগল নাকি। আমি পালাবার তালে আছি। লোক ভাল পেয়েছেন। আমার দ্বারা ও সব কাজ কি হয়, না পারি কিছু। অশুকে বলুন। আছেন তো অনেকেই এই বাড়ীতে।

ভরসা হয় না আর কাউকে। যাকে ভার দেব সেই সব ভাড়া আদায় করে মেরে দেবে, না হয় সরে পড়বে।

কোথায় যাবেন! বৌদিরা কোথায়?

কাশীতে। আমার বাড়ীওয়ালার কাছে। তিনি চিঠি লিখেছেন, অবস্থা বুঝলেই চলে আসবে। বাড়ী থাক। যারা যেমন আছে, তারা তেমনি থাক। ভাড়া যে দেবে নেবে, না দিলে তাগিদ দিও না। তবে যারা আছে এখনও, শেষ পর্যন্ত তারাও থাকবে কিনা সন্দেহ। যদি দেখ সবাই চলে যাচ্ছে তাহলে দরজা বন্ধ করে তার সামনে ইটের দেওয়াল তুলে ভাল করে বন্ধ করে দিয়ে চলে এস। কলকাতার বহু লোক কাশীতে এসে ভীড় জমিয়েছে। তারা নিত্য নতুন গুজব ছড়িয়ে বেড়াচ্ছে। তাই শুনে সবারই ভয় ধরে গিয়েছে। আমারও খুব ভয় ধরেছে। তুমি বরং চলেই এস। যা আমার ভাগ্যে আছে হবে।  
—তুমি কি করতে বল?

নবেন্দু বলিল, তবে আপনার চলে যাওয়াই ভাল। কাল সকালে সকলকে বলে কয়ে চলে যাবেন। নিজের নিজের ঘর নিজেরা আগলাব।

এখন আর বসব না। বের হয়ে পড়েছি যে। রাস্তা থেকে ঘুরে এলাম। শুধু তোমার কাছে একটি কথা বলবার জন্মে এই আসা। তাহলে বলছ এখন রওনা হ'ব না?

এত ভোরে। এখন মোড়ে মোড়ে পুলিশ, এ. আর. পি. আর মিলিটারীতে ছেয়ে আছে। আপনাকে এই অবস্থায় দেখলেই ধরে



‘নিয়ে যাবে। সাবধান! এখন কি বের হয়!’ সকাল হোক তারপর যাবেন।

অবশ হইয়া গেল শশীপদর সর্বশরীর। তাহার বসিয়া বসিয়া কেবল মনে হইতে লাগিল, কি ছিল, কি হ’ল। কালে কালে কত না ঘটবে।

নবেন্দু বলিল, আমিও আর বেশী দিন নাই। তবে শেষ দেখা দেখে যাব। কাশীতে গিয়ে পত্র দেবেন তো মধ্যে মধ্যে?

পত্র মানে রিপ্লাই কার্ড দোব প্রতিবারেই।

কথা শুনিয়া নবেন্দুর হাসি পাইল।

ভোর হইতেই নবেন্দু বলিল, যাবার আগে সকলের সঙ্গে দেখা করুন। আমি বরং সঙ্গে থাকব।

তাই করব। কিন্তু রাস্তারের এত ঘটনার পর আমার হাত-পা সব যেন পেটের ভেতর ঢুকে গেছে। শরীরে এতটুকু শক্তি নেই। কি করে যে এতটা পথ যাব তাই ভাবছি। একটু ভাবিয়া বলিল, আচ্ছা আমি ভাড়া দিচ্ছি, আমাকে পৌঁছে দিয়ে আসবেন?

আমার তো ছুটি নেই। কি করে যাই। তার চেয়ে আমি অণু লোক দেখছি। সে আপনাকে পৌঁছে দিয়ে আসবে।

থাক থাক অণু লোককে বিশ্বাস নাই। আমি একাই যাব।

সকালে উঠিয়া নবেন্দু দেখিল সব ঘর তালা বন্ধ। লোকজনের সাড়া শব্দ নাই। রাত্রে এই ঘটনার পর সকলেই অত্যধিক ভয় পাইয়া গিয়াছে। সকাল হইতে যা দেরী। তারপর আর কেহ একদিনও এখানে থাকিবে না এই অনুমানটা সে করিয়া বসিয়াছিল।

হাত মুখ ধুইয়া স্টোভে চা তৈয়ারী করিয়া খাইয়া নিজের ঘরে একটি তালা দিয়া সদর দরজায় বড় দুইটি তালা লাগাইয়া জীর্জগা বলিয়া সে রওনা হইল।













